

萬有文庫

種百五編簡集二十一

編主王雲王

續古文苑

(二)

孫星衍輯

仁世地圖

省立新竹高中圖書館



00011262

萬有文庫

編五編簡第二十一

王雲五
著者

商務印書館發行

苑文古續

(二)

孫星衍輯

圖學基本叢書

011262

續古文苑卷第六

賜進士及第授通奉大夫山東通省督糧道加三級孫星衍撰

表

請許吳主委質表

魏鍾 絲

尚書宣示孫權所求詔令所報所以博示逮於卿佐必冀良方出於阿是夢堯之言可擇郎廟況繇始以疏賤得爲前恩橫所眇睨公私見異愛同骨肉殊遇厚寵以至今日再世榮名同國休戚敢不自量竊致愚慮仍日達晨坐以待旦退思鄙淺聖意所棄則又割意不敢獻聞深念天下今爲已平權之委質外震神武度其拳拳無有二計高尚自疏況未見信今推

款誠欲求見信實懷不自信之心亦宜待之以信而當護其未自信也其所求者不可不許許之而反不必可與求之而不許勢必自絕許而不與其曲在己里語曰何以罰與以奪何以怒許不與思省所示報權疏曲折得宜宜神聖之慮非今臣下所能有增益昔與文若奉事先帝事有數者有似於此粗表二事以爲今者事勢尚當有所依違願君思省若以在所慮可不須復貽節度唯君恐不可采故不自拜表

賀捷表

臣繇言戎路兼行履險冒寒臣以無任不獲扈從企仰懸情無有寧舍即日長史遠充宣大令命知征南

魏鍾

繇

將軍運田單之奇屬憤怒之衆與徐晃同勢并力撲討表裏俱進應時尅捷馘滅凶逆賊帥關羽已被刃傅方反覆胡修背恩天道禍淫不終厥命奉聞嘉惠喜不自勝望路載笑踊躍逸豫臣不勝欣慶謹拜表因便宜上聞臣繇誠惶誠恐頓首頓首死罪死罪建安廿四年閏月九日南蕃東武亭侯臣繇上

力命表

魏鍾繇

臣繇言臣力命之用以無所立帷幄之謀而又愚耄聖恩低徊待以殊禮天下始定帥土欣戴唯有江東當少留思既與上公同見訪問昨讌見復蒙逮及雖緣詔令陳其愚心而臣所懷造膝之事昔先帝嘗以

事及臣遣侍中王粲杜襲就問臣。臣所懷未盡。冀益絲髮。乞使侍中與臣議之。臣不勝愚款悽悽之情。謹表以聞。臣繇誠惶誠恐頓首頓首死罪死罪。司徒東武亭侯臣鍾繇表。

薦關內侯季直表

魏鍾繇

臣繇言。臣自遭遇先帝。忝列腹心。爰自建安之初。王師破賊關東。時年荒穀貴。郡縣殘毀。三軍餽饟。朝不及夕。先帝神畧奇計。委任得人。深山窮谷。民所米豆。道路不絕。遂使強敵喪膽。我衆作氣。旬月之間。廓清蟻聚。當時實用。故山陽太守關內侯季直之策。剋期成事。不差毫髮。先帝賞以封爵。授以劇郡。今直罷任。

旅食許下。素爲廉吏。衣食不充。臣愚欲望聖德。錄其舊勲。矜其老困。復彼一州。俾圖報効。直力氣尚壯。必能夙夜保養人民。臣受國家異恩。不敢雷同。見事不言。干犯宸嚴。臣繇誠惶誠恐頓首頓首謹言。黃初二年八月日。司徒東武亭侯臣鍾繇表。

薦朱倫表

魏殷褒

蓋聞虞書非俊乂無以光帝載。西伯非髦士無以開王業。是故高世之主必廣登命之禮。有爲之君務通賢者之路。所以成大治也。切見同郡朱倫字文信。天真清亮。雅性忠篤。純粹足以激清源。美行足以廣風俗。當仁不讓。見得思義。疏達之才。強記博聞。飛辭抗

論駱驛奇逸誠當世之俊異一時之秀出也如得毘
佐銓衡翼亮右曹濟濟之觀足用華國

案隋書經籍志云魏章武

太守殷襄集
一卷
梁二卷

造沁口石門表

晉司馬孚

野王典農中郎將臣孚言臣被明詔興河內水利臣
旣到檢行沁水源出銅鞮山屈曲周迴水道九百里
自太行以西王屋以東層巖高峻天時霖雨衆谷走
水小石漂迸水門朽敗稻田汎濫歲功不成臣輒案
行去堰五里以外方石可得數萬餘枚臣以爲累方
石爲門若天暘旱增堰進水若天霖雨陂澤充溢則
閉防斷水空渠衍澇足以成河雲雨由人經國之謀

暫勞永逸聖王所許願陛下特出臣表勅大司農府
給人工勿使稽延以贊時要臣孚言

在魏時文

請省官表

晉桓溫

今天下分崩喪亂珍瘁雖道隆中興而戶口彫寡近
方漢時不當一郡之民民戶既少則勢不多而當必
同古制百官備職實非大易隨時之宜且設官以理
務務寡則官省官省以國治則職顯而人清故光武
初興多所併省諸葛亮相蜀簡才併官此皆達治之
成規今日之所先也宜從權制併官省職愚謂門下
三省祕書著作通可減半古以九卿綜事不專尚書
故重九棘也今事歸內臺則九卿爲虛設之位唯太

常廷尉職不可闕其諸員外散官及軍府參佐職無所掌者皆併省若車駕郊廟籍田之屬凡諸大事於禮宜置者臨時權兼事訖則罷職既併則官少而才精職理則無害民而治道康矣

出桓溫集畧案隋書經籍志晉大司馬桓溫集十卷錄一卷梁有四十三卷又有桓溫要集二卷亡御覽所引集畧當即要集也

進書訣表

晉王獻之

臣獻之頓首言臣年二十四隱林下有飛鳥左手持紙右手持筆惠臣五百七十九字臣未經一周形勢髮鬚其書文章不續難以究識後載周以兵寇充斥道路修阻乞食揚州市上一老母姓沈字光姜惠臣一餐無以答其意臣於匙面上作一夜字令便市賃

近觀者三遠觀者二未經數日遂獲千金所有書訣
謹別錄投進伏乞機務燕閒留神披覽不勝萬幸臣
獻之頓首

論佛教表

梁荀濟

三墳五典帝皇之稱首四維六紀終古之規模及漢
武祀金人莽新以建國桓靈祀浮圖閻暨以控權三
國由茲鼎峙五胡仍其薦食衣冠奔於江東戎教興
於中壤使父子之親隔君臣之義乖夫婦之和曠友
朋之信絕海內殷亂三百年矣稽古之詔未聞崇邪
之命重沓歲時禘祫未嘗親享竹脯麪牲欺誣宗廟
違黃屋之尊就蒼頭之役朝夕敬妖怪之胡鬼曲躬

供貪淫之賊禿鴟信邪胡謗祭淫祀恐非聰明正直
而可以福祐陛下者也臣請言得失推校是非按釋
氏源流本中國所斥投之荒蕪以御魑魅者也乃至
舜時竄檮杌於三峗左傳允姓之姦居於瓜州是也
杜預以允姓陰戎之別祖與三苗俱放於三峗漢書
西域傳塞種本允姓之戎世居燉煌爲月氏追逐遂
住葱嶺南奔又謂懸度賢豆身毒天毒仍訛轉以塞
種爲釋種其實一也允姓與三苗比居教迹和洽其
釋種不行忠孝仁義貪詐甚者號之爲佛佛者戾也
或名爲勃勃者亂也而陛下以中華之盛胄方尊姚
石羌胡之軌躅竊不取一也又按釋迦出戎剖脇而

誕摩耶遂殂事符梟獍年長爭立內不自安背父叛君逆節彌甚達多投石難陀引弓變革常道自餓形骸安能濟物聚合兇徒易衣削髮設言虛誕不足承稟九十六道此道最貪叶彼淫愚衆多崇信至如瑠璃誅釋瞿曇路左視之在生親尚不存既歿疎何能救斯即不行忠孝若天下習之陛下則無以自處不取者二也今僧尼不耕不偶俱斷生育傲君陵親違禮損化一不經也凡在生靈夫婦配合產育男女胡法反之多營泥木專求布施寧非巨戾二不經也姦胡矯詐自稱大覺而比丘徒黨行姪殺子僧尼悉然害螻蟻而起浮圖費財力而角堂宇若牟尼能照而

故縱姪殺便是詐稱慈悲徒能照而不能救又是大覺於羣生無益而天下不覺三不經也胡法慳貪唯財是與直是行三毒而害萬方未見修六度而隆三寶四不經也佛家遺教不耕墾田不貯財穀乞食納衣頭陀爲務今則不然數十萬衆無心蘭若從教不耕者衆天下有飢乏之憂違教設法不行何須此法進退未爲盡理五不經也涅槃發問世尊減後經教若爲得與波旬經別觀此發問則瞿曇存日門徒不能分辨真僞況中華避役姪詐之侶焉不迷惑者涅槃闍王害父耆婆敘狀佛以理除令其迷解俗唯事結惑網逾深故以陰界入中求父不得本唯妄想謂

父實人橫生圖害。取其重位。若先達解。知父本空。何心起逆。國亦非有。由佛開化。達悟妄心。退悔慚謝。獲無根信。案下引張融范鎮三破之論云云道宣刪之謂佛入國破家入身破身

也。融鎮立論。無能破之。自古帝師諸侯賓友。千載一

逢。猶如旦暮賢明希世。宇宙獨立。今乃削髮千羣。不

臣萬衆。稱爲帝師。未之可也。姚石玉食三千。佛寺瓊

宮八百。供敬厚矣。終獲苗允屠滅。宋齊已降。莫懲前

失。案下有云云及不取僧出寒微規免租役無期詣失者三也道宣刪之

道志在貪淫。竊盜華典。傾奪朝權。凡有十等。一曰營

繕廣廈。僭擬皇居也。二曰興建大室。莊飾胡像。僭比

明堂宗祀也。三曰廣譯妖言。勸行流布。讐帝王之詔

勅也。四曰交納泉布賣天堂五福之虛果奪大君之德賞也。五曰豫徵收贖免地獄六極之謬殃奪人主之刑罰也。六曰自稱三寶假託四依坐傲君王此取威之術也。七曰多建寺像廣度僧尼此定霸之基也。八曰三長六紀四大法集此別行正朔密行徵發也。九曰設樂以誘愚小俳優以招遠會陳佛土安樂斥王化危苦此變俗移風徵租稅也。十曰法席聚會邪謀變通稱意贈金毀破遭謗此呂尚之六韜祕策也。凡此十事不容有一萌兆微露即合誅夷今乃恣意流行排我王化方又擊鴻鐘於高臺期闕庭之箭漏挂幡蓋於長刹放充庭之鹵簿徵玉食以齋會雜王

公之享燕。唱高越之贊。唄象食。舉之登歌。嘆功德。則比陳詞之祝史。受餽施。則等束帛之等差。設威儀。則効旌旛之文物。凡諸舉措。竊擬朝儀。云陛下方更傾

儲供寺。萬乘擬附庸之儀。肅拜僧尼。三事執倍臣之禮。寵既隆矣。侮亦極矣。臣不取者四也。陛下以因果有必定之期。報應無遷延之業。故崇重像法。供施彌隆。勞民伐木。燒掘螻蟻。損傷和氣。豈顧大覺之慈悲乎。胡鬼堪能致福。可廢儒道。釋禿足能除禍。屏絕干戈。今乃重闢以備不虞。擊柝以爭空地。殺螻蟻而營功德。既乖釋典。崇妖邪而行諂祭。又虧名教。五尺牧豎。猶知不疑。四海之尊。義無二三。其德臣爲陛下不

取五也。秦政受誑於三山。漢徹見欺於五利。信順妖訕。一至於此。不察情僞。豈懲前失。

案下云道宣刪之云

宋

齊兩代重佛敬僧。國移廟改者。但是佛妖僧僞姦詐爲心。墮胎殺子。昏婬亂道。故使宋齊磨滅。今宋齊寺像見在。陛下承事。則宋齊之變。不言而顯矣。今僧尼坐夏。不殺蟠蟻者。愛含生之命也。而傲君父。妄仁於蠅蟲也。墮胎殺子。反養於蚊蟲也。夫易者。君臣。夫婦父子。三綱六紀也。今釋氏君不君。乃至子不子。綱紀紊亂矣。

云

上廢省佛僧表

唐傅 奕

臣奕言。臣聞羲農軒頃治合。李老之風。虞夏湯姬政。

符周孔之教雖可聖有先後道德不別君有沿革治
術尚同竊聞八十老父擊壤而歌十五少童鼓腹爲
樂耕皆讓畔路不拾遺孝子承家忠臣滿國然國君
有難則徇命以報讎父母有疴則終身以側侍豈非
曾參閔子之友庠序成林墨翟耿恭之儔相來羽翊
乃有守道含德無欲無求寵辱若驚職參朝位荆山
鼎上攀附昇龍緇氏壇邊相從駕鶴瑤池王母之使
具禮來朝碧海無夷之神周行謁帝所以然者當此
之時共遵李孔之教而無胡佛故也自漢明夜寢金
人入夢傅毅對詔辨曰胡神後漢中原未之有信魏
晉夷虜信者一分笮融託佛齋而起逆逃竄江東呂

光假征胡而叛君。峙立西土。降斯已後。妖胡滋盛。太半雜華。縉紳門裏。翻受禿丁邪戒。儒士學中。倒說妖胡浪語。曲類蛙歌。聽之喪本。臭同鮑肆。過者失香。兼復廣置伽藍。壯麗非一。勞役工匠。獨坐泥胡。撞華夏之洪鐘。集蕃僧之僞衆。動淳民之耳目。索營私之貨賄。女工羅綺。翦作淫祀之幡。巧匠金銀。散雕舍利之冢。杭梁麪米。橫設僧尼之會。香油蠟燭。枉照胡神之堂。剝削民財。割截國貯。朝廷貴臣。曾不一悟。良可痛哉。伏惟陛下。定天門之開闔。更新寶位。通萬物之屯否。再育黔黎。布李老無爲之風。而民自化。執孔丘愛敬之禮。而天下孝慈。且佛之經教。妄說罪福。軍民逃。

役剃髮隱中不事二親專行十惡歲月不除姦僞逾甚臣閱覽書契爰自庖犧至於漢高二十九代四百餘君但聞郊祀上帝官治民察未見寺堂銅像建社寧邦請胡佛邪教退還天竺凡是沙門放歸桑梓令逃課之黨普樂輸租避役之曹恒忻効力勿度小禿長揖國家自足忠臣宿衛宗廟則大唐廓定作造化之主百姓無事爲義皇之民臣奕誠惶誠恐謹上益國利民事十有一條如左謹言武德四年六月二十日

上五經正義表

唐長孫无忌

臣无忌等言臣聞混元初闢三極之道分焉醇德既

醻六籍之文著矣於是龜書浮於溫洛爰演九疇龍圖出於滎河以彰八卦故能範圍天地埏埴陰陽道濟四溟知周萬物所以七教八政垂燭戒於百王五始六虛貽徽範於千古詠歌明得失之跡雅頌表興廢之由實刑政之紀綱乃人倫之隱括昔雲官司契之后火紀建極之君雖步驟不同質文有異莫不開茲膠序樂以典墳敦稽古以宏風闡儒雅以立訓啓含靈之耳目贊神化之丹青姬孔發揮於前荀孟抑揚於後馬鄭迭進成均之望鬱興蕭戴同昇石渠之業愈峻歷夷險其教不隊經隆替其道彌尊斯乃邦家之基王化之本者也伏惟皇帝陛下得一繼明通

三撫運乘天地之正齊日月之暉敷四術而緯俗經邦蘊九德而辨方軌物御紫宸而訪道坐元扈以裁仁化被丹澤政洽幽陵三秀六穗之祥府无虛月集圓巢谷之瑞史不絕書照金鏡而泰階平運玉衡而景宿麗可謂鴻名軼於軒昊茂績冠於勲華而垂拱无爲遊心經典以爲聖教幽蹟妙理深元訓詁紛綸文疏踳駭先儒競生別見後進爭出異端未辨三豕之疑莫祛五日之惑故祭酒上護軍曲阜縣開國子孔穎達宏才碩學名振當時貞觀年中奉勅修撰雖加討覈尚有未周爰降絲綸更令刊定勅太尉揚州都督監修國史上柱國趙國公臣无忌司空上柱國

英國公臣勣尚書右僕射兼太子少師監修國史上
柱國燕國公臣志寧尚書右僕射兼太子少傅監修
國史上護軍曲阜縣開國公臣行成光祿大夫侍中
兼太子少保監修國史上護軍脩縣開國公臣季輔
光祿大夫吏部尚書監修國史上柱國河南郡開國
公臣褚遂良銀青光祿大夫守中書令監修國史上
騎都尉臣柳奭前諫議大夫宏文館學士臣谷那律
國子博士宏文館學士臣劉伯莊朝議大夫國子博
士臣王德韶朝散大夫行大學博士臣賈公彥朝散
大夫行大學博士宏文館直學士臣范義頤朝散大
夫行太常博士臣柳宣通直郎大學博士臣齊威宣
夫行太常博士臣柳宣通直郎大學博士臣齊威宣

德郎守國子助教臣史士宏宣德郎守大學博士臣孔志約右內準府長史宏文館直學士臣薛伯珍大學助教臣鄭祖元徵事郎守大學助教臣隨德素徵事郎守四門博士臣趙君贊承務郎守大學助教臣周元達承務郎守四門助教臣李元植儒林郎守四門助教臣王真儒等上稟宸旨傍摭羣書釋左氏之膏肓翦古文之煩亂探曲臺之奧趣索連山之元言囊括百家森羅萬有比之天象與七政而長懸方之地軸將五嶽而永久筆削已了繕寫如前臣等學謝伏恭業慙張禹雖罄庸淺懼乖典正謹以上聞伏增戰越謹言永徽四年二月二十四日太尉揚州都督

上柱國趙國公臣无忌等上

英華書拾補云此表文范
不載見明錢孫保

求赤影鈔宋本周易注備載於此宋本半葉九行每行十七字云云今案所謂五經正義皆不連經注之文北宋刊行尚然並無

疏名目直至南宋時始合併耳錢氏影鈔既云注疏爲南宋本可知唯合併之初此表猶存於周易首者正以及見北宋刊正義元書故也

請立贈太師孔宣公碑表

唐太子宏

臣聞周師東邁商閭延降軾之榮漢蹕西旋夷門致抱關之想況泣麟曾躅歌鳳遙芬被縟禮於昌辰飾殊榮於窮壤者伏惟皇帝陛下資靈繞極稟粹登樞乃聖乃神體陰陽而不宰無爲無事均雨露之莫和六符薦而泰階平百寶臻而天祚永靈臺所以偃伯延閭由其增絢尚齒尊賢邁鴻名於萬古興云繼絕

騰峻軌於千齡大矣哉茂實英聲固無得而稱矣日者封金岱畎會玉梁陰路指沂川塗經闕里迴鑾駐

罕

式

監堯禹之姿

闢纊凝旒

載想溫良之德

於是特

紓宸渙

贈以太師

爰命重臣

申其奠

饌廟堂卑陋

重

遣修營

褒聖侯

德倫子孫

咸蠲賦役

臣恩均扈從

述

濫撫軍

舊烈遺塵躬陪瞻眺

雩壇相圃

欣覩前聞

又

昔歲承恩齒胄膠塾

歷觀軒屏

具到或列門徒

想仁

學於顏曾

彌深景慕

探風猷於竹帛

冀啓顥蒙

所以

輕敢陳聞

庶加褒贈

天慈下濟

無隔異時

咸登師保

式光泉夜

敢以前恩

重茲干請

竊謂宣尼之廟

重闢

規摹桂奠蘭羞

永傳終古

崇班峻禮

式貴幽埏

而翠

玷莫題言猷靡暢。詢諸故實有所未周。且將聖自天。
惟幾應物拯人倫於已墜。甄禮樂於既傾。祖述勛華。
三千勵其鑽仰。憲章文武。億兆遵其藏用。豈可使汾
川遺碣。獨擅於無慙。峴岫餘文。孤標於墮淚。伏見前
件孔廟營構畢功。峻業曾徽。事資刊勒。敢希鴻澤。令
樹一碑。徂遼海清夷。九作久_釋無徵發山東。豐稔時踰
恒歲。况鄒魯舊邦。儒教所起。刊勒之費。未足爲多。許
其子來不日便就。乞特矜照。遂此愚誠。臣識昧恒規。
言慙通理。塵黷聽覽。追增悚戰。

進玉石珮表

唐王 頗

臣頤言。國家虔奉道源。天下久安聖化。伏見能事必

舉善跡必旌臣所部湖城縣界有鑄鼎原是軒轅皇
帝鼎成上仙之所備詳史冊縣有昇仙宮寺具見圖
經獨此鼎原曾無表記微臣愚見是千古所遺歷代
因循以至今日只有鑄鼎原名莫知陳跡所在臣今
但於原最高處刻石表之當石直下更須穿地實
去月廿八日本縣令房朝靜縣鎮遏將常憲專知官
軍將杜晏等同於原上選地穿穿深四尺得玉石
珮是一穿時爲土工所損今作四段有懸珮孔
子二其日縣令所由等狀送到州臣送觀察使使牒
却令州司自進臣以此原合有碑記千古所無臣輒
云爲自疑妄動今穿得此珮伏喜不妄微臣測度恐

是黃帝上昇之時。從臣遺墜之物。臣檢算歷帝記。黃帝去今六千四百三十年。伏以天下有道。地不藏珍。今千尺荒原。一穿得寶。且是軒轅遺物。應見聖明之代。微臣不勝驚喜慶忭之至。其玉珮謹以函盛。差朝請郎行司兵參軍暢賞。隨表奉進。伏望頒示朝廷。宣付史館。臣顏無任誠惶誠恐頓首頓首謹言。貞元十七年二月十日。缺下。

疏奏

諫立趙皇后疏

漢王

仁

臣聞立后妃者。王教之大端。三綱之本理。治道所由廢興也。社稷所以存亡也。故夏之興也。以塗山。亡也。

以妹嬉殷之興也以有娀亡也以妲己周之興也以
文母亡也以褒姒夫三代安危後主所觀是以聖王
必審舉措察操行以計勝色者昌以色勝計者亡無
鹽宿瘤天下之醜女也齊二君以計勝色立爲后皆
以折衝安國今許后以罪廢遂事已往於是欲立后
妃宜得殊異於前上當奉宗廟下令萬民有所法則
河魲河鯉齊姜宋子詩人所高萬乘之主當持久長
非一切畢決目前者驪姬亂晉吳姬危趙夫媵妾非
天下之母爲翫弄可也昔姜后崇禮宣王中興樊姬
正言楚莊成霸願留思察小臣惓惓之心此疏漢書不載

諫尊寵董賢疏

漢王閔

臣聞王者立三公法三光立九卿以法天明君臣之義當得賢人易曰鼎折足覆公餗喻三公非其人也書曰元首明哉股肱良哉以法天地昔孝文皇帝幸鄧通不過中大夫孝武皇帝幸韓嫣賞賜而已皆不在大位公孫宏以布被修德擢備宰相巧言令色君子不貴昔成湯拔伊尹於鼎俎文王招呂尚於釣濱武丁顯傳說於版築桓公舉甯戚於擊角皆以立霸王之業騰茂績於無窮豈以利耳悅目爲得意哉今大司馬衛將軍高安侯董賢累世無功於漢朝又無肺腑之連復無名迹高行以矯世升擢數年列備鼎足典衛禁兵主歷天文無功封爵父子兄弟俱蒙拔

擢賞賜空竭帑藏萬民謗譁偶言道路誠不當天心
也昔褒神蛇變化爲人實生寢姦亂周國恐陛下有
過失之譏賢有小人不識進退之禍非所以建卓爾
垂法後世陛下采芻蕘賢負薪冀有益於毫釐此疏漢書

不載

上說苑奏

漢劉向

護左都水使者光祿大夫臣向言所校中書說苑雜
事及臣向書民間書誣校讎案此句當有脫誤其事類衆多
章句相溷或上下謬亂雖分別次序除去與新序復
重者其餘者當作皆淺薄不中義理別集以爲百家後
當作令以類相從一一條別篇目更以造新事十萬

言以上凡二十篇七百八十四章號曰新苑皆可觀
臣向昧死下當有謹上二字此文見宋本誠苑本未載張溥所輯劉向集亦無之

上管子奏

漢劉向

護左都水使者光祿大夫臣向言所校讎中管子書三百八十九篇太中大夫卜圭書二十七篇臣富參書四十一篇射聲校尉立書十一篇太史書九十六篇凡中外書五百六十四以校除復重四百八十四篇定著八十六篇殺青而書可繕寫也管子者潁上人也名夷吾號仲父少時嘗與鮑叔牙游鮑叔知其賢管子貧困常欺叔牙叔牙終善之鮑叔事齊公子小白管子事公子糾及小白立爲桓公子糾死管仲

囚鮑叔薦管仲。管仲旣任政於齊。齊桓公以霸。九合諸侯。一匡天下。管仲之謀也。故管仲曰。吾始困時。與鮑叔分財。多自予。鮑叔不以我爲貪。知吾貧也。嘗爲鮑叔謀事。而更窮困。鮑叔不以我爲愚。知吾有利。不利也。公子糾敗。召忽死之。吾幽囚受辱。鮑叔不以我爲無恥。知吾不羞小節。而恥功名不顯於天下也。生我者父母。知我者鮑叔。鮑叔旣進管仲。而已下之。子孫世祿於齊。有封邑者十餘世。常爲名大夫。管子旣相。以區區之齊。在海濱。通貨積財。富國強兵。與俗同好醜。故其書稱曰。倉廩實而知禮節。衣食足而知榮辱。上服度則六親固。四維不張。國乃滅云。下令猶

流水之原令順人心故論卑而易行俗所欲因予之俗所否因去之其爲政也善因禍爲福轉敗爲功貴輕重慎權衡桓公怒少姬南襲蔡管仲因伐楚責包茅不入貢於周室桓公北征山戎管仲因而令燕修召公之政柯之會桓公背曹沫之盟管仲因而信之諸侯歸之管仲聘於周不敢受上卿之命以讓高國是時諸侯爲管仲城穀以爲之采邑春秋書之褒賢也管仲富擬公室有三歸反坫齊人不以爲侈管子卒齊國遵其政常強於諸侯孔子曰微管仲吾其被髮左衽矣太史公曰余讀管氏牧民山高乘馬輕重九府詳哉言之也又曰將順其美匡救其惡故上下

能相親愛。豈管仲之謂乎。九府書民閒無有。山高一
名形勢。凡管子書。務富國安民道約言要。可以曉合
經義。向謹第錄。此文張溥所輯。劉向集未載。故錄之。

校上山海經奏

漢劉歆

侍中奉車都尉光祿大夫臣秀領校祕書言。校祕書
太常屬臣望所校山海經。凡三十二篇。今定爲一十
八篇。已定山海經者。出於唐虞之際。昔洪水洋溢。漫
衍中國。民人失據。崎嶇於丘陵。巢於樹木。鯀旣無功
而帝堯使禹繼之。禹乘四載。隨山刊木。定高山大川。
蓋與伯夷主驅禽獸。命山川類草木。別水土。四嶽佐
之。以周四方。逮人跡之所希至。及舟輿之所罕到。內

別五方之山外分八方之海紀其珍寶奇物異方之所生水土草木禽獸昆蟲麟鳳之所止禎祥之所隱及四海之外絕域之國殊類之人禹別九州任土作貢而益等類物善惡著山海經皆聖賢之遺事古文之著明者也其事質明有信孝武皇帝時嘗有獻異鳥者食之百物所不冝食東方朔見之言其鳥名又言其所當食如朔言問朔何以知之即山海經所出也孝宣皇帝時擊磻石於上郡陷得石室其中有反縛盜械人時臣秀父向爲諫議大夫言此貳負殺寃也詔問何以知之亦以山海經對其文曰貳負殺寃竊帝乃梏之疏屬之山桎其右足反縛兩手上大驚

朝士由是多竒山海經者。文學大儒皆讀學以爲奇。
可以考禎祥變怪之物。見遠國異人之謠俗。故易曰。
言天下之至赜而不可亂也。博物之君子。其可不惑
焉。臣秀昧死謹上。此文張溥輯劉歆集所不載故錄之

請徙張步降兵疏

漢杜林

臣聞先王無二道。明聖用而治。見惡如農夫之務去
草焉。芟夷蘊崇之。絕其本根。勿使能殖。畏其易也。古
今通道傳其法於有漢。狼子野心。奔馬善驚。成王深
知其終卒之患。故以殷民六族分伯禽。七族分康叔。
懷姓九宗分唐叔。撫抑其姦宄。又遷其餘於成周。舊
地雜俗。旦夕拘錄。所以挫其強禦之力。誣其驕恣之

節也。及漢初興，上稽舊章，合符重規。徙齊諸田，楚昭屈景，燕趙韓魏之後，以稍弱六國強宗。邑里無營利之家，野澤無兼并之民，萬里之統，海內賴安。後輒因衰廢之痛，脅以送終之義，故相率而陪園陵，無反顧之心。追觀往法，政皆神道設教，強幹弱枝，本支百世之要也。是以皆永享康寧之福，無怵惕之憂。繼嗣承業，恭己而治，蓋此助也。其被災害民，輕薄無累重者，兩府遣吏護送饒穀之郡，或懼死亡，卒爲傭賃，亦足以消散其口。救贍全其性命也。昔魯隱有賢行，將致國於桓公，乃流連貪位，不能早退。況草創兵長，卒無德能，直以擾亂乘時，擅權作威，玉食狃快之意，徼幸

之望曼延無足張步之計是也小民負縣官不過身死負兵家滅門殄世陛下昭然獨見成敗之端或屬諸侯官府元元少得舉首仰視而尚遺脫二千石失制御之道令得復昌熾縱橫比年大雨水潦暴長涌泉盈溢災壞城郭官寺吏民廬舍潰徒離處遺成坑坎臣聞水陰類也易卦地上有水比言性不相害故曰樂也而猥相毀墊淪失常敗百姓安居殆陰下相爲蠹賊有大小負勝不齊均不得其所侵陵之象也詩云畏天之威于時保之惟陛下留神明察往來懼思天下幸甚

六宗祠奏

漢李邵

司空李邵

御覽無空李三字

祠侍祠南郊不見六宗祠奏曰

案尚書肆類于上帝禋于六宗六宗者上不及天下不及地傍不及四方在六合之中助陰陽化成萬物漢興於甘泉汾陰祭天地亦禋六宗至孝成之時匡衡奏立南北郊復祀六宗及王莽謂六宗易六子也至建武初洛陽制郊祀不道祭六宗由是廢不血食今宜復舊制度

制曰下公卿議五官將行宏等三十人議可祭大鴻臚龐雄等二十四人議不當祭上從公議

出李氏家傳太

平御覽五百二十
八引作李邵別傳

臣聞五經所以治學爲人。五經不修。世道陵遲。學校
不宏。則人名行不廣。故秦以坑儒而滅。漢以崇學而
興。所以罔羅天下。統理陰陽。彌綸治道。而視民軌則
也。光武中興。修繕太學。博士得具五人。五經各敍其
義。故能化澤沾洽。天下和平。自頃以來。五經頗廢。後
進之士。趣於文俗。宿儒舊學。無與傳業。由是俗吏繁
熾。儒生寡少。其在京師。不務經學。競於人事。爭於貨
賄。太學之中。不聞談論之聲。從橫之下。不覩講說之
士。臣恐五經六藝。浸以陵遲。儒林學肆。於是廢失。所
以制御四夷者。以有道德仁義也。傳曰。王者之臣。其
實師也。言其道德可師也。今百官伐闥。皆以通經爲

名無一人能稱。孔子曰：無而爲有，虛而爲盈，難乎有
恒矣。自今官人宜令取經學者。公府孝廉皆應詔。則
人心專一。風化可淳也。在延平元年六月

請分郡疏

漢但望

謹按巴郡圖經境界南北四千東西五千周萬餘里。
屬縣十四鹽鐵五官各有丞史戶四十六萬四千七
百八十口百八十七萬五千五百三十五遠縣去郡
千二日至千五百里鄉亭去縣或三四百或及千里。
土界遐遠令尉不能窮詰姦凶時有賊發督郵追案
十日乃到賊已遠逃蹤跡滅絕罪錄逮捕證驗文書
詰訊即從春至冬不能究訖繩憲未加或遇德令是

以賊盜公行姦宄不絕榮等

案據江龍集案及隴西
在詣郡自訟中

太守馮舍上谷太守陳宏說往者至有刦閭中令楊

殷終津侯姜昊傷尉蘇鴻彭亭侯孫魯雍亭侯陳己

殷侯樂普又有女服賊千有餘人布散千里不即發

覺謀成乃誅其水陸覆害煞郡掾枳謝盛塞威張御

魚復令尹尋主簿胡直若此非一給吏休謁往還數

千閉囚須報或有彈劾動便歷年吏坐踰科恐失冬

節侵疑先死如當移傳不能待報輒自刑戮或長吏

忿怒冤枉弱民欲赴訴郡官每憚還往太守行桑農不

到四縣刺史行部不到十縣郡治江州時有溫風遙

縣客吏多有疾病地勢剛險案剛當作側見水經注皆重屋累

居數有火害。又不相容。結舫水居。五百餘家。承三江之會。案三水蠶注當作二夏水漲盛。壞散顛溺死者無數。而

江州以東。濱江山險。其人半楚姿。態敦重。墊江以西。土地平敞。精敏輕疾。上下殊俗。情性不同。敢欲分爲二郡。一治臨江。一治安漢。各有桑麻丹漆布帛魚池鹽鐵足相供給。兩近京師。榮等自欲義出財帛。造立府寺。不費縣官。得百姓懽心。孝武以來。亦分吳蜀諸郡。聖德廣被。民物滋繁。增置郡土。釋民之勞。誠聖主之盛業也。臣雖貪大郡。以自優暇。不忍小民顰顰蔽隔。謹具以聞。在永興二年三月甲午

上言復州牧刺史奏事

漢張

輔

臣聞王者法天災惑奏事太微故州牧刺史入奏事所以通下問知外事也數十年以來重其道歸煩擾故時止勿奏事今因以爲故事臣愚以爲刺史視事滿歲可令奏事如舊典問州中風俗所好惡過道事所聞見考課衆職下章所告及所自舉有意者賞異之其尤無狀逆詔書行罪法冀敕戒其餘令各敬慎所職於以衰滅貪邪便佞

上李壽封事

晉龔壯

臣聞陰德必有陽報故于公理獄高門待封伏惟獻皇帝寬仁厚惠宥罪甚衆靈德洪洽誕鍾陛下陛下天性忠篤受遺建節志齊周霍誠貫神明而志緒違

理顛覆顧命管蔡既興讒諛滋蔓大義滅親撥亂濟危上指星辰昭告天地歃血盟衆舉國稱藩天應人悅白魚登舟霆震助威烈風順義神誠允暢日月光明而論者未喻權時定制淫雨汜潰垂向百日禾稼傷損加之飢疫百姓愁望或者天以監示陛下又前日之舉止以救禍陛下至心本無大圖而今久不變天下之人誰復分明知陛下本心者哉且元宮之識難知而盟誓顧違一旦疆場有急內外騷動不可不深思長久之策永爲子孫之計也愚謂宜遵前盟誓結援吳會以親天子彼必崇重封國歷世雖降階一等永爲靈德宗廟相承福祉無窮君臣銘勲於上生

民寧息於下。通天下之高理。宏信慎之美義。垂拱南面。歌詩興禮。上與彭韋爭美。下與齊晉抗德。豈不休哉。論者或言。二州人附晉必榮。

案二州謂梁益

六郡人事之

不便。

案六郡

謂天水平武都陰平

昔豫州入蜀。荆楚人貴。公

謂梁益

孫述時流民康濟。及漢征蜀。殘民太半。鍾鄧之役。故

兵大掠。誰復別楚蜀者乎。論者或不達安固之基。惜其名位在昔諸侯。自有卿相司徒司空。宋魯皆然。及

漢藩王亦有丞相。今義歸彼。但當崇重。豈當減削。昔劉氏郡守令長。方仕州郡者。國亡主易故也。今日義舉。主榮臣賴。寧可同日而論也。論者又謂臣當爲法正。陛下覆臣如天。養臣如地。恣臣所安。至於名榮漢

晉不處臣復何爲當佯法正論者或言晉家必責質任及徵兵伐胡何以應之案晉不煩尺兵一國來附威卷四海廣地萬里何任之責胡之在北亦此之憂今平居有東北之虞縱令徵兵但援漢川猶差二門耳臣託附深重忘疲病之穢實感殊遇冀以微言少補明時常懼殞歿不寫愚心辜負恩顧謹進惶惶伏願罪戮

沙門致拜奏

宋孝武大明六年九月有司奏曰臣聞邃拱凝居非期宏峻拳跪盤伏豈止敬恭將以照張四維締制八寓故雖儒法支派名墨條分至於

崇親嚴上厥繇靡爽惟浮圖爲教過自龍阜反經提
傳訓遐事遠諫生鑒識恒俗稱難宗旨緬邈微言倫
隔拘文蔽道在末彌扇遂迺陵越典度偃倨尊戚失
隨方之眇迹迷襲化之淵義夫佛法以謙儉自拘忠
虔爲道不輕比丘逢人必拜目連桑門遇長則禮寧
有屈膝四輩而簡禮二親稽顙者臘而直骸萬乘者
哉故咸康創議元興載述而事屈偏黨道挫餘分今
鴻源遙洗羣流仰鏡萬山責寶百神聳職而畿輦之
內含弗臣之毗階席之間延抗禮之客懼非所以澄
一風範詳示景則者也臣等參議以爲沙門接見皆
當盡禮虔敬之容依其本制則朝徽有序乘方兼遂

矣。

進所試進士詩賦奏

唐高錯

臣錯昨日奉宣進旨令將進士所試詩賦進來者伏以陛下聰明文思天縱聖德今年詩賦題目出自宸衷體格雅麗意思遐遠諸生捧讀相賀自古未有倍用研精覃思磨礪繢譜其今年試詩賦比於去年又勝數等臣日夜考較敢不推公進士李肱霓裳羽衣曲詩一首最爲迥出便無其比詞韻既好人才俱美前場吟咏近三五十遍雖使何遜復生亦不能過兼是宗枝臣與狀頭第一人以獎其能次張棠詩一首亦絕好亞次李肱臣與第二人其次沈黃中琴瑟和

奏賦又似文選中雪月賦體格臣與第三人其次王
牧賦自立意緒言語不凡臣與第四人其次柳棠詩
賦興思敏速日中便成臣與第五人凡此五卷詩賦
擢其中科實所不愧其餘三十五人或獎舊文別錄
人材非止一途四面搜擇臣並與及第李肱舊文亦
好人物絕奇每視且他日必爲卿相宗枝之俊實爲
難得況屬籍之中讀書爲文者甚少伏望聖明俯留
宸覽李肱等五人詩賦若有不堪敢受欺天之罪如
或可採伺候聖心其李肱詩賦伏望陛下聖慈特加
獎飭宣示百寮以勸皇族修飭之道臣繆忝主司不
勝悽悽之誠其詩賦總爲一卷謹隨狀奉進以聞

對策 啓 橋 狀

建初元年舉賢良方正對策

漢魯丕

政莫先於從民之所欲除民之所惡先教後刑先近後遠君爲陽臣爲陰君子爲陽小人爲陰京師爲陽諸夏爲陰男爲陽女爲陰樂和爲陽憂苦爲陰各得其所則和調精誠之所發無不感浹吏多不良在於賤德而貴功欲速莫能修長久之道古者貢士得其人者有慶不得其人者有讓是以舉者務力行選舉不實咎在刺史二千石書曰天工人其代之觀人之道幼則觀其孝順而好學長則觀其慈愛而能教設難以觀其謀煩事以觀其治窮則觀其所守達則觀

其所施此所以核之也。民多貧困者急急則致寒寒
則萬物多不成去本就末奢所致也。制度明則民用
足刑罰不中則於名不正正名之道所以明上下之
稱班爵號之制定卿大夫之位也。獄訟不息在爭奪
之心不絕法者民之儀表也。法正則民憲吏民凋弊
所從久矣。不求其本浸以益甚。吏政多欲速又州官
秩卑而任重競爲小功以求進取生凋弊之俗救弊
莫若忠故孔子曰孝慈則忠治姦詭之道必明慎刑
罰孔子曰導之以禮樂而民和睦說以犯難民忘其
死死且忘之況使爲禮義乎。

陽嘉二年京師地震對策

漢馬融

臣聞立天之道曰陰與陽立地之道曰柔與剛夫陰
陽剛柔天地所以立也取仁於陽資義於陰柔以施
德剛以行刑各順時月以厚羣生帝王之法天地設
位四時代序王者奉順則風雨時至嘉禾鱗植天失
其度則咎徵並至饑饉薦臻今科條品制禁令所以
承天順民者備矣悉矣不可加矣然而不平之效猶
有咨嗟之怨者百姓屢聞恩澤之聲而未見惠和之
實也今從政者變忽法度以殺戮威刑爲能賢問其
國守相及令長何如其稱之也曰大急其毀之也曰
大緩夫急致寒緩致燠二者罪同而論者許急此陰
陽所以不和也復之之道審察緩急之謗譽鈞同寒

燠之罪罰以崇王政則陰陽和也好惡既明則宰官之吏知所避就又正身以先之嚴以蒞之不變則刑罰之夫知爲善之必利爲惡之必害孰能不化則官良矣臣聞洪範八政以食爲首周禮九職以農爲本民失耕桑飢寒并至盜賊之原所由起也古之足民仰足以養父母俯足以畜妻子然後敦五教宣三德則休嘉之化可致也夫足者非能家給而人足量其財用爲其制度故嫁娶之禮儉則昏姻以時矣喪制之禮約則終者掩藏矣不奪其時則農夫不失矣夫妻子以累其心產業以重其志舍此而爲非者雖有必不多矣今則不然此盜賊所以不息誠使制度必

行禁令必止。則士者不濫法式之外。百工不作無用之器。商賈不通。難得之貨農夫不失三時之務。各安所業。則盜賊消除。災害不起矣。右文張溥所輯
馬融集未載

陽嘉二年京師地震對策

漢張衡

臣聞政善則休祥降。政惡則咎徵見。苟非聖人。或有失誤。昔成王疑周公。而大風拔樹木。開金縢而反風至。天人之應速於影響。故周詩曰。無曰高高在上。日監在茲。閒者京都地震。雷電赫怒。夫動靜無常。變改正道。則有奔雷土裂之異。自初舉孝廉迄今二百歲矣。皆先孝行。行有餘力。始及文法。辛卯詔以能宣章句奏案爲限。雖有至孝。猶不應科。此棄本而就末。曾

子長於孝然實魯鈍文學不若游夏政事不若冉季今欲使一人兼之苟外可觀內必有闕則違選舉孝廉之制矣且郡國守相割符寧境爲大臣一旦免黜十有餘人吏民罷於送迎之役新故交際公私放濫或臨政涖民爲百姓取便而以小過免之是爲奪人父母使簷號也又察選舉一任三府臺閣祕密振暴於外貨賄多行人事流通令眞僞渾淆昏亂清朝此爲下陵上替分威共德災異之興不亦宜乎易不遠復論不憚改朋友交接且不宿過況於帝王承天理物以天下爲公者乎中閒以來妖星見於上震烈著於下天誠詳矣可爲寒心明者消禍於未萌今旣見

矣修政恐懼則轉禍爲福矣

右文張溥所輯
張衡集未載

延熹八年日蝕對策

漢劉淑

臣聞立天之道曰陰與陽立人之道曰仁與義故夫婦正則父子親父子親則君臣通君臣通則仁義立仁義立則陰陽和而風雨時矣夫吉凶在人水旱由政故勢在臣下則地震坤裂下情不通則日月失明百姓怨恨則水旱暴興主人驕淫則澤不下流由此觀之君其綱也臣其紀也綱紀正則萬目張君臣正則萬國理故能父慈子孝夫信婦貞兄愛弟順如此則陰陽和風雨時萬物得所矣

臣僧虔啓。劉伯寵陶瑾稱勅二岸雜事悉委臣判聖恩罔已。獎使入效斯實。臣下驅馳至願。且職事所司不應多陳。雖奉令旨。臣豈敢於外下意。不先上聞。正當罄率管見。令官長啓審可否之宜。會須恩裁。此乃更亂天聽。或致煩壅。且得仍舊。以待能者。恐於事體二三。惟允。伏願少留神照。察覽所啓。非敢辭務。懼塵聖化。謹冒輸請。伏追震怍。謹啓。

賀導江成巨堰牋

五代杜光庭

伏覲導江縣令黃璟奏。六月二十六日江神移堰事。伏以大禹濬江。發洪源於龍冢。李冰創堰。分白浪於龜城。道彼靈津。資乎民用。而涸脰泛肩之誓表則有

常若懷山沃日之災崩騰難制立虞墊溺必害蒸黎
昨者夏潦渤海興狂波未息顧岷江之下瀨便逼帝都
當灌口之上游遽彰神力於是震霆葉地白雨通宵
驅陰兵而鼓譟連天簇靈炬而熒煌達曙迴山轉石
巨堰俄成浸涌頓減於京江奔蹙盡移於破路仰由
聖感仍假英威見天地之合符睹神明之致祐編於
簡冊冠彼古今叨奉獎私宏增抃躍

東南防守利便繳狀

宋呂祉

左朝奉郎直龍圖閣權發遣建康軍府主管江南東
路安撫司公事臣呂祉狀臣建炎三年夏待罪右正
言嘗建議謂當以建康爲根本淮甸爲藩籬連接沿

江措置庶幾可以立國紹興元年冬待罪湖南提刑
建議謂荆楚迺本朝上游宜於沿江措置使與吳會
接庶幾可以一統東南去年夏蒙恩除淮南宣撫使
司參議具奏辭免謂屯兵淮甸表裏雖一而上下不
接如人之一身四體不備楊公在荆楚乃膏肓瘡痍
他日恐資敵國宜急掃除宿兵以固上游之勢冬蒙
恩除知建康府赴內殿奏事又論今日之事謂當先
定其規摹先爲不可勝以待敵之可勝其說亦歸於
沿江上下表裏之勢前後論奏副本具存然臣已見
如是而已臣自到今任每與僚屬文學之士榷畧茲
事取漢魏以來方策所載山川險阻道里遠近軍馬

屯戍之地爭戰勝敗之事。袁集類次命本府通判吳若安撫司准備差遣陳克董其事作東南利害總論以襄陽江陵武昌九江皆建康上游也。上下之勢要在相接作江流上下論。北則合肥壽春盱眙廣陵皆其表也。表裏之勢又當如一作江淮表裏論今圖恢復必據要會以爲根本。建康實中興根本之地作建康根本論誠以駐蹕建康則沿江戍守不可不備城池不可不修宮室不可不營郊廟不可不立河渠不可不議故自六朝建都以來沿江戍守城池宮室郊廟河渠事跡悉以類舉南北之事盡此矣臣愚謂今爲吾南國之患者有三一曰金賊二曰僞齊三曰揚

公皆吾三敵也。臣近探到東北調兵俱向陝西。則窺吾四川矣。李成據襄陽陰遣人結楊公。則扼吾荆楚矣。宿亳修城順昌聚糧。近又城渦口。乃是曹公伐吳入淮路。此其計不淺。則又動搖吾淮甸矣。當四川者。吳玠關師古。當荆楚者王燮而已。至於淮甸。則未有當之者。雖有當之者。又不可恃。雖有可恃者。又左右無援。則是形勢閒斷。上下無備。表裏不一。其何以立國。臣請以三國之事驗之。魏有荀或。蜀有諸葛亮。吳有魯肅。皆一時之傑也。苟或說曹操。則曰先取河北。南臨荊州。諸葛亮說劉備。則曰跨有荊益。保乎險阻者。其意各在吞吳。故不得不窺荊州也。至孫權都江

左荊州乃其上游尤當力爭故魯肅說之曰荊州與國鄰接據而有之天下可定及曹操破荊州順江東下則遣周瑜逆擊劉備領荊州牧則命諸葛瑾從備求之而又躬擐甲冑與魯肅呂蒙陸遜輩數十年閒以死拒戰而荊州要地卒爲吳有魏不復南渡蜀不敢東下者以不失上流之勢也及吳之衰晉圖平之羊祜首建議謂必藉上流之勢若引梁益之兵水陸俱下荆楚之衆進臨江陵平南豫州直指夏口徐揚青兗並向秣陵是以一隅之吳當天下之衆其後王濬唐彬胡奮王戎輩并吞席卷順流長驥直造秣陵悉如祜策而吳遂亡然則荊州豈可失也一失荊州

江左難立矣臣又以周唐之事驗之南唐雖跨據江
左止能奄有淮甸每冬淮水淺涸常發兵戍守謂之
把淺吳廷紹以疆場無事坐費資糧悉罷之劉仁瞻
上表固爭不勝及周世宗圖淮甸諸將欲據險以邀
周歸師宋齊丘曰如此則怨益深不如縱之以德於
敵乃命諸將各自爲守毋得出擅出擊周師由是壽春
之圍益急自劉仁瞻失守之後周師乘勝水陸俱發
唐之君臣無以爲計相視悲泣始獻江北之地而江
左有齒寒之憂矣及我藝祖受禪再定淮甸江左之
勢愈孤雖於沿江繕城壘聚甲兵厚方物之貢以緩
師遣匈奴之使以求援竟無益於救敗而江南遂平


然則淮甸豈可失也。一失淮甸，江左難立矣。故爲朝廷之計，宜亟圖之。不可以遣使待報之故，因循廢日，以墮其計也。今時氣未振，難以議戰征。但當謹守封疆，以戒不虞。如沿江一帶，自襄陽、江陵、武昌、九江而下，淮南諸郡，如合肥、壽春、盱眙、廣陵等處，各屯兵馬，西與四川形勢接聯，使上下有備，表裏如一，庶幾可以抗衡進退，可以堅守。雖未翦除凶逆，混一寰區，而南北之勢成矣。自魏而下，定都江左，其間有志於中原者多矣。時有所未可，祇取禍敗者，非止一事。宋文帝元嘉中，欲經畧中原，羣臣爭獻計策，迎合取寵，獨沈慶之以爲不可。時文帝以謂虜所恃者，

惟馬今夏水浩汗河道流通汎舟北指磧礮必走滑臺小成易可覆拔克此二城館穀弔民虎牢洛陽自然不固比及冬初城守相接虜馬過河即成禽也初魏羣臣聞有宋師言於魏主請遣兵出魏主曰馬今未肥天時尚暑速出必無功若兵來不止且還陰山避之展至十月吾無憂矣王元謨圍滑臺初措盡乖繆衆心失望數月不下魏人潛遣人撫慰遂擁兵渡河衆號百萬鼙鼓之聲震動天地元謨始懼走而魏師長驅宋人肝膽塗地矣此往事可以爲輕舉之戒今僞齊不難平大梁不難復正恐禍根未除貽患在後耳兵家之勢先度彼已虜人深歸巢穴自河以北

所至留一二酋領雜契丹九州人鈐制吾之赤子其
強弱虛實不得知也而河之南付之僞齊使爲吾之
敵駐蹕臨安僻在海隅諸將重兵屯江左皆相去遠
矣以臣觀之必得其強弱虛實而後可圖必於沿江
一帶措置■■而移蹕向前然後可以係東南離散
之心慰西北來蘇之望振作士氣以待天命其舉事
也自非精銳之師直擣其心腹前者克勝後者相繼
一時過河使聲實兼舉則事未必濟而今日之勢似
有未可故翦除兇逆混一區宇臣謂其未能而南北
之事臣恐其當爲也臣聞事君之義犯而勿欺今北
路未夷國威未振中夜以思不寒而慄矧臣嘗蒙眷

擢列諫省。薦歷外臺。今又爲藩臣。誓思所以圖報事
係大體。無以踰此。故數不量力論之。所有吳若陳克
所著南北事跡。釐爲三帙。目之曰東南防守利便。謹
令繕寫。隨狀進呈。伏惟睿旨。俯垂省覽。如合聖意。乞
早賜施行。臣不勝昧死。謹錄奏聞。伏候勅旨。

續古文苑卷第六



續古文苑卷第七

賜進士及第授通奉大夫山東通省督糧道加三級孫星衍撰
議

南北郊冕服議

漢東平王蒼

孔子曰行夏之時乘殷之輅服周之冕爲漢制法高
皇帝始受命創業制長冠以入宗廟光武受命中興
建明堂立辟雍陛下以聖明奉遵以禮服龍袞祭五
帝禮缺樂崩久無祭天地冕服之制按尊事神祇絜
齊盛服敬之至也日月星辰山龍華藻天王袞冕十
有二旒以則天數旛有龍章日月以備其文今祭明
堂宗廟圓以法天方以則地服以華文象其物宜以

降神明肅雍備思博其類也。天地之禮冕冠裳衣宜如明堂之制。在永平二年正月

異姓爲後之子服本親議 漢吳商

或問以異姓爲後然當還服本親及其子當又從其父而服耶。將以異姓而不服也。答曰神不歆非族明非異姓所應祭也。雖世人無後並取異姓以自繼然本親之服骨血之恩無絕道也。異姓之義可同於女子出適還服本親皆降一等。至於其子應從服者亦當同於女子之子從於母而服其外親今出爲異姓作後其子亦當從於父服之也。案父下舊衍母字今刪父爲所生父母周子宜如外祖父母之加也。其昆弟父雖服

之大功案弟下舊衍子二字今刪於子尤無尊可加。及其姊妹父爲小功案父爲舊誤倒今改則子皆宜降於異姓之服。不得過總麻也。

魏尚書奏王侯在喪襲爵議

魏尚書奏以故漢獻帝嫡孫杜氏鄉侯劉康襲爵假授使者拜授康素服奪情議按周禮天子公卿諸侯吉服皆元冕朱裏元衣纁裳有喪凶則變之。麻冕黼裳邦君麻冕蟻裳云麻冕者則素冕麻不加采色。又變其裳亦非純吉亦不純凶漢氏承秦改六冕之制以元冠絳衣一服而已。有喪凶之事則變吉服以從簡易故諸王薨遣使者拜嗣子爲王則元冠纁絰服

素以承詔命事訖然後反喪服考之前典則差周書論之漢室則合常制

宗議

晉賀循

奉宗加於常禮平居即每事諮詢告凡告宗之例宗內祭祀嫁女娶妻死云子生行求改易名字皆告若宗子時祭則宗內男女畢會喪故亦如之若宗內吉凶之事宗子亦普率宗黨以赴役之若宗子時祭則告於同宗祭畢合族於宗之家男子女子以班宗子爲男主宗婦爲女主故云宗子雖七十無無主婦以當合族紀宗故也凡所告子生宗子皆書於宗籍大宗無後則支子以昭穆後之後宗立則宗道存而諸義

有主也立主義存而有一人不博者則會宗而議其
罰族不可以無統故立宗宗位既定則常尊歸之理
其親親者也是故義定於本自然不移名存於政而
不繼其人宗子之道也故爲宗子者雖在凡才猶當
佐之佑之而奉以爲主雖有高明之屬盛德之親父
兄之尊而不得干其任者所以全正統而一人之情
也若姦回淫亂行出軌道有殄宗廢祀之罪者然後
乃告諸宗廟而改立其次亦義之權也

荅庾亮問宗議

晉賀循

禮宗子之義所以明本祖之正統紀百代而不紊者
也而宗之義委曲著見者多在別子非卿大夫之文

偏不詳悉服之致疑有如來旨然舊義雖非別子起於是邦而爲大夫者便爲大宗其嫡繼之亦百代不遷禮記王制云大夫三廟一昭一穆與太祖之廟而三鄭君解曰太祖別子始爵者也雖非別子始爵者亦然此其義也此謂起於是國盛德特興爲一宗之始者也如此則百代不遷統族序親及族人服之皆宜如別子之宗也又宗子之服雖在絕屬皆齋縗三月代衰禮替敦之者少吳中畧無此服中土總而不卑或以非代封爲嫌也

出後者爲本父母服議

晉王

虞

喪服云爲人後者爲其父母期傳曰持重於大宗者降其小宗也

案舊說期傳三字今補

按經傳爲人後者固自降

其親也所以降其親者已受重於大宗必爲所後之

父服斬故也制其體例若受重於大宗而不爲所後

之父服斬則自非經所謂爲人後者之義也凡旣受

命出於人後而不爲所後之父制斬服固非禮也還

爲其親斬亦非禮也均其失寧居過重無居過輕故

失恩由義厭情爲禮是以五服之疎屬有相爲重者

矣天性之父子有相爲輕者矣屈伸進退有自來也

今奉義則不爲所後之父服崇恩復不成所生之喪

二者並闕未知其詳將何所居

案此正謂甲有子丙後乙甲死丙降服期

當時更自有子丙還本而乙死者也。且傳敘經意但爲既後大宗無二斬之道。非不斬之制也。談者不疑爲後而不爲所後制服爲非禮。乃謂反服其親爲傷教。斯蓋惑之大者也。若不服所後之父。復抑其反崇本恩。則是凡爲後之子可有不服三年之[■]也。愚謂爲後之子及所後服重。則宜如禮降其所生。若不及爲所後制服。則宜還爲其親服斬。案此追服謂差之義例。即之人心在可通矣。

孫曾爲後議

晉何琦

卿士之家。別宗無後。宗緒不可絕。若昆弟以孫若曾孫後之。理當然也。禮緣事而興。不應拘常以爲礙也。

魏之宗聖遠繼宣尼琦從父以孫級族祖荀顗無子以兄孫爲嗣此成比也

書奏記

遺蘇秦張儀書

周鬼谷先生

鬼谷先生不知何許人也隱居鬼谷山因以爲稱蘇秦張儀師之遂立功名先生遺書責之曰

若二君豈不見河邊之樹乎僕御執其枝波浪盪其根上無徑尺之陰身被數千之痕太平御覽五百二十一引此二句

木豈與天地有仇怨所居然也子不見嵩岱之松柏華霍之檀桐乎上枝干於青雲下根通於三泉千秋萬歲不受斧斤之患此木豈於天地有骨肉哉蓋所

居然也。

出袁淑真隱傳案杜光庭錄異記取此而增添首尾且有更改殊不可據今不錄

與傅麴武書

周燕太子丹

丹不肖。生於僻陋之國。長於不毛之地。未嘗得覩君子雅訓。達人之道也。然鄙意欲有所陳。幸傳垂覽之。丹聞丈夫所恥。恥受辱以生於世也。貞女所羞。羞見劫以虧其節也。故有刎喉不顧。據鼎不避者。斯豈樂死而忘生哉。其心有所守也。今秦王反戾天常。虎狼其行。遇丹無禮。爲諸侯最。丹每念之。痛入骨髓。計燕國之衆。不能敵之。曠年相守。力固不足。欲收天下之勇士。集海內之英雄。破國空藏。以奉養之。重幣甘辭。以市於秦。秦貪我賂。而信我辭。則一劒之任。可當百

萬之師須臾之間可解丹萬世之恥若其不然令丹生無面目於天下死懷恨於九泉必令諸侯無以爲歎易水之北未知誰有此蓋亦子大夫之恥也謹遣書願熟思之

報燕太子書

周麴 武

臣聞快於意者虧於行甘於心者傷於性今太子欲滅涓涓之恥除久久之恨此實臣所當麋軀碎首而不避也私以爲智者不冀僥倖以要功明者不苟從志以順心事必成然後舉身必安而後行故發無失舉之尤動無蹉跌之媿也太子貴匹夫之勇信一劍之任而欲望功臣以爲疏臣願合從於楚并勢於趙

連衡於韓魏然後圖秦秦可破也且韓魏與秦外親內疏若有倡兵楚乃來應韓魏必從其勢可見令臣計從太子之恥除愚鄙之累解矣太子慮之

與摯伯陵書

漢司馬遷

摯峻字伯陵京兆長安人也少治清節與太史令司馬遷交好峻獨退修身德隱於阡山遷旣親貴乃以書勸峻進曰

遷聞君子所貴乎道者三太上立德其次立言其次立功伏唯伯陵材能絕人高上其志以善厥身冰清玉潔不以細行荷累其名固已貴矣然未盡太上之所由也願先生少致意焉

報太史公司馬遷書

漢摯峻

峻聞古之君子，料能而行，度德而處，故悔悵去於身。利不可以虛受，名不可以苟得。漢興以來，帝王之道，於斯始顯。能者見利，不肖者自屏，亦其時也。周易大君有命，小人勿用。徒欲偃仰從容，以送餘齒耳。

與蘇武書

漢李陵

子卿，名聲冠於圖籍，分義光於二國，形影表於丹青。爵祿傳於王室，家獲無窮之寵。永明白於千載，夫行志志立，求仁得仁，雖遭困厄，死而後已，將何恨哉？陵前徒步卒五千，深入匈奴右地三千餘里，雖身降名辱，下計其功，豈不足以免老母之命耶？嗟乎！子卿世

事謬矣。功者福主。今爲禍先。忠者義本。今爲重患。是以彭蠡赴流。屈原沈身。子欲居九夷。此不由感怨之志耶。行矣子卿。恩若一體。分爲二朝。悠悠永絕。何可爲思。人殊俗異。死生斷絕。何由復達。

文選注四十
引李陵前與蘇

子卿書云陵前爲子卿不死之計所必然者冀其驅醜上報厚恩下顯祖考之明也又云陵當謂單于畜兵養士循先將軍之令將飲馬河洛收珠南海皆不在在詔書責臣不進臣輒引師前到浚稽山五將失道○

此篇中又引陵集表云臣以天漢二年到塞外尋被詔書及蘇武書曰男兒生不成名云云即文選後別傳曰陵與蘇武書曰陵重報書已見文選據御覽四百八十九引李陵○

是知此書及蘇武報書俱出李陵別傳○

後人所載是知此書及蘇武報書俱出李陵別傳○

疑爲齊梁人僞作真贊說也

曩以人乏之案泛舊說奉使方外至使遐夷作逆封豕
造悖豺狼出爪摧辱王命身幽於無人之處跡戢於
胡塞之地軟朝露以爲飲茹田鼠以爲糧窮目極望
不見所識側耳遠聽不聞人聲當此之時生不足甘
死不足惡所以忍困强存徒念忠義雖誘僕以隆爵
厚寵萬金之利不以滑其慮也迫以白刃在頸鐵鎖
在喉不以動其心也何則志定於不回期誓於沒命
幸賴聖明遠垂拯贖得使入湯之禽復假羽毛則斷
之足復蒙連續每念足下才爲世英文選注四十器
爲時出語曰夜行被繡不足爲榮況於家室孤滅棄
在絕域衣則異制食味不均棄捐功名雖尚視息與

亡無異。向使君服節死難，書功竹帛，傳名千代，茅土之封永在不朽，不亦休哉？嗟乎！李卿事已去矣，失之毫釐，差之千里，將復何言？所貺重遺，義當順承；本爲一體，今爲異俗。余歸漢室，子留彼國，臣無境外之交，故不當受乖離邈矣。相見末期，國別俗殊，死生隔絕，代馬越鳥，能不依依謹奉答報，并還所贈。

見藝文類聚又北堂書鈔一百十七引蘇武答李陵書云當子鍊氣深入也。太平御覽九十九引蘇武與李陵書曰乘雲附景不足擬其迅景不足以譬速晨光失羣不足以喻疾。豈可因歸鴈以運糧託景風以餉軍哉？文選注五十二引蘇武答李陵書曰其於學人皆如鳳如龍，皆不在此篇中。

誠兄子書

漢張

奐

汝曹薄祜，早失賢父。財單勢盡，今適喘息，聞仲祉輕

傲耆老，侮狎同年。極口恣意，當崇長幼，以禮自持。間
燉煌有人來，同聲相道。皆稱叔時寬仁，聞之喜而且
悲。喜叔時得美稱，悲汝得惡論。經言孔於鄉黨，恂恂
如也。恂恂者，恭謙之貌也。經難知，且自以汝資父爲
師。汝父寧輕鄉里耶？年少多失，改之爲貴。蘧伯玉年
五十，見四十九年非。但能改之，不可不思吾言。不自
克責，反云張甲謗我，李乙怨我。我無是過，爾亦已矣。

與弟固書

漢李固

固今年五十七，鬚髮已白。所爲容身而遊，滿腹而去。
周觀天下，獨未見益州耳。昔嚴夫子嘗言：經有五涉，
其四州有九遊，其八欲類此子矣。

荅友勸仕進者

漢郭泰

吾盡察人事。夜看乾象。天之所廢。不可支也。方今運在明夷之爻。值勿用之位。蓋盤桓潛居之時。非在天利見之會也。雖在原陸。猶恐滄海橫流。吾其魚也。況可冒衝風而乘奔波乎。未若巖岫頤神。娛心彭老。優哉游哉。聊以卒歲。後漢書本傳
止有首四句

爲緜氏女玉奏記外黃令

漢申屠蟠

伏聞大女緜玉。爲父報讐。獄已決。不勝感悼之情。敢陳所聞。昔太原周黨感春秋義。辭師復讐。當時論者。猶高其節。況玉女弱耳。無所聞。心無所激。內無同生之謀。外無交遊之助。直推父子之情。奮發怒之心。手

刀刺讐僵尸流血當時聞之人無勇怯莫不強膽增氣輕身殉義攘袂高談稱羨今聞玉幽執牢檻罪名已定皆心低意沮悵恨長歎蟠雖愚昧以爲玉之節義歷代未有實足以感無恥之孤激忍辱之子假玉不值明時尚望追旌閭墓顯異後嗣況事在清聽不加八議哀矜之貸誠爲朝廷痛之

出杜預女記○藝文類聚三十三引

列女傳曰梁氏女玉爲父報仇吏執玉以告外黃令梁配欲論殺玉申屠蟠時年十五進諫云云配善其言乃爲減死論所載文不全○

案列女傳者皇甫謐列女傳也

奏記大將軍梁冀

漢朱穆

大將軍內有貴親之固外有功業之重誠不可復枉道散財以事左右近臣宦者選舉刑賞有于典制輒

率公卿詣朝堂案其罪咎則改節從訓猶影響也今
反越津逾序以大事小以明事闇從其過言隨其失
行天下之事受其枉戾傷損財物壞亂綱紀左右近
官並以私情干擾天下雖大而民無所容足也餘尚
可忍官位之事尤不可私毒害流布日夜廣遠願大
將軍省廢他事十刻之間考案古今官民之極度數
作趣較然可見如不早悟舟中之人皆敵國也若以
穆輕愚不信其言可呼所親識古今者請徵核其實
不可不誠懼有後恨

詣巴郡太守自訟

孝桓帝以并州刺史泰山但望隸廣禦但字伯闔爲

巴郡太守勸恤民隱郡文學掾宕渠趙芬掾宏農馮尤塾江龔榮王祈李溫臨江嚴就胡良文愷安漢陳禧閬中黃閻江州母成陽譽喬就張紹牟存平直等。詣望自訟曰。

郡境廣遠千里給吏兼將人從冬往夏還夏單冬複惟踰時之役懷怨曠之思其昏喪吉凶不得相見解緩補綻下至薪菜之物無不躬買於市富者財得自供貧者無以自久是以清儉天枉不聞加以水陸艱難山有猛獸思迫期會隕身江河投死虎口咨嗟之歎歷世所苦天之應感乃遭明府欲爲更新童兒匹婦懽喜相賀將去遠就近釋危蒙安縣無數十民無

遠邇恩加未生澤及來世巍巍之功勒於金石乞以
文書付計掾史人鬼同符必獲嘉報芬等幸甚

與府君書

漢張芝

八月九日芝白府君足下不日秋涼平善廣闊彌邁
想思無違前比得書不遂西行望遠懸想何日不懃
捐棄漂沒不當行李又去春送舉喪到美陽須待伴
比故遂蘭絕有緣復相聞養食自愛張芝幸甚幸甚

誠子書

晉羊祜

吾少受先君之教能言之年便召以典文年九歲便
誨以詩書然尚猶無鄉人之稱無清異之名今之職
位謬恩之加耳非吾力所能致也吾不如先君遠矣

汝等復不如吾。諮度宏偉。恐汝兄弟未之能也。竒異
獨達察汝等將無分也。恭爲德首。慎爲行基。願汝等
言則忠信。行則篤敬。無口許人以財。無傳不經之語。
聞聽毀譽之語。聞人之過耳。可得受口。不得宣思而
後動。若言行無信。身受大謗。自入刑論。豈復惜汝恥
及祖考。思乃父言。纂乃父教。各諷誦之。葉晉書本傳
祐無子兄發

長子倫次暨次伊篇此書云汝等又云汝
兄弟當題誠兄子也藝文類聚脫兄字耳

與揚州刺史周俊書

晉蔡洪

一日侍坐。言及吳士。詢於芻蕘。遂見下問。造次承顏。
載辭不舉。勅令條列名狀。退輒思之。今稱疏所知。吳
展字士季。下邳人。忠足矯非。清足厲俗。信可結神才。

堪幹世。仕吳爲廣州刺史。吳郡太守。吳平還下邳。閉門自守。不交賓客。誠聖王之老成明時之儔乂也。朱誕字永長。吳郡人。體履清和。黃中通理。吳朝舉賢良。累遷議郎。今歸在家。誠理物之至德。清選之高望也。嚴隱字仲弼。吳郡人。稟氣清純。思度淵偉。吳朝舉賢良。宛陵令。吳平去職。九臯之鳴鶴。空谷之白駒也。張暢字威伯。吳郡人。稟性堅明。志行清朗。居磨涅之中。無淄磷之損。歲寒松柏。幽夜之逸光也。出洪集劉孝云梁士十六人但所引止此案隋書經籍志一卷錄一卷云。

與皇甫謐書

晉辛曠

夫三光懸象。式揚天德。岳瀆山澤。廣開地道。賢人顯

進實興聖治故風力佐黃

案力上風字今補

而涿鹿之征

舊說

而涿鹿之征

捷舜禹翼唐而滔天之災殄阿衡在商而成湯之功著姜望入周而文武之業建聖人光濟四海欲垂大化者莫不收才取良而致股肱忠賢大才之人願立名迹思在利見大人而主聖時治此所以應天順民之神龜利涉大川之元吉大晉合天地之中和經日月之重光四目視其明四聰達其聽巖穴出其隱四門啓其矇登高陽之八子御高辛之羣龍俊乂在官時亮天工鳥獸非君子之儔九臯無長鳴之鶴萬國黎獻咸仰南風之仁而挹聖化之隆此其至治也而先生固執冲虛塞淵其心殉文人之耿介忘宣尼之

所沾步幽山之窮徑背漢津之明衢日月遂往時不
我須此惜寸陰者之所以爲懼而臨川者之所以懷
慨也竊謂先生降匪石於高岡迴羽儀於皇京順震
驚而翔撫奮六翮於天庭邈禹稷之遐蹤騁大往之
夷塗招不出之洪勲同先哲之丕模使瞻仰者所以
知藉美也案知藉舊誤
之今改希昔人六義之一獻斯一篇
惟蒙采覽

又與皇甫謐書

晉辛曠

伏惟先生黃中通理經綸稽古既好斯文述而不作
將邁卜商於洙泗之上超董生於儒林之首含光烈
於千載之前吐英聲於萬世之後亦以盛矣曠以不

敏感佩厚惠願附驥尾撫塵而遊諮詢覩末因而西望

延企

荅辛曠書

晉皇甫謐

聞服有素委心無量加昔州壤通門舊義虛想之積
過於陵阜汎愛不遺猥降德音清喻爛煥情義欵篤
執誨欣然若饗太牢挹佩至眷銘乎心膂且箕山之
叟超迹於堯帝之世首陽之老抗操於有周之隆故
能名奮百代使聞之厲節皆經聖明之論所以邈世
卓時者也至於鄙薄才頑行穢疾奪其志神迷其心
因託虛靜遂竊美選聖上仁聰亮其辛苦每自陳訴
輒見寬放雖大君有命實小人勿用也匪敢盤桓疾

與榮競巾車順命。非劣憊所堪也。密雲雖興。知枯木難植。昔人有言。欲之必爲之辭。豈來惠之謂矣。猥承告示。欲備七十。木非梧桐。豈敢棲鳳。聞命悚灼。如蹈春冰。非苟崇謙。實懼陷墜。幸恕不假。明亮志心。

荅趙景真書

晉嵇 蕃

登山遠望。觀嶧崿以成憤。策杖廣澤。瞻長波以增悲。遊眄春圃。情有秋林之悴。濯足夏流。心懷冬冰之慘。對榮宴而不樂。臨清觴而無歡。今足下琬琰之樸。未剖而求光。時之價駢驥之足。未攄而希絕景之功。心銳而動淺。望速而應遲。故有企佇之懷爾。夫處靜不悶。古人所貴。窮而不濫。君子之美。故顏生居陋。不改

其樂孔父困陳弦歌不廢幸吾子思宏遠理舍道自
榮將與足下交伯成於窮野結箕山乎蓬屋侶范生
於海濱儔黃綺於商岳憑輕雲以絕馳遊曠蕩以自
足雖不齊足下之所樂亦吾心之所願也

案景真與嵇書載文

選嵇字茂齊景真趙

月儀

晉索靖

正月具書君白太族布氣景風微發順變綏寧無恙
幸甚隔限遐塗莫因良話引領託懷情過採葛企佇
難將故及表問信李塵塵俱蒙告音君白

君白四表清通俊乂濯景山無由皓之隱朝有二八
之盛斯誠明珠耀光之高會鸞皇翻翥之良秋也吾

子懷英偉之才而遇清升之祚想已天飛奮翼紫闈使親者有邇契也君白

二月具書君白俠鍾應氣融風扇物遙願高宇及時讚宜山川悠遠限以成隔自我不見俛仰■年看塗馳思言存所親裁及告懷悵焉不具君白

君白王路熙和皇化洋溢博採英儒以恢時佐輦無叩角之怨門有縉紳之盛斯乃潛龍逢九五之運寶玉值卞氏之明已委蓬室之陋以安金紫之榮使親契有拂冠之慶也君白

三月具書君白姑洗育物磬無不宜延想吾子隨運是康機度推流不面踰紀分逼長塗■因良展馳心

投情庶能感應

書修問，因然不具。君白。

君白洪化遐布率土咸寧秉十壯之勇者匿武而精道抱管鮑之才者彈冠而待顯怪以高之姿而懷迷時之志違明明之求蹈不識之闇機運稍移人生若寄願速龍躍耀於雲漢也君白

七月具書君白夷則布氣暑運西流遙想足下動靜順宜川塗悠遠乖我談宴心存明瑰精爽馳想登高長佇涕以隕之不勝勞歎裁及書問君白

君白及子少舊契闊在昔情款好合如彼琴瑟何尚離別歷載十餘年往天地之悠長人生之險絕悼言多感悵然傷懷唯足下寶德育

素以熙萬福。此故舊君白。

八月具書君白。南呂應化中秋告涼。敬想令問福履多宜。山川緬邈。信理希寡。談面旣闊。音問又疎。傾首延懷。無日不勞。想篤分好。不孤。亦見信憶舊裁。因數字。行人彭彭。俱數相聞君白。

君白。世清道治。聖化光洽。明於博採。唯賢是務。足下以神龍之賈。應景風之求。足陟天閣。而德聞四海。允彼具瞻。副此羣望。竊從草澤。慷慨增願君白。

九月具書君白。無射改卦。廣莫布氣。氣度涼和。宜時順節。路乖人隔。邈若天踰。翹首延思。遠莫致之君子。篤好想齊。往分不勝。佇企欽渴之懷。故遣表問。不能

暢情君白

君白昔忝同門濫攀君子子以逸羣之才當貫三千之首登堂入室研道之奧雖明闇殊品每亦希顏至以乖隔孤陋遐外曠道離友益以牆面無因之積以

書所散君白

汝帖文多殊異此條

十月具書君白應鍾導運嚴霜稍隆時變物移感候增懷心投繫想言存所親山川路限不能飜飛登彼崇丘逍遙長望延佇莫及思積情疲不勝鬱陶眷然之感裁復白書不悉君白

君白往春執手就會來秋迎望待面慊然遲想知以逸驥之迹騁於雲漢之路龍驤天府忘此反信飛沈

壹殊何緣言嬿厚爲時節寶愛光儀君白

十一月具書君白黃鍾吐氣猛寒零降溫室重裘和
氣表神休宜幸甚歲月飛馳逝不我待闋別後始忽然踰載望塗延思精誠所感無物不應百來況德音彌滿耽玩良翰悟侏素慰增慨不勝抱感裁因答具盡君白

君白昔誓秋歸而奄經半載匪我愆期時違來信之隆況旨沓密蚩以逸踰約以馳驚親愛分隔榮寧足下復跂望耶倉卒不具君白十二月具書君白大呂度末寒懷烈明德宜時夢想無恙分隔踰年良會乖違感詠蕭艾言存宿好翹

翹延領不勝思積裁及白書不能具悉君白
君白不尚壹別便成永隔瞻彼修路顧此乖限情經
運候思興感物■言存信涕以流墜足下類度同懷
信使知問君白

與支遁書

晉謝安

思君日積計辰傾遲知欲還剡自治甚以悵然人生
如寄耳頃風流得意之事殆爲都盡終日慙慙觸事
惆悵唯遲君來以晤言消之一日當千載耳此多山
縣案時爲吳興守閑靜差可養疾事不異剡而醫藥不同必
思此緣副其積想也

永和中與揚州刺史殷浩書

晉王彪之

太史上元日合朔談者或有疑應却會與否昔建元
元年亦元日合朔庚車騎寫劉孔才所論以示八座
於時朝議有謂孔才所論爲不得禮意荀令從之案
車騎冰也劉孔才是勝人之一失也何者禮云諸侯
旅見天子入門不得終禮而廢者四太廟火日蝕后
之喪雨沾服失容尋此四事之指自謂諸侯雖已入
門而卒暴有之則不得終禮非爲先存其事而僥倖
史官推術錯謬故不豫廢朝禮也夫三辰有災莫大
日蝕史官告謹曾無懼容不修豫防之禮而廢消救
之術方大饗華夷君臣相慶豈復是將處天災罪已
之謂且檢之事實合朔之儀至尊靜躬殿堂不聽政

事冕服御坐門闈之制與元會禮異自不得兼行則當權其事宜合朔之禮不輕於元會元會有可却之準合朔無可廢之義謂應依建元故事却元會太平御覽

二十
安晉元興

及永和三事而此書僅有數句故錄之

晉書禮志具載漢建

之

與釋道安書

晉習鑿齒

興寧三年四月五日鑿齒稽首和南承應真履正明白內融慈訓兼照道俗齊蔭宗虛者悟無常之旨存有者達外身之權清風藻於中夏鸞響厲乎八冥元味遠猷何榮如之弟子聞夫不終朝而雨六合者彌天之雲也宏淵源以潤八極者四大之流也彼直無爲降而萬物賴其澤此本無心行而高下蒙其潤況

哀世降步。愍時而生。資始繫於度物。明道存乎練俗。
乘不疾之輿。以涉無遠之道。命外身之駕。以應十方
之求。而可得玉潤於一山。冰結於一谷。望閻風而不
迴儀措。此世而不誨度者哉。且夫自大教東流。四百
餘年矣。雖蕃王居士。時有奉者。而真丹宿訓。先行上
世。道運時遷。俗未僉悟。藻悅濤波。下士而已。唯肅祖
明皇帝。實天降德。始欽斯道。手畫如來之容。口味三
昧之旨。戒行峻於巖隱。元祖暢乎無生。大塊既唱。萬
道業之隆。莫盛於今。豈所謂月光道寂。將生真土。靈
鉢東遷。忽驗於茲乎。又聞三千得道。俱見南陽明學。

開士陶演真言上考聖達之誨下測道行之驗深經
普往非斯而誰懷道邁訓舍茲孰降是以此方諸僧
咸有傾想目欣金色之瑞耳遲無上之箴老幼等願
道俗同懷繫詠之情非常言也若慶雲東徂摩尼迴
躍一躡七寶之座暫視明哲之燈雨甘露於豐草植
栴檀於江湄則如來之教復崇於今日元波逸響重
蕩濯於一代矣不勝延豫裁書致心意之蘊積曷云
能暢弟子襄陽習鑿齒稽首和南

與羅君章書

晉孫盛

省更生論括囊變化窮尋聚散思理既佳又指味辭
致亦快是好論也然吾意猶有同異以今萬物化爲

異形者不可勝數。應理不失。但隱顯有年載然。今萬化猶應多少。有還得形者無緣盡當。須冥遠耳目。不復開逐。然後乃復其本也。吾謂形既粉散。知亦如之。紛錯混淆。化爲異物。他物各失其舊。非復昔日。此有情者。所以悲歎。若然則足下未可孤以自慰也。

答孫安國書

晉羅含

獲書文畧旨辭理亦兼情雖欣清酬未喻乃懷區區不可請尋前本本亦不謂物都不化但化者各自得其所化頽者亦不失其舊體軌主陶是載混載判言然之至分而不可亂也如此豈徒一更而已哉將與無窮而長更矣終而復始其數歷然未能知今安能

知更蓋積悲忘言。諮詢所通。豈云唯慰聊以寄散而已矣。

與遠法師書

晉桓元

夫至道纏邈。佛理幽深。豈是悠悠常徒所能習求。沙門去棄六親之情。毀其形骸。口絕滋味。被褐帶索。山棲枕石。永乖世務。百代之中。庶或有一髫鬚之間。今世道士。雖外毀儀容。而心過俗人。所謂道俗之際。可謂學步邯鄲。匍匐而歸。先聖有言。未知生焉知死。而令一生之中。困苦形神。方求冥冥黃泉下福。皆是管見。未體大化。迷而知反。去道不遠。可不三思。運不居人。忽焉將老。可復追哉。聊贈至言。幸能納之。

與從弟孝徵書

晉 鈕滔母

省爾譏我以養鵠乃戒以衛懿滅斃之禍斯言惑矣
吾未之取彼衛懿之好民無後車之載鶴有乘軒之
飾禍敗之由由乎失所若乃開圃即於靈囿沃池矩
乎神沼文魚躍於白水素鳥翔乎神州豈非周文之
德大雅所修哉夫嘉肴旨酒非不美也夏禹盛以陶
豆殷紂貯以玉杯而此聖以興彼愚以滅蓋置之失
所而一本如其無失來難可施乎

案隋書經籍志梁有
晉松陽令鈕滔母孫

琅集二
卷云

與妹劉氏書

晉徐藻妻陳氏

伏見偉方所作先君誄其述詠勲德則仁風靡隊其

言情訴哀，則孝心以敘。自非挺生之才，孰能克隆聿修？若斯者乎？執誄反覆，觸言流淚，感賴交集，悲慰並至。元方偉方，並年少而有盛才。文辭富艷，冠於此世。竊不自量，有疑一言，畧陳所懷，庶備起予先君既體宏仁義，又動則聖檢，奉親極孝，事君盡忠，行己也恭養民也惠，可謂立德立功，示民軌儀者也。但道長祚短，時乏識真，榮位未登，高志不遂，本不標方外迹也。老莊者，絕聖棄智，渾齊萬物，等貴賤，忘哀樂，非經典所貴，非名教所取，何必輒引以爲喻耶？可共詳之。

與兄弟書

晉寡婦淑

蓋聞君子導人以德，矯俗以禮，是以列士有不移之

志貞女無迴二之行。淑雖婦人，竊慕殺身成義死而後已。夙構禍罰，喪其所天。男弱未冠，女幼未笄。是以餒俛求生，將欲長育二子。上奉祖宗之嗣，下繼祖禩之禮。然後覲於黃泉，永無慙色。仁兄德弟，既不能厲高節於弱志，發明明於闇昧。許我他人，逼我於上。乃命官人訟之，簡書夫智者不可惑以事，仁者不可脅以死。晏嬰不以白刃臨頸，改正直之辭。梁寡案舊字今
婦，不以毀形之痛忘執節之義。高山景行，豈不思齊。計兄弟備託學門，不能匡我以道，博我以文。雖曰旣學，吾謂之未也。出杜預

續古文苑卷第八

賜進士及第授通奉大夫山東通省督糧道加三級孫星衍撰

書下

爲竟陵王致書劉隱士

齊庾杲之

司徒竟陵王懋於神者言象所絕接乎事者遠近所宗鍾石非禮樂之本纓褐豈朝野之謂想間投之懷不以形骸爲阻一日通籍梁邸親奉語言夢想清顏爲歲已積以丈人非羔鴈所策故息蒲帛之典勝寄冥通諒有風期之遲君王卜居郊郭縈帶川阜顯不徇功晦不標迹從容人野之間以窮二者之致且宏護爲心廣敷貞俗思聞繫表共剖衆妙式筵山河虛

館川渙實望責然少酬側遲昔東平樂善旌君大於
東閣哲王愛素致吾子於西山豈不盛歟百齡飄驟
凝滯自物千載一期爲仁由己且陵雪戒途非滅跡
之効鴻鍾在御豈銷聲之道已標異人之迹固有同
物之勞豈山水無情應之以會愛閒在我觸地蕭條
衡嶽何親鍾山何薄想宏思有在不俟繁言

與蕭令王僕射書

爲袁彖求謚

齊虞義

袁侍中體高亮之宏姿挺孤奇之逸操孝友結於衡
閭忠正表於邦域懷抱七經該綜百氏清文麗目幾
義窮神言非義而不發容遵禮而後動居貧無悶事
等安期處顯不驚道均元歎兄弟親從同居共財怡

怡雍穆人所不閒顧與善無徵報施徒語岱山委岫
崑岳摧峯四海搢紳誰不掩泣明公德冠時宗道高
物表若得橫議聖時斟酌今古採茂實於當年標芳
流於千載馳徽謚於山道潤貞氣於泉門豈非體國
之至公典謨之盛軌者哉

案豫隆昌元年卒謚

南齊書本傳

荅從兄安成王書

梁蕭

案藝文類聚引在吳陸景與兄書下題云又荅
從兄安成王書考景爲遜之孫抗之次子不得
有從兄安成王必傳寫誤也詳安成王當爲梁
安州諸軍事荆秀天監元年封七年都督荆湘等九
州據梁代兼附著考定誰作其決非陸景可知今次
援據類書通例讀者其引申諸

奉告清言溢目眷逮周委炎光已盛願此勝宜仰承

發止。已次新林。引邁務殷。無妨怡賞。三湘奧區。九疑形勝。浮洲動浪。聞眠鷗之舊說。安流洞浦。憶採若之遺風。昔景伯出蕃。高風振古。叔英之部。清約見稱。兄政譽平宣。威和兼濟。加以夏石奇雲。秋江迥月。翰飛紙落。理豐辭富。賞末興餘。時希逮憶。睽離方遠。川塗修曠。炎涼方改。願加珍勗。綠字可傳。白雲終閒。心傷淚灑。投筆無宣。

與劉孝標書

梁劉之遴

間聞足下作類苑。括綜百家。馳騁千載。彌綸天地。纏絡萬品。撮道畧之英華。搜羣言之隱蹟。鉛摘既畢。殺青已就。義以類聚。事以羣分。述往之妙。揚班儕也。擅

此博物何快如之。雖復子野調聲，寄知音於後世。文信構覽，縣百金於當時，居然無以相尚。自非沈鬱澹雅之思，安能閉志經年，勒成若此。吾嘗聞爲之者勞觀之者逸，足下已勞於精力，宜令吾見異書。

與慧皎法師書

梁王曼穎

弟子孤子王曼穎頓首和南。一日蒙示所撰高僧傳，并使其掎摭力尋始竟。但見偉才紙弊墨渝，迄未能罷。若迺至法既被名德已興，年幾五百，時經六代。自摩騰法蘭發軫西域，安侯支識荷錫東都，雖跡標出沒行實，深淺咸作舟梁，大爲利益。固宜油素傳美鉛槧定辭，昭示後昆。揄揚往秀，而道安羅什，閒表秦書。

佛澄道進雜聞趙冊晉史見拾復局當時宋典所存頗因其會兼且攬出君台之記糅在元亮之說感應或所商榷幽明不無梗槩汎顯傍文未足光闡間有諸傳文非隱括景興偶採居山之人僧寶偏綴遊方之士法濟唯張高逸之例法安止命志節之科康泓專紀單開王季但稱高座僧瑜卓爾獨載元暢超然孤錄唯釋法進所造王巾有著意存該綜可擅一家然進名博而未廣巾體立而不就梁來作者亦有病諸僧祐成簡既同法濟之責孝秀染毫復獲景興之謂其唱公纂集最實近之求其鄙意更恨煩冗法師此製始所謂不刊之筆綿亘古今包括內外屬辭比

事不文不質。謂繁難省。云約豈加以高爲名。旣使弗逮者恥。開例成廣。足使有善者勸。同之二三諸子。前後撰述。豈得絜長量短。同年共日而語之哉。信門徒竟無一言可豫。市肆空設千金之賞。方入籠龍函上。登麟閣出內瓊笈。卷舒玉笥。弟子雖實不敏。少嘗好學。頃日延餘觸。途多昧。且獲披來帙。斯文在斯。鑽仰弗暇。討論何所。誠非子通見元則之論。良愧處道知休奕之書。徒深謝安慕竺曠風流。殷浩憚支遁才俊耳。不見旬日。窮情已勞。扶力此白。以代訴盡。弟子孤子王曼穎頓首。

爲王寬與婦義安主書

陳伏知道

昔魚嶺逢車芝田息駕。雖見妖姬終成揮忽。遂使家
勝陽臺爲歡。非夢人慙蕭史相偶成仙。輕扇初開欣
看笑靨長眉始畫愁對離粧。猶聞徙佩顧長廊之未
盡尚分行憶異迴陌之難迴。廣攝金屏莫令愁擁恒
開錦帳速望人歸。鏡臺新去應餘落粉。燼爐未徙定
有餘煙淚滴芳衾。錦花長濕愁隨玉軫。琴鶴恒驚已
覺錦水丹鱗素書稀遠玉山青鳥仙使難通綵筆試
操香牋遂滿行雲可託。夢想還勞九重千日。詎想倡
家單枕一宵便如蕩子當令照影雙來。一鶯羞鏡勿
使窺窗獨坐姮娥笑人。

貽仙城慧命禪師書

北齊戴達

竊以渭清涇濁共混朝宗之源松長箭短同秉堅貞
之質幸賴含靈五常理宜範圍三教是以闕里儒童
闡禮經於洙濟苦縣迦葉遷妙道於流沙雖牢籠二
儀蓋限茲一世豈如興正法於鹿苑蕩妄想於鷲山
半滿旣陳權實斯顯誠教有淺深人無内外禪師德
聲遠震行高物表攝受四依因牧羊而成誦負笈千
里歷龍宮而包括故能內貫九部總雪山之秘藏外
該七畧備璧水之典墳支遁天台之銘竺真羅浮之
記曇賦七嶺汰詠三河寶師妙折莊生璩公著論爰
集若吞雲夢如指諸掌加以妙持淨戒如護明珠善
執律儀譬臨懸鏡稟羅云之密行踵賓頭之福田撫

挹定水便登覺觀高蔭禪枝將逾喜捨是以不遠瀟
湘來儀迺陸植杖龍泉仍爲精舍迴車馬谷即創伽
藍鑿嶺安龕詎假聚沙成塔因山構苑無勞布金買
地開士雲會袂似華陰法侶朋衝衆齊稷下禪室晨
興時芳杜若支提暮啓暫入桃源香山梵響將阮嘯
而相發日殿妙音與孫琴而齊韻紫蓋貞松仍麾上
辯洪崖神井即瑩高心故以才堪買山德邁同輦崇
峯景行牆仞懸絕弟子業風鼓慮欲海沈形洎渚宮
淪覆將歷二紀晝倦坐馳夜悲愕夢未能忘懷彼我
歸軫一乘遣蕩曾襟朗開三達旣念鼠藤彌傷鳥繫
昔在志學家傳賜書五禮優柔三元饑飫頗絕韋編

構述餘緒爰登弱冠據摭百家及乎從仕留連文翰
雖未能探龍門而梯會稽賦鷁鷀而詠鸚鵡若求其
一介亦髡鬚古人但深悟聚泡情悲交臂常欲蟬蛻
俗解貪味真如一日鄖城訊修隗館屈膝情欣係鞬
遇同進履未盡開襟遽嗟飄忽尋望拂衣世網脫屣
牽絲滄浪濯纓漢陰抱甕行餐九轉用遣幽憂漸悟
三空將登苦忍仙梁觀玉不廢從師深澗折桃無妨
請益所希彌天勝氣乍酬鑿齒鴈門高論時荅嘉賓
冬暖如春願珍清軌室邇人遐彌軫襟帶餘辭殘簡
望回金玉道宣曰時或以達即晉朝譙國戴達今考據行事非也晉書云太元十二年徵隱士戴達不久尋卒至梁大通三年一百四十三載命公方生計不相見又非北齊明矣案此說良是今定爲

北齊不嫌與譙國
隱士同姓名也

上西嶽王書

唐李靖

布衣李靖不揆狂簡獻書西岳大王閣下。靖聞上清
下濁爰分天地之儀晝明夜昏乃著人神之道又聞
聰明政直依人而行至誠感神信不虛矣伏惟大王
差峩擅德肅爽凝威爲靈術制百神配位名雄四岳
是以摩像清廟作鎮金方遐規歷代哲王莫不順時
禋祀興雲致雨天實宜從轉孽爲祥何有不賴嗚呼
靖者一丈夫爾何得進不偶用退不獲安呼吸若窮
池之魚進退似失林之鳥憂傷之心不能已已社稷
凌遲宇宙傾覆奸雄競逐郡縣土崩遂欲建義橫行

雲飛電掃.斬鯨鯢而清海岳.卷氛祲以闢山河.使萬姓昭蘇.庶物昌運.即應天順時之作也.又大寶不可
以望據.欲杖劍竭節.未有飛龍在天.捧忠義之心.身
傾濟世.志吐肝膽於階下.惟神鑒之願占進退之機.
得遂平生之志.有賽德之時.終陳擊鼓若三問不對.
亦何神之有靈.然後即靖斬大王頭.焚其廟.建縱橫
之畧.亦未晚也.惟神裁之.

致少林寺書

唐武后

暑候將闌.炎序彌溽.山林靜寂.梵宇清虛.宴坐經行.
想當休念.弟子前隨鳳駕.過謁就巖.觀寶塔以徘徊.
覩先妃之淨業.薰修之所.猶未畢功.一見悲驚.萬感.

兼集攀光寶樹載深風樹之哀弔影珠泉更積寒泉
之思弟子自惟薄祜鎮切覺懷每屆秋期倍轉摧心
之痛炎涼遞運逾添切骨之哀未極三旬頻鍾二忌
恨乘時而更恨悲踐露而逾悲唯託福田少申荒思
今欲續成先志重置莊嚴故遣三思賚金絹等物往
彼就師平章幸識斯意即務修營望及諱辰終此功
德所冀罄斯誠懇以奉津梁稍宣資助之懷微慰覺
迷之緒畧書示意指不多云

報友書

唐宋 僖

自一接拜情同弟兄沈吟緬懷固非小子之所勤及
也榮質前謝恐乖昔賢共弊之道晦事勿語且作詩

人匪報之實。遷徊循軀。偭俛未已。殆將有辰矣。足下
多可不怪。高情內含。如筠斯清。比蕙又暢。儕不以感
氣厚而修詐。自廣不以撫己多而私頌。作德未致力。
謝馳懷宣書。何陳萬一也。悚息今秋。盡野外草木變
衰。長郊蕭條。風物淒緊。清都久客。莫復相親。足下退
食公庭。睡罷私室。櫛沐晞景。收視解聽。豈念歲華不
待。厭倦爲旅之士哉。頃者釀玉初令。絃絲正調。竟欲
左攜鄭君。幽指藥妙。右對董叟。高談道微。情酣世忘。
浩去塵粧。思足下能順試實。其事爲何如哉。時聞真
聲。迴閒笙鶴。此復異於人境耳。可以息宴。可以嘯歌。
久不聞然。期今日之事也。倚候騎氣。自豫光臨。幸甚。

謹馳疏不復具宋儋白

且作一釋爲不復一一淳化閣帖編

此入諸家古法帖秦程邈之下黃長睿云宋儋唐人著不知意以爲遠古人誤儋有嵩山圭禪師等碑傳於世述書賦注云宋儋字藏諸廣平人高尚不仕戶部侍郎字文融薦授祕書省校書郎案今所存儋書有嵩山故道安禪師碑字多殘泐

與盧藏用書

唐毛傑

月日雲夢子毛傑謹致書於盧公足下傑聞君所貴者道也所好者才也故才高則披襟而論翰墨道狎則言事而致談笑何必雞鳴狗盜始資僥倖之能算食瓢飲不顧清虛之用自公立名休代博物多能帝曰爾諧擢爲近侍所以從容禁省出入瑣闈忠弼在躬優柔薦及傑時在草莽運厄窮愁思折俎而無因

嗟埽門而不逮。豈知羣邪構逆，聯聲噭噭紫奪我朱。
遠詣惡土，賴公神色自若。心行不逾，餌芝术以養閑。
坐煙篁而收思，傑梁鴻遠旅。閔仲未歸，留連德音。徘徊
失路，互鄉童子。當願接於宣尼，蘇門先生竟未言。
於阮籍公於傑者如彼，僕於公者若此。百年朝夕，何
事惜於交遊。四海兄弟，何必輕於行路。賈生不云乎。
達人大觀，物無不可。小智自私，賤彼貴我。況公拂衣
高尚，習靜閑局。世事都捐，尤精道意。豈有自私而已。
無大觀者哉。儻能憐雲獎無知。案雲下舊衍壘字今刪雲獎即莊子在宥
之雲將下文鴻濛即鴻蒙，慙張良小子。說鴻濛之偈，遺黃石之書。
虛往實歸，霑霧露之微潤。裒多益寡，落丘山之一毫。

則知足下之眷深焉小人之慶畢矣。

荅毛傑書

唐盧藏用

毛子足下勤身訪道不毒氣瘴裏糧鬼門放蕩雲海
有足多矣一昨不遺猥辱書札期我遐意詢予道真
使人慙愧也僕知之矣士之生代則有冥志深蔽滅
木穹室鍊九還以咽氣味三秀以詠言固將養蒙全
理不以能鳴天性則其上也義感當途說動時主懷
全德以自達裂山河以取貴又其次也至於誠信不
申忠孝胥缺獨禦魑魅永投豺虎無面目以可數推
心膺以問天斯最下也僕在壯年常慕其上先貞後
贖卒罹憂患負家爲孽置身於此何顏復講道德哉

雖然少好立言亟聞長者之說老而彌篤猶憐薄暮
之晷加我數年庶無大過覽莊生鵠鵬之喻則乾坤
龍馬之旨可好矣培風運海則六九之源無差矣隳
之正氣則洗心藏密有由矣開卷獨得恬然會真不
知寰宇之廖廓不知生之與謝斯亦曖昧所守何必
爲是儻吾人起予指掌而說今之隱几不亦樂乎道
在梯稗■無相阻曷爲區區過勞按劍也頃風眩成
疾下淚復厲案此下舊衍力此還答無所銓次淹遲
筆字今刪

期庶不我責盧藏用頓首

唐李舟

致齊相國映書

三十三官足下近年已來宰臣當國多與故人禮絕

僕以禮處足下則足下長者。僕心未忍。欲以故人處足下。則慮悠悠之人。以僕爲詭。欲修書逡巡至今。忽承足下出守夔國。於蒼生之望。則爲不幸。爲足下謀之。則名遂身退。期又爲佳。僕昧時者。謹以爲賀。但鄱陽雲安道阻且長。音塵寂蔑。永以三歎。僕所疾沈痼。方率子弟力農爲生。疎矣。足下亦焉能不疎。僕耶。足下素■。僕所知之。其於得喪。固怡如也。然朝臣如足下寡矣。明王豈當不察之耶。惟強飯自愛。珍重珍重。

別湖州崔使君侃書

唐朱

灣

灣聞蓬萊之山藏杳冥而可到。貴人之門無媒而通不可到。據言補驪龍之珠潛濛混而可識。貴人之顏

無因而前不可識。灣自假道路問津主人。一身孤雲。
兩度圓月。凡再請職事。三趨戟門。門人謂灣曰。子私
來耶。公來耶。若言公僕。實非公若。言私。公庭無私。以
茲交戰。彷徨於今。信知庭之與堂。不啻千里。況寄食
漂母。夜眠漁舟。門如龍而難登。食如玉而難得。得如
玉之粟。登如龍之門。摭言補如龍之門轉深。如玉之
粟轉貴。實無機心。翻成機事。漢陰丈人聞之。豈不大
笑。屬谿上風便。囊中金貧。望甘棠而嘆。自引分而還
也。

與尚書右僕射蔡國公書

唐釋法琳

濟法寺釋法琳致書尚書右僕射蔡國公足下。法琳

草衣野客木食山人尤類曲針誠同腐芥不被知於當世合緘口以終身既德愧內充譽慙外滿非唯孤負慧遠實亦帶累道安是以卑志青溪歸心紫蓋覆船巖下永味經書鬼谷池前長觀魚鳥豈謂忽辭林藪更入匱塵久客秦川俄離楚塞萍流八水葉墜三陽口腹之弊已淹仲叔之情何寄卧靈臺而起恨遊白社而興嗟南巢之戀倍增北風之悲逾切居生壞坎稟命逆遭空詠七哀徒吟九歎撫躬弔影運也如何加以病在膏肓風纏腠理累年將息未覺有瘳至於照雪聚螢筋力已謝九流七畧難甚緣山萬卷百家杳猶行海前因傳子聊貢斐然仍以未竭邪源今

者重修辨正頗爲經書罕備史籍靡充雖罄短懷罔
知克就仰惟僕射公運籌策之才居阿衡之任知人
之器遠邁山濤接士之心還方趙武風姿爽朗識度
含宏旣握靈蛇之珠爰佩荆山之玉所以弼諧庶績
燮理文昌德鏡措紳譽形朝野加以門稱筆海世号
儒宗不忘宿昔之懷曲賜憂憐之訪寒灰更煖朽木
翻榮昔王粲閱書取資蔡氏相如達賦必賴揚侯意
者但是諸子雜書及晉宋以來内外文集與釋典有
相關涉處悉願披覽謹以別錄仰呈特希恩許輕陳
所請悚息何言邪見信心古來共有善人惡黨今日
寧無前以傅子謂言畧呈小論旣蒙上達復荷褒揚

戢在中心但知慙德昔三都賦未值張華無人見賞今破邪論不逢君子誰肯爲珍比者海內諸州四方道俗流通抄寫讚詠成音迴邪見之心發愚人之善者豈非明公之力也必能利物薄有冥功仰用莊嚴並將迴向耳請公爲宏護檀越

梁遣使聘蜀書

夫唐虞致治遵禪讓之明文湯武開基允神人之至願必有神器是膺皇圖況古今迭代之期英豪興隆之數莫不上關天命下順人心啓王霸之宏機爲子孫之大計咸遵軌轍並載簡編且念與皇帝八兄頃在前朝各封異姓土茅分裂皆超將相之尊魚鴈往

來久約弟兄之契。歡盟甚固。功業相推。俄阻絕於音
塵。止因緣於閒謀。以至時衰土德。運應金行。雖手足
胼胝。初平多難。而星辰符瑞。謬付厥躬。當百辟之羣
情。極四方之積患。爰都河洛。用答乾坤。尋聞皇帝八
兄奄有西陲。盡朝三蜀。別尊位號。復統高深。一時皆
賀於推崇。兩國願通於情好。徵曹劉之往制。各有君
臣。追楚漢之前蹤。常分疆宇。所冀同清夷夏。俱活生
靈。載籍具存。恢張無爽。去歲密聞風旨。遐慰寤思。憤
岐隴之猖狂。逼褒斜之封徼。欲資牽制。用速掃除。遂
委永平軍節度使劉鄩。特遣行人先導。深意旋已徑
差精甲。將擊妖巢。念數鎮之驍雄。鼓六師之威勢。尋

聞退遁殆至滅亡。允懷掎角之謀。尤得輔車之利。近
併覽同華奏報。皆進呈褒祥書題。具悉事機。良多歎
沃。今專馳卿列。備達衷懷。重論金石之交。別卜墳窆
之分。山河共永。日月長懸。瞻佇好音。言不盡意。今遣
光祿卿盧玭。閣門副使少府少監李元聊。馳書幣。專
戒道途。兼有微禮。具在別幅。謹白。梁開平三年
蜀武成二年

蜀答梁通聘書

大蜀皇帝謹致書於大梁皇帝閣下。竊念早歲與皇
帝共逢昌運。同事前朝。俱榮倚注之恩。並受安危之
寄。豈期王室如燬。大事莫追。橫流泛濫於八方。衰廢
凌夷於九廟。此際與皇帝同分茅土。共統邦家。扶危

者力既不宣握兵者計無所出某忝列同盟之分幸
居平蜀之功所宜治兵甲以固封疆聚征賦以修進
貢望星使而經年不至指雲鄉而就日無期遠聞皇
帝應天順人開基立極拯生靈於塗炭示恩信於豚
魚東南之王氣咸歸河洛之殊祥畢至四門盡闢百
度唯貞■無競於興邦止施仁而濟衆以此內量分
限不在經綸七十州自可指揮八千里半因開拓遂
至萬民叶議八國言朝爰徵史冊之文亦有變通之
說且東漢亂離之後三國齊興西周微弱之時六雄
競起俱非恃强逼禪皆以行道濟時雍容於揖讓之
前輕重於英雄之內況西蜀開山立國燒樓爲謀稱

雄雖處於一隅。避狄曾安於二帝。鼎峙之規模尚在。
山呼之氣象猶存。永言梁蜀之懼。合認弟兄之國。今
蒙皇帝遠尋舊好。專降嘉音。俱無間諜之嫌。再敘始
終之約。疑慮則春冰共泮。開通則東海可歸。光榮遽
被於子孫。暢遂咸敷於朝野。今則盡熾勞而己。用
儉勤以師資。嘗瞻偃草之風。以繼用天之道。又蒙厚
加賜貺。別降珍奇。十驥連鑣。六龍並駕。稱德曾參於
萬乘。呈才皆過於千金。載觀戀主之心。益勵懷恩之
志。寶帶輶異方之貢。名香加遠國之珍。奇鋒利過於
雪霜。雅器價齊於金玉。入用多慙於未識。捧持方喜
於初觀。望恩而一日三秋。仰德而跬步千里。自此榮

遵天路。繼道星槎。緘章不俟於飛鶯。裂帛豈勞於繫鴈。欣榮慰喜。併集此時。敬以專使盧卿等回。畧陳所志。幸望開覽謹白。

致夢英和尚書

宋郭忠恕

汾陽郭忠恕致書荅英公大師。紫塞雲高。皇朝路遠。每捧報瑤之翰。如窺連璧之姿。忠恕自落朝班。累承詔命。已得林泉之味。堅辭名利之場。鶴髮半生。猿心久死。與師金蘭。敦義香火。修因飛杯。容許於醉狂。結社不嫌於心亂。共得陽冰筆法。同傳史籀書蹤。常痛屋壁遺文。汲塚舊簡。年代浸遠。謬誤茲多。賴與吾師同心正古。近覽真翰。轉見工夫藏勢。過鋒方上圓下。

可以萬古教人也。晉宋而下，通篆籀者寡，唯碑碣印記時用數字，傳授者未克研精，何妨檢討？盜聽者恥於好問，加之穿鑿，齋中序云：小篆散而八分生，八分破而隸書出，隸書悖而行書弊，行書狂而草書聖。自隸已下，吾不欲觀之矣。見寄偏旁五百三十九字，按說文字源，唯有五百四十部，了字合收在子部。今日錄妄有更改之，又集解中誤收去部在注中，今點檢偏旁，少晶蕊至龜弦五字，故知林氏虛誕，誤於後進者小說，見宜焚之。聊以親書達心，俟以萬劫發願，何人知之？英公知之，不宣。遷客郭忠恕書達英公大師座前。十二月二十五日。

座前十二月二十五日。

檄

檄李勢

爲庾翼作

晉庾

闡

告巴蜀士民夫昏明代運否終則泰賢哲覩機以知
變不肖滅亡以取禍昔者皇運中消乾綱暫弛曜勒
窮凶肆暴神州李流啓逆竊逼岷川案流舊誤作劉
晉書記載翼以不才任符分陝未能仰宣皇恩招攜以禮
而使三巴之民制爲犬羊之羣元元之命懸於豺狼
之口所以假寐永歎疾疚如首者也凡百黎民秋毫
不犯檄到勉思良圖自求多福無使蘭艾同焚永作
鑒誠信誓之明有如皎日

喻虜檄文

梁裴子野

天生蒸民樹之以君所以對越三才司牧黔首蠲其
苛慝除其患難肇自遂古以迄皇王經世宇民咸由
此作朕撥亂反正君臨億兆休牛放馬載戢干戈思
與一世之民躋之仁壽之域昔者晉失其序天篤降
喪而四夷交侵小雅盡缺宋之初載實有武功秦晉
之墟頻梟僭偽末葉陵遲遂亡淮濟曠日長久莫能
克復朕爰初創業思閑寧靜保大定功未遑遠畧而
狡虜遊魂不式王命朕謂其君是惡其民何罪矜此
塗炭用寢兵革今戎醜數亡自相吞噬重以亢旱彌
年穀價騰踊丁壯死於軍旅婦女疲於轉輸虐政慘
刑曾無懲改四方同集九服齊契璧言猶翻東海以注

熒熒倒崑崙以壓螻蟻其身糜爛豈假多力爾二周
故老六輔大姓蒙恥俛首有自來矣濯身明目今也
其時昔由余入秦禮以卿佐日磾降漢華貂七葉苟
有其才豈無大位案以梁書本傳考之在普通七年

七

七激

漢傳毅

徒華公子託病幽處游心於元妙清思乎黃老於是
元通子聞而往屬曰僕聞君子當世而光迹因時以
舒志必將銘勒功勲懸著隆文今公子削迹藏體當
年陸沈變度易趣違拂雅心狹六經之指守偏塞之
術意亦有所蔽與何圖身之謬也僕將爲公子論天

下之至妙。列耳目之通好。原情心之性理。綜道德之彌奧。豈欲聞之乎。公子曰。僕雖不敏。固願聞之。元通子曰。洪梧幽生。生於遐荒。陽春後榮。涉秋先颺。晨飈飛礀。孫禽相求。積雪汎汎。中夏不流。於是乃使夫遊宦失勢。窮擯之士。泳溺水。越炎火。窮林薄。歷隱深。三秋乃獲。斷之高岑。梓匠摹度。擬以斧斤。然後背洞壑。臨絕谿。聽迅波。望層崖。太師奏操。榮期清歌。歌曰。陟景山兮採芳苓。哀不慘傷。樂不流聲。彈羽躍水。叩角奮榮沈微。元穆感物寤靈。此亦天下之妙音也。子能強起而聽之乎。元通子曰。單極滋味。嘉旨之膳。芻豢常珍。庶饌異饌。浮養之魚。膾其鯉鮎。分毫之割。纖如

髮芒散如絕穀積如委紅殊芳異味厥和不同既食
日晏乃進夫雍州之梨出於麗陰下生芷隰上託桂
林甘露潤其葉醴泉漸其根脆不抗齒在口流液握
之摧沮批之離坼可以解煩惱悅心意子能起而食
之乎元通子曰驥驥之乘龍驤超據騰虛鳥踊莫能
執御於是乃使王良理轡操以術數踐路促節機登
飈驅前不可先後不可追踰埃絕影倏忽若飛日不
轉曜窮遠旋歸此蓋天下之駿馬子能強起而乘之
乎元通子曰三時旣逝季冬暮歲元冥終統庶卉零
悴王在靈囿講戎簡旅於是駟驥驥乘輕軒麾旌旗
鳴八鸞陳衆車於廣隰散列騎乎平原屬罘罿以彌

野連尉羅以營山部曲周匝風動雲旋合圍促陣禽獸駭彈仆不暇起窮不及旋擊不待刃骨解肉離椎牙碎首分其文皮流血丹野羽毛翳日於是下蘭臯臨流泉觀通谷望景山酌旨酒割芳鮮此天下之至娛也子能強起而觀之乎元通子曰堂館侈飾洞房華屋檻桷雕藻文以朱綠層臺百仞臨望博見俯視雲霧騁目窮觀園藪平夷沼池漫衍禽獸羣交芳草蔓蔓於是賓友所歡近覽從容詹公沈餽蒲且飛工輪不虛出矢不徒降投鉤必獲控弦加雙俯盡深潛仰殫輕翼日移怠倦然後讌息列觴酌醴妖靡侍側被華文曳綾縠弭隨珠佩琚玉紅顏呈素蛾眉不畫

唇不施朱髮不加澤升龍舟浮華池紆帷翳而永望
鏡形影於元流徧滔滔以南北似漢女之神遊笑比
目之雙躍樂偏禽之匹嬉此亦天下之歡也子能強
起而與之遊乎元通子曰漢之盛世存乎永平太和
協暢萬機穆清於是羣俊學士雲集辟雍含詠聖術
文質發矇達犧農之妙旨照虞夏之典墳遵孔氏之
憲則投顏閔之高迹推義窮類靡不博觀光潤嘉美
世宗其言公子瞿然而興曰至乎主得聖道天基允
臧明哲用思君子所常自知沈溺久蔽不悟請誦斯
語仰子法度

對

高唐對

周宋玉

楚王與宋玉遊於雲夢之野。將使宋玉賦高唐之事。
望朝雲之館。上有雲氣。崕乎直上。忽而改容。須臾之間。變化無窮。王問宋玉曰。此何氣也。對曰。昔者先王遊於高唐。怠而晝寐。夢一婦人。曖乎若雲。煥乎若星。將行未至。如浮如停。詳而視之。西施之形。王悅而問焉。曰。我帝之季女也。名曰瑤姬。未行而亡。封巫山之臺。精魂依草實爲蘿芝。媚而服焉。則與夢期所爲巫山之女。高唐之姬。聞君遊於高唐。願薦枕席。王因而幸之。出襄陽耆舊記與文選高賦文有不同故載之

五行對

漢董仲舒

河間獻王問溫城董君曰孝經曰夫孝天之經地之義何謂也對曰天有五行木火土金水是也木生火火生土土生金金生水水爲冬金爲秋土爲季夏火爲夏木爲春春主生夏主長季夏主養秋主收冬主藏藏冬之所成也是故父之所生其子長之父之所長其子養之父之所養其子成之諸父所爲其子皆奉承而續行之不敢不致如父之意盡爲人之道也故五行者五行也由此觀之父授之子受之乃天之道也故曰夫孝者天之經也此之謂也王曰善哉天經既得聞之矣願聞地之義對曰地出雲爲雨起氣爲風風雨者地之所爲地不敢有其功名必上之於

天命若從天氣者故曰天風天雨也莫曰地風地雨也勤勞在地名一歸於天非至有義其孰能行此故下事上如地事天也可謂大忠矣土者火之子也五行莫貴於土土之於四時無所命者不與火分功名木名春火名夏金名秋水名冬忠臣之義孝子之行取之土土者五行最貴者也其義不可以加矣五聲莫貴於宮五味莫美於甘五色莫貴於黃此謂孝者地之義也王曰善哉衣服容貌者所以悅目也聲言應對者所以說耳也好惡去就者所以悅心也故君子衣服中而容貌恭則目悅矣言理應對遜則耳說矣好仁厚而惡淺薄就善人而遠僻鄙則心說矣故

曰行思可樂容止可觀此之謂也

按古文苑載董子謬對獨遺此篇故

爲補

磨石對

魏劉楨

文帝嘗請同好爲主人使甄夫人出拜坐者皆伏楨
獨平視如故武帝使人觀之大怒命收之主者案楨
大不恭應死減一等輸作部使磨石武帝嘗輦至尚
方觀作者問曰石何如楨因得喻已自理跪對曰
石出自荆山元巖之下外有五色之章內含卞氏之
珍磨之不加瑩彫之不增文稟氣堅貞受茲自然顧
理枉屈紓繞獨不得申

出文士敵

續古文苑卷第八

續古文苑卷第九

賜進士及第授通奉大夫山東通省督糧道加三級孫星衍撰

論

驃騎論功論

漢吾丘壽王

驃騎將軍霍去病征匈奴立克勝之功壽王作士大夫之論稱武帝之德曰

士或問於大夫曰側聞強秦之用兵也南不踰五嶺北不渡大河海內愁怨以喪其國漢興六十餘載矣命將帥以抗憤用干戈於四荒南排朱崖北建朔方東越滄海西極河源拓地萬里海內晏然鄙人不識敢問其蹤大夫曰昔秦之得天下也以力而不以德

以詐而不以誠。內用商鞅李斯之謀。外用白起王翦之兵。窺閒伺隙。既并海內之後。以威力爲至道。以權詐爲要術。遂非唐突虞絕。滅舊章。防禁文學。行是古之戮。嚴誹謗之誅。十餘年。遂滂沱而盈溢。是故皇天疾滅。更命大漢反秦政。務在敦厚。至今六世。可謂富安。天子文明。四夷向風。徒觀朝廷下僚門戶之士。謀如涌泉。動如駭機。皆能安中國。吞四夷。君臣若茲。何慮而不成。何征而不剋。雖拔泰山。填滄海可也。王拂野客

叢書引此論
文多刪節

銘論

漢蔡邕

春秋之論銘也。曰天子令德。諸侯言時計功。大夫稱

伐昔肅慎納貢銘之楨矢所謂天子令德者也黃帝
有巾几之法孔甲有槃杼之誠殷湯有甘誓之勒
鑄成切鼎有丕顯之銘武王踐祚咨於太師作席机檻
杖雜銘十有八章周廟金人緘口書背銘之以慎言
亦所以勸進人主勗於令德者也昔召公作誥先王
賜朕鼎出於武當曾水呂尚作周太師而封於齊其
功銘於昆吾之冶獲寶鼎於美陽仲山甫有補袞闕
誠百辟之功周禮司勲凡有大功者銘之大常所謂
諸侯言時計功者也宋大夫正考父三命茲益恭而
莫侮其國衛孔悝之祖莊叔隨難漢陽左右獻公衛
國賴之皆銘於鼎晉魏顆獲秦杜回於輔氏銘功於

景鍾所謂大夫稱伐者也。鍾鼎禮樂之器。昭德紀功。
以示子孫。物不朽者。莫不朽於金石。故近世以來。咸
銘之於碑。德非此族。不在銘典。此文宋人所輯蔡中
郎集闕載故錄之昔召公已下十六字德非已下

八字據文選刻漏銘注引補

辯道論

魏曹植

夫神仙之書。道家之言。乃云傳說上爲辰尾宿。歲星
降下爲東方朔。淮南王安誅於淮南。而謂之獲道輕
舉。鉤弋死於雲陽。而謂之尸逝柩空。其爲虛妄甚矣
哉。中興篤論之士。有桓君山者。其所著述多善。劉子
駿嘗問言。人誠能抑嗜欲。闔耳目。可不衰竭乎。時庭
下有一老榆。君山指而謂曰。此樹無情。欲可忍。無耳。

可闔然猶枯槁腐朽而子駿乃言可不衰竭非談
也君山援榆喻之未是也何者

案此處有脫文余前爲王莽

典樂大夫樂記云文帝得魏文侯樂人竇公年百八十兩目盲帝奇而問之何所施行對曰臣年十三而失明父母哀其不及事教臣鼓琴臣不能導引不知壽得何力君山論之曰頗得少盲專一內視精不外鑒之助也先難子駿以內視無益退論竇公便以不外鑒證之吾未見其定論也君山又曰方士有董仲君有罪繫獄佯死數日目陷蟲出死而復生然後竟死生之必死君子所達夫何喻乎夫至神不過天地不能使蟄蟲夏逝震雷冬發時變則物動氣移而事

應彼仲君乃能藏其氣尸其體爛其膚出其蟲無乃
大怪乎。辨正論上見

世有方士吾王悉所招致甘陵有甘

始盧江有左慈陽城有郗儉始能行氣導引慈曉房

中之術儉善辟穀悉號三百歲本所以集之於魏國
者誠恐斯人之徒挾姦宄以欺衆行妖隱以惑民故

聚而禁之也。

辨正論補此六字依

豈復欲觀神仙於瀛洲求安

期於海島釋金輶而履雲輿棄六驥而羨飛龍哉自
家王與太子及余兄弟咸以爲調笑不信之矣然始
等知上遇之有恒奉不過於員吏賞不加於無功海
島難得而遊六絃難得而佩終不敢進虛誕之言出
非常之語余嘗試郗儉絕穀百日躬與之寢處行步

起居自若也。夫人不食七日則死而儉乃如是然不必益壽可以療疾而不憚饑饉焉。左慈善修房內之術差可終命然自非有志至精莫能行也。甘始者老而有少容自諸術士咸共歸之然始辭繁寡實頗有怪言余嘗辟左右獨與之談問其所行溫顏以誘之美辭以導之始語余吾本師姓韓字世雄嘗與師於南海作金前後數四投數萬斤金於海又言諸梁時西域胡來獻香罽腰帶割玉刀時悔不取也又言車師之西國兒生擘背出脾欲其食少而怒行也又言取鯉魚五寸一雙含其一以藥俱投沸膏中有藥者奮尾鼓腮游行沈浮有若處淵其一者已熟而可噉

余時問言率可試不言是藥去此逾萬里當出塞始
不自行不能得也言不盡於此頗難悉載故粗舉其
巨怪者始若遭秦始皇漢武帝則復爲徐市欒大之
徒也自世有方士至桀紂殊世而齊惡姦人異代而
此見三國志注桀紂殊世而齊惡姦人異代而

等僞乃如此耶又世虛然有仙人之說仙人者黨猱
猿之屬與世人得道化爲仙人乎夫雉入海爲蛤鷺
入海爲蜃當其徘徊其翼差池其羽猶自識也忽然
自投神化體變乃更與鼃鼈爲羣豈復自識翔林薄
巢垣屋之娛乎牛哀病而爲虎逢其兄而噬之若此
者何貴於變化耶已上見辨正論牛哀以下廿一
字陳子良注引有之今據補夫
帝者位殊萬國富有天下威尊彰明齊光日月宮殿

闢庭焜耀紫微何顧乎王母之宮崑崙之域哉夫三
鳥被致不如百官之美也素女常娥不若椒房之麗
也雲衣雨裳不若黼黻之飾也駕螭載霓不若乘輿
之盛也瓊蕊玉華不若玉圭之潔也而顧爲匹夫所
罔納虛妄之辭信眩惑之說隆禮以招弗臣傾產以
供虛求散王爵以榮之清閑館以居之經年累稔終
無一驗或歿於沙丘或崩於五柞臨時此十二字依辨正論補

雖復誅其身滅其族紛然足爲天下一笑矣若夫元
黃所以娛目鏗鏘所以聳耳媯妃所以紹先芻豢所
以悅口也何以甘無味之味聽無聲之樂觀無采之
色也自夫帝者位殊萬見曹植集然壽命長短骨體強劣各有

人焉善養者終之勞擾者半之虛用者夭之其斯之謂矣。已上見辨正論又廣宏明集所載取諸法琳皆定又陳子良注引陳思論昔堯舜禹湯文武云云抱朴子內篇引陳思王釋疑論云云皆非此篇文今不取入

刑禮論

魏丁儀

天垂象聖人則之天之爲歲也先春而後秋君之爲治也先禮而後刑春以生長爲德秋以殺戮爲功禮以教訓爲美刑以威嚴爲用故先生而後殺天之爲歲也先教而後罰君之爲治也天不以久遠更其春夏而人得以古今改其禮刑哉太古之世民故質樸質樸之民宜其易化是以中古之君子或結繩以治

或象刑惟明夏后肉辟民轉姦詐刑彌滋繁禮亦如之由斯言之古之刑省禮亦宜畧今所論辨雖出傳記之前夫流東源不得西景正形不得傾自然之勢也後世禮刑俱失於前先後之宜故自有常今夫先刑者用其末也由禮禁未然之前謂難明之禮古人不能行也按如所云禮嫂叔不親之屬也非太古之禮也所云禮者豈此也哉古者民少而獸多未有所爭民無患則無所思故未有君焉後民禍多強暴弱於是又有賢人焉平其多少均其有無推逸取勞以身先之民獲其利歸而樂之樂之得爲君焉夫刑之記君也精具筋力民畏其強而不敢校得爲君也恐上

古未具刑罪之品。設逋云之法。懼彼爲我。而以勇力
侵暴於己能與。則校不能歸奉之明矣。直上古之時
賊耳。非所謂君也。上古雖質。宜所以爲君。會當先別
男女。定夫婦。分土地。班食物。此先以禮也。夫婦定而
後禁淫焉。萬物正而後止竊焉。此後刑也。

周成漢昭論

魏丁 儀

成王昭帝。俱以襁褓之幼。託於冢宰。流言讟興。此其
艱險相似者也。夫以發金縢。然後垂泣。與計日力。便
覺詐書。明之遲速。既有差矣。且叔父兄子。非相嫌之
處。異姓君臣。非相信之地。霍光罹人謗而不出。周公
賴天變而得入。推此數者。齊本而論末。計重而況輕。

漢昭之優周成甚明者也。成王秀而獲實其美在終昭帝苗而未秀其得在始必不得已未論二主余與夫始者陳思魏文陳思皆有此論魏文與漢昭而不然正禮此篇蓋應報之作也

韓白論

魏何晏

此兩將者殆蚩尤之敵對開闢所希有也。何者勝或曰白起功多前史以爲出奇無窮欲窺蒼海白起爲勝若夫韓信斷幡以覆軍拔旗以流血其以取勝非復人力也亦可謂奇之又奇者哉白起破趙軍詐奔而斷其糧道取勝之術皆此類也所謂可奇於不奇之間矣安得比其奇之又奇者哉

自然好學論

魏張遼叔

夫喜怒哀樂愛惡欲懼人之有也得意則喜見犯則怒乖離則哀聽和則樂生育則愛違好則惡飢則欲食逼則欲懼凡此八者不教而能若論所云即自然也腥臊未化飲血茹毛以充其虛食之始也茹之火齊糲以蘭橘雖所未嘗嘗必美之適於口也蕡桴土鼓撫腹而吟足之蹈之以娛其喜樂之質也加之管絃雜以羽毛雖所未聽察之必樂當其心也民生也直聚而勿教肆心觸意八情必發喜必欲與怒必欲罰無爪牙以奮其威無爵賞以稱其惠愛無以奉惡不能去有言之曰苴竹菅蒯所以表哀溝池嶮岨所以寬懼弦木剝金所以解憤豐財殖貨所以施與苟

有肺腸誰不忻然貌悅心釋哉尚何假於食膽蜚而
嗜菖蒲菹也且晝坐夜寢明作闇息天道之常人所
服習在於幽室之中覩烝燭之光雖不教告亦皎然
喜於所見也不以向有白日與比朱門旦則復曉不
揭此明而減其歡也況以長夜之冥得照太陽情變
鬱陶而發其蒙也故以爲雖事以未來而情以本應
即使六藝紛華名利雜詭計而後學亦無損於有自
然之好也

宅無吉凶攝生論

魏無名氏

夫善求壽强者必先知災疾之所自來然後其至可
防也禍起於此爲防於彼則禍無自瘳矣世有安宅

葬埋陰陽度數刑德之忌。是何所生乎。不見性命。不知禍福也。不見故妄求。不知故干幸。是以善執生者。見性命之所宜。知禍福之所來。故求之實而防之信。夫多飲而走。則爲澹。支數行而風。則爲癢。毒久居於濕。則要疾。偏苦好內。不怠。則昏喪。文房若此之類。災之所以來。壽之所以去也。而掘基築宅。費日苦身。以求之。疾生於形。而治加於土木。是疾無瘳矣。詩曰。愷悌君子。求福不回者。匪避誹謗。而爲義然也。蓋知回匪所求福也。故壽強專氣致柔。少私寡欲。直行情性之所宜。而合於養生之正度。求之於懷抱之内。而得之矣。嘗有不知蠶者。出口動手。皆爲忌祟。不得蠶絲。

滋甚爲忌祟滋多猶自以犯之也有教之知蠶者其
顛於桑火寒暑燥濕也於是百忌自息而利十倍何
者先不知所以然故忌祟之情繁後知所以然故求
之之術正故忌祟生於不知使知性猶知蠶則忌祟
無所立矣多食不消含黃丸而筮祝謳祟或從乞胡
求福者凡人皆所笑之何者以智能達其無禍也故
忌祟舉生於不知由知者言之皆乞胡也設爲三公
之宅而令愚民居之必不爲三公可知也夫壽夭之
不可求甚於貴賤然則擇百年之宮而望殤子之壽
孤逆魁岡以速彭祖之夭必不幾矣或曰愚民必不
得久居公侯宅然則果無宅也是性命自然不可求

矣有賊方至不疾逃獨安須臾遂爲所虜然則避禍趣福無過緣理避賊之理莫如速逃則斯善矣養生之道莫如先知則爲盡矣夫避賊宜速章章然故中人不難覩避禍之理冥冥然故明者不易見其於理動不可要求一也孔子有疾醫曰子居處適也飲食樂也有疾天也醫焉能事是以知命不憂原始反終遂知死生之說夫時日譴祟古之盛王無之而季王之所好聽也制壽宮而得天短求百男而無立嗣必占不啓之陵而陵不宿草何者高臺深宮以隔寒暑靡色厚味以毒其精亡之於實而求之於虛故性命不遂也或曰所問之師不工則天下無工師矣夫一

棲之雞一欄之羊賓至而有死者豈居異哉故命有
制也知命者則不滯於俗矣若許負之相條侯英布
之黥而後王彭祖七百殤子之夭是皆性命也若相
宅質居自東徂西而得反此是滅性命之宜孔子登
東山而小魯登泰山而小天下立高丘而觀居民則
知曰東西非禍福矣若乃忘地道之爽塏而立制於
帷牆則所見滋福從達者觀之則夫乾確然示人易
矣夫坤隤然示人簡矣天地易簡而懼以細苛是更
所以爲逆也是以君子奉天明而事地察世之工師
占成居則驗使造新則無徵世人多其占舊因求其
造新是見舟之行於水而欲推之於陸是不明數也

夫舊斷之理猶卜筮也。夫鑿龜數筴可以知吉凶。然不能爲吉凶。何者。吉凶可知而不可爲也。夫先筮吉卦而後名之。無福。猶先築利宅而後居之。無報也。占舊居以譴祟則可。安新居以求福則不可。則猶卜筮之說耳。俗有裁衣種穀皆擇日。衣者傷寒。種者失澤。凡火流寒至。則授衣時雨既降。則當下種。賊方至。則當疾走。今舍實趣虛。故三患隨至。凡以忌祟治家者。求福而其極皆貧。故有知星宿衣不覆之諺。古言無虛。不可不察也。

釋難宅無吉凶攝生論

魏無名氏

易曰。河出圖。洛出書。聖人則之。孝經曰。爲之宗廟以

鬼享之。其立本有如此者。子貢稱性與天道。不可得聞。仲由問神。而夫子不答。其抑末有如彼者。是何也。茲所謂明有禮樂。幽有鬼神。人謀鬼謀。以成天下之亹亹也。是以墨翟著明鬼之篇。董無心設難墨之說。二賢之言。俱不免於殊途而兩惑。是何也。夫甚有之。則愚。甚無之。則誕。故二子者。皆偏辭也。子之言神。將爲彼耶。唯吾亦不敢明也。夫私神立。則公神廢。邪忌設。則正忌喪。宅墓占。則家道苦。背向繁。則妖心興。子之言神。其爲此乎。則唯吾之所疾爭也。苟大獲其類。不患微細。是以見餅冰而知天下之寒。察旋機而得日月之動。足下細覩種之說。因忽而不察。是噎溺未

知所在亦莫辨有舟稼也夫命者所稟之分也信順者成命之理也故曰君子修身以俟命知命者不立於巖牆之下何者是天遂之實也猶食非命而命必胥食故然矣若吾論曰居怠行逆不能令彭祖夭則足下舉信順之難是也論之所說信順旣修則宅葬無實故譬之壽宮無益殤子耳足下不云殤子以宅延彭祖亦以宅壽壽夭之說使之灼然若信順之遂期怠逆之天性而徒曰天下或有能說之者子而不言誰與能之夫多食傷性良藥已病相之所一也誣彼實此非所以相證也夫壽夭不可求之宅而得之和故論有不知之足下忽於意而責於文抑不本

矣難曰唐虞之世命何同延長平之卒命何同短今論命者當辨有無無疑衆寡也苟一人有命千萬皆一也若使此不係命將係宅耶則唐虞之世宅何同吉長平之卒居何同凶亦復吾之所疑也難曰事之在外而能爲害者不以數盡單豹恃內而有虎按足下之言是豹忘所宜懼與懼所宜忘故張毅修表亦有內熱之禍雖內外不同鈞其非和一曙失之終身弗復是亦虎隨其後矣夫謹於邪者慢於正詳於宅者畧於和走以爲先亦非齊於所稱也今足下廣之望之久矣元亨利貞卜之吉繇隆準龍顏公侯之相者以其數所遇而形自然不可爲也使準顏可假則

無相繇吉可爲則無卜矣。今設爲吉宅而幸福報譬之無以異假顏準而望公侯也。是以子陽鏤掌巨君運魁咸無益於敗亡。故吾以無故而居者可占。何惑象數之理也。設吉而後居者不可。則何假爲之說也。然則非宅制人。人實徵宅耶。其無宅也。似未思其本耳。獵夫從林。其所遇者或禽或虎。遇禽所吉。遇虎所凶。而虎也善卜可以知之耳。是故知吉凶非爲吉凶也。故其稱曰。無遠近幽深。遂知來物。不曰遂爲來物矣。然亦卜之。蓋盡理所以成相命者也。至乎卜世與年。則無益於周錄矣。若地之吉凶。有虎禽之類然。此地苟惡。則當所往皆凶。不得以西東有異。背向不同。

宮姓無害商則爲災福德則吉至刑禍則凶來也故
詩云築室百堵西南其戶古之營居宗廟爲先廐庫
次之居室爲後緣人理以從事以此議之即知無太
歲刑德也若修古無違亦宜吾論如無所■不知誰
從難曰不謂吉宅能獨成福猶夫良農旣懷善藝又
擇沃土復加耘耔乃有盈倉之報此言當哉誠三者
能修則農事畢矣若或盡以邪用求之於虛則宋人
所謂予助苗長敗農之道也今以冢宅喻此宜何比
耶爲樹藝乎爲耘耔也若三者有比則請事後說若
其無徵則愈見其誣矣今卜相有徵如彼冢宅無驗
如此非所以相半也按書周公有請命之事仲尼非

子路之禱今釣聖而釣疾何是非不同也故知臣子之心盡斯心而已所謂禮爲情貌者故於臣弟則周公請命親其身則尼父不禱足下圖宅將爲禮也其爲實也爲禮則事異於古爲實則未聞顯理如是未得吾所以爲遺而足下失所願矣至於時日先王所以誠不怠而勸從事耳俗之時日順妖忌而逆事理時名雖同其用適反以三賢校君愈見其合未知所異也難曰智之所知未若所不知者衆此較通世之常滯也然智所不知不可以妄求智所能知惡其以學哉故古之君子修身擇術成性存存自盡焉而已矣今據足下所言在所知耶則可辨也所不知耶則

妄求也。二者宜有一於此矣。夫小知不及大知，故乃反於有無爲有者，亦蠅蛦矣。子尤吾之驗於所齊，吾亦懼子遊非其域，儻有忘歸之累也。

論嫁娶時月

晉束哲

春秋二百四十年，魯女出嫁，夫人來歸，大夫逆女，天王娶后，自正月至十二月，悉不以得時失時爲貶褒，何限於仲春季秋以相非哉？夫春秋舉秋毫之善，貶纖介之惡，故春狩於郎，書時禮也；夏城中丘，書不時也；此人間小事，猶書得時失時，況婚姻人倫端始禮之大者，不譏得時失時，不善者耶？若婚姻季秋期盡仲春，則隱二年冬十月、夏之八月，未及季秋，伯姬歸

於紀周之季春夏之正月也桓九年春季姜歸於京師莊二十五年六月夏之四月也已過仲春伯姬歸於杞或出盛時之前或在期盡之後而經無貶文三傳不譏何哉凡詩人之興取義繁廣或舉譬類或稱所見不必皆可以定時候也又按桃夭篇序美婚姻以時蓋謂盛壯之時而非日月之時故灼灼其華喻以盛壯非謂嫁娶當用桃夭之月其次章云其葉蓁蓁有蕡其實之子于歸此豈在仲春之月乎又標梅三章注曰夏之向晚迨冰未泮正月以前草蟲喫喫未秋之時或言嫁娶或美男女及時然詠各異矣周禮以仲春會男女之無夫家者蓋一切相配合之時

而非常人之節。曲禮曰：男女非有行媒，不相知名。故日月以告君，齋戒以告鬼神。若萬民必在仲春，則其日月有常，不得前却。何復日月以告君乎？夫冠婚笄嫁，男女之節，冠以二十爲限，而無春秋之期，笄以嫁而設，不以日月爲斷。何獨嫁娶當繫以時月乎？王肅云：婚姻始於季秋，止於仲春，不言春不可以嫁也。而馬昭多引春秋之證，以爲反詩，於難錯矣。兩家俱失，義皆不通。通年聽婚，蓋古之制也。

論天

晉劉智

凡含天地之氣而生者，人其最貴，而有靈智者也。是以動作云爲，皆應天地之象。古先聖王觀靈曜，造算

數準辰極制渾儀原性理考徵祥贊其幽義而作歷術焉渾儀象天之圓體以含地方輪轉周匝在二端中其可見者極星是也謂之行極在南者在地下不見故古人不名陰陽對合爲羣生父母精象在下五星具於上共成天地之功也則日月爲政五星爲緯天以七紀七曜是也行極不過爲衆星之君命政指授以斗建時斗有七星與曜同精而布節氣於下者也晦朔分於東西消息辨於南北取以定四方天地配合方氣有常天以七紀方修其政故方有七宿二十八星是也於是天有常度日月成象衆星有宮分方物有體類在朝象官在野象物在人象事理自然

也。衆星定位。七曜錯行。盈縮有期節。故歷數立焉。日太陽也。施溫萬物生。施光則陰以明。衆所稟爲倡先者也。君尊之象也。月太陰也。稟照於陽。虧盈隨時。有所稟受。臣卑之道也。五星象五常。託四時成五事。舊說曰。譬猶火也。月譬猶水也。火則施光。水則含景。故月光生於日。當日則明。光盈。近日則明滅。然則月之清象在前矣。又曰。當其衝月食者。陰性毀損。不受光也。君臣不等強。日月不等明。陰在於上。不自抑損。陽必侵之。望在交度。其應必食。故詩云。彼月而食。則維其常道。勢然也。侵甚則既。臣之象也。日尊君象也。月卑臣象也。晦朔之會。交則同道。同道則形相蔽。天道

前爲尊臣由臣道雖度相值月不掩日卑下尊也不

由臣道月掩日體卑凌尊也是故太平之時交而不食尊卑道順或問曰舊說云

正補占經脫日舊說三字今

顓頊造渾儀

占經此下衍以天文志刪御覽引亦無

其說云四字依劉智

帝爲益天蓋天以天象笠極在其中日月以遠近爲

晦明渾儀以天裹地地載於氣天以迴轉而日月出入以爲晦明二說誰其得之劉智曰蓋天之論謬矣

以春秋二分日出卯入酉若天象車蓋極在其中日月星辰迴遠則藏二分之時當晝短夜長今以漏刻數之則晝夜分等以日出入効之則出卯入酉此蓋天之說不通之驗也然此二器皆古之所制但傳說

義者失其用耳昔者聖王治歷明時作圓蓋以圖列宿極在於中回之以見天象分三百六十五度四分度之一以定日數日行於星紀轉回右行故圓規之以爲日行道欲明其四時所在故於春也則以青爲道於夏也則以赤爲道於秋也則以白爲道於冬也則以黑爲道四季之末各十八日則以黃爲道蓋圖已定仰觀雖明而案自分三百六十五度至此九十六字開元占經無據隋書天文志補未可正昏明分晝夜故作渾儀以象天體亦以極爲中而朱規爲赤遊周環去極九十一度有奇考日所行冬夏去極遠近不同故復畫爲黃道夏至去極近冬至去極遠二分之際交於赤道二道有表裏以

定宿度之進退爲術乃密至漢順帝時南陽張衡考定進退靈帝時太山劉洪步月遲疾自此之後天驗愈詳自司馬遷劉向劉歆楊雄賈逵張衡蔡氏劉洪鄭元此九君者不但於算步皆博索沈綜才思宏遠而不合論渾蓋之用明定日行四時之道雖或精考雅有所得亦或出必失其本旨人之不同處意各異道之難盡致於斯矣或問曰古歷論月食或云陰損則不受明或云闇虛所在值月則月食值星則星亡今子不從何也劉智曰言闇虛者以爲當日之衝地體之蔭日光不至謂之闇虛凡光之所照光體小於所蔽則大於本質今日以千里之徑而地體蔽之則

闇虛之蔭將過半天。星亡月毀，豈但交會之間而已哉？由此言之，陰不受明，近得之矣。又問曰：若如所論，必有大蔭。月在日衝，何由有明？劉智曰：夫陰含陽而明，不待陽光明照之也。陰陽相應，清者受光，寒者受溫，無門而通，雖遠相應，是故觸石而流出者，水氣之通也；相嚮而相反，無遠不至，無隔能塞者，至清之質，承陽之光，以天之圓面向相背，側立不同，光魄之理也。陰陽相承，彼隆此衰，是故日月有爭明。日微則晝也，陰陽相承，彼隆此衰，是故日月有爭明。日微則晝也。陰明隆，陽衰則陰明衰，二者之異，無由生矣。案隋書經籍志

正圖四卷晉太常劉智撰以御覽所引一條證之此論當出彼也

許巢論

晉石崇

客有問於余曰：昔許由巢父距堯之讓，逍遙頤神，寶己遺世。司馬遷以假託之言，必無此實。竊以爲然。余答之曰：是何言歟？蓋聞聖人在位，則羣材必舉；官才任能，輕重允宜。大任已備，則不抑大材使居小位；小材已極其分，則不以積久而令處過材之位。然則稷播嘉穀，契敷五教，臯陶夔龍，各已授職，其聯屬之官必得其材，則必不重載兼置。斯可知也。巢許則元凱之儔，大位已充，則宜敦廉讓以厲俗，崇無爲以化世。然後動靜之教備，隱顯之功著，故能成巍巍之化。民莫能名，將何疑焉。

言案此
不字
孔子
舊行
盡意論

晉歐陽建

有雷同君子問於達衆先生曰世之論者以爲言不盡意由來尚矣至乎通才達識咸以爲然若夫蔣公之論眸子鍾傳之言才性莫不引此爲談證而先生以爲不然何哉先生曰夫天不言而四時行焉聖人不言而鑒識存焉形不待名而方圓已著色不俟稱而黑白以彰然則名之於物無施者也言之於理無爲者也而古今務於正名聖賢不能去言其故何也誠以理得於心非言不暢物定於彼非名不辯言不暢心則無以相接名不辯物則鑒識不顯鑒識顯而名品殊言稱接而情志暢原其所以本其所由非物

有自然之名。理有必定之稱也。欲辯其實。則殊其名。欲宣其志。則立其稱。名逐物而遷。言因理而變。此猶聲發響應。形存影附。不得相與爲二。苟其不二。則無不盡。吾故以爲盡矣。

蓍龜論

晉庾闡

夫物生而後有象。有象而後有數。有數而後吉凶存焉。蓍者。尋數之主。非神明之所存。龜者。啓兆之質。非靈照之所生。何以明之。夫求物於闇室。夜鑒者得之。無夜鑒之朗。又以火得之。得之功同也。致功之迹異也。不可見目。因火鑒。便謂火爲目。神憑蓍通。又謂蓍爲神也。由此言之。神明之道。則大賢之闇室。蓍龜之

用。豈非顏子之龍燭耶。蓍龜之運亦所以感興卦兆。
求通逆數。又非爻象之體。擬議之極者也。安得超登
仙而含靈獨備哉。且殊方之上。或責象草木。或取類
瓦石。而吉凶之應不異蓍龜。此爲神道之主。自有妙
會。不由形器。尋理之器。或因他方。不繫蓍龜。然經有
天生神物。下載圓神之說。言者所由也。直稱神之美。
以及其迹。亦猶筌雖得魚。筌非魚也。蹄雖得兔。蹄非
兔也。是以象以求妙。妙得則象忘。蓍以求神。神窮則
著廢。

安天論

晉虞 喜

太史令陳季胄。案隋天文志云吳太史令陳苗也以先賢制木爲儀。

名曰渾天。闢言天體者三家。渾蓋之說具存。而宣夜之法絕滅。有意續之而未遑也。近見姚元道造昕天論。又覩族祖河間相立穹天論。鄙意多嫌。喜以爲天高窮於無窮。地深測於不測。天確乎在上。有常安之形。地魄焉在下。有居靜之體。當相覆冒。方則俱方。圓則俱圓。無方圓不同之義也。其光曜布列。各自運行。猶江海之有潮汐。萬品之有行藏也。渾蓋之家。依易立說云。天運無窮。或謂渾然包地。或謂渾然而蓋天。愚謂若必天裏地。似卵含黃。則地是天中一物。聖人何別爲名而配天乎。古之遺語。日月行於飛谷。謂在地中也。不聞列星復流於地。又飛谷一道。何以容此。

且谷有水體日爲火精冰炭不共器得母傷日之明乎此蓋天所以爲臣難也或難曰周禮有方圓之丘祭天地則知乾坤有方圓體也答曰郊祭大報天而主日配月月形圓圓丘似之非天體也祭方者別之於天尊卑異位何足怪哉周髀之術多是蓋天蓋天雖與渾異而星辰有常數今陳氏見髀上冠周因言周渾周髀宣夜或人姓名猶星家有甘石也蓋天之體轉四方地卑不動天周其上故云周髀宣明也夜幽也幽明之數其術兼之故云宣夜但無師說不知其術如何太平御覽二自天高窮於無窮至萬品之有行藏也參用晉隋二書天文志夜幽也及但無師說二句參用書正義

附四家論天

蓋天

天員如張蓋地方如棋局天旁轉如推磨而左行日月右行隨天左轉故日月實東行而天牽之以西沒譬之於蟻行磨石之上磨左旋而蟻右去磨疾而蟻遲故不得不隨磨以左迴焉天形南高而北下日出高故見日入下故不見天之居如倚蓋故極在人北是其證也極在天之中而今在人北所以知天之形如倚蓋也日朝出陽中暮入陰中陰氣暗冥故沒不見也夏時陽氣多陰氣少陽氣光明與日同輝故日出即見無蔽之者故夏日長

也。冬天陰氣多，陽氣少，陰氣暗冥掩日之光，雖出猶陰不見，故冬日短也。晉天文志引周禮家隋志同

宣夜

天了無質，仰而瞻之，高遠無極，眼瞀精絕，故蒼蒼然也。譬之旁望遠道之黃山，而皆青。俯察千仞之深谷而窈黑。夫青非真色，而黑非有體也。日月衆星，自然浮生虛空之中，其行其止，皆須氣焉。是以七曜或逝或往，或順或逆，伏見無常，進退不同。由乎無所根繫，故各異也。故辰極常居其所，而北斗不與衆星西沒也。記同上隋攝提填星御覽二引此二字皆東行，日行一度，月行十三度，遲疾任情，其無

所繫著可知矣。若綴附天體不得爾也。

晉書天文志云宣夜

之書亡唯漢秘書郎郝萌記先師相傳宣夜說云

與太平御覽引抱朴子畧同蓋晉書取於葛稚川

吳姚信昕天論

隋經籍志梁有
昕天論一卷

天北高南下。若車之軒。若使天裏地如卵含雞。地何所倚立而自安固。若有四維柱石。則天之運轉將以相害。使無四維。因水勢以浮。則非立性也。若天經地行於水中。則日月星辰之行。將不得其性。是以兩地之說。下地則上地之根也。天行乎兩地之間矣。人爲靈蟲。形最似天。今地形立於下。天象運乎上。譬如人頤前多臨胷。而項不能覆背。近取

諸身故知天體南低入地北則偏高也嘗覽漢書
云冬至日在牽牛去極遠夏至日在東井去極近
冬至極低天運近南故日去人遠斗去人近北天
氣至故冰寒也夏至極起天運近北故斗去人遠
日去人近南天氣至故蒸熱也極之高時日所行
地中淺故夜短天去地高故晝長極之低時日所
行地中深故夜長天去地下淺故晝短然則天行
寒依於渾夏依於蓋也

太平御覽二語參用晉書天文志嘗覽漢書天文志已下廿三字參用宋書天文志

晉虞聳

太平御覽引作曷

穹天論

天形穹隆如雞子幕其際周接四海之表

御覽二作如笠

而冒地浮於元氣之上譬如覆盆乾象通鑑作漚以抑水之表

而不沒者氣充其中故也日繞辰極沒西而還東不出入地中天之有極猶蓋之有斗也天北下於地三十度極之傾在地卯酉之北亦三十度人在卯酉之南十餘萬里故斗極之下不爲地中當對天地卯酉之位耳日行黃道繞極極北去黃道百一十五度南去黃道六十七度二至之所舍以爲長短也

晉隋二書

書論

晉王羲之

夫三端之妙莫先乎用筆六藝之奧莫若乎銀鉤昔秦丞相李斯見周穆王書七日興歎患其無骨蔡尚

書入鴻都觀碣十旬不返嗟其出羣故知達其源者
少闇其理者多近代以來多不師古緣情棄道纔記
姓名學不該贍聞見又寡致使成功不就虛費精力
自非通靈感物不可與談斯道矣今刪李斯筆妙更
加潤色總七條并作其形容列事如左貽諸子孫永
爲模範庶將來君子時復覽焉

要先取崇山絕仞中兔毛八月九月收之筆頭長一
寸管長五寸鋒齊要强者硯取煎涸新石潤澀相兼
又浮津耀墨者其墨取廬山之松煙代郡之鹿角膠
十年已上強如石者紙取東陽魚卵虛柔滑淨者然
後靜神慮思揮襟作之先學執筆若真書去頭二寸

一分一云二分下墨點畫芟芟波屈曲真草皆須盡一身之力而送之若初學先大書不得從小善鑒者不寫善寫者不鑒凡書多肉微骨者謂之墨猪多力豐筋者勝無力無筋者病一一從其消息而用之若作橫畫必須隱隱然可畏若作蹙鋒如長風忽起蓬勃一家若飄散離合如雲中別鶴遙遙然若作引戈如百鈞弩發若作抽針如萬歲枯藤若作屈曲如武人勁弩劖節若作波如崩浪雷奔若作鉤如山將岌岌然一云里陣雲隱隱如千然如高峯墜石磕磕然陸斷犀象百鈞弩劖節弩發一萬歲枯藤崩浪雷奔刀勁弩劖節夫執筆有七種有心急而執筆緩者有心緩而執筆

急者若執近而能豎者心手不齊意後筆前者敗若執筆遠而急心前筆後者勝又有十一種結構員滿如篆法飄颻灑落如章草兇險可畏如八分窈窕出入如飛白耿介峙立如鶴頭鬱跋縱橫如古隸盡心存委曲每爲字各一象其形斯道妙矣書道畢矣永和四年於上虞製記此二段朱長文云舊傳古軍所人之辭故錄之下又有論二段朱長文云舊傳古軍所文云後之學者所述也故不並錄

周泰伯三讓論

晉孫盛

孔子曰泰伯其可謂至德也已矣三以天下讓民無得而稱焉鄭元以爲託採藥而行一讓也不奔喪二讓也斷髮文身三讓也三者之美皆蔽隱而不著王

肅曰其讓隱故民無得而稱焉盛謂元既失之而肅亦未爲暢也(元)之所云三跡顯然天下所共見也何得云隱而未著乎三跡苟著則高讓可知亦復不得云其讓隱也蓋泰伯之出讓迹已露不奔喪故一事耳斷髮之言與左傳明文相背又不經也然則稱三讓者其在古公至文王乎周之王業顯於亶父受命於昌泰伯(元)覽棄周天子之位一讓也假託遜遁受不赴喪之譏潛推大美二讓也無(允)嗣而不養仲雍之子以爲己後是其深思遠防令周嫡在昌天人叶從四海悠悠無復纖介疑惑三讓也凡此三者帝王之業故孔子曰三以天下讓言非直常讓若臧札之

倫者也。

老聃非大賢論

案賢舊誤聖今改

晉孫盛

頃獲閑居復伸所詠仰先哲之元微考大賢之靈術詳觀風流究覽行止高下之辨殆可髣髴夫大聖乘時故迹浪於所因大賢次微故與大聖而舒卷所因不同故有揖讓與干戈迹乖次微道亞故行藏之軌莫異亦有龍虎之從風雲形聲之會影響理固自然非召之也是故箕文同兆元吉於虎兕之吻顏孔俱否逍遙於匡陳之間唐堯則天稷契翼其化湯武革命伊呂贊其功由斯以言用舍影響之論惟我與爾之談豈不信哉何者大賢庶幾觀象知器預籠吉凶

是以運形斯同御治因應對接羣方終保元吉窮通
滯礙其揆一也但欽聖樂易有待而亨欽冥而不能
冥悅寂而不能寂以此爲優劣耳至於中賢第三之
人去聖有間故冥體之道未盡自然運用自不得元
同然希古存勝高想頓足仰慕淳風專詠至虛故有
棲峙林壑若巢許之倫者言行抗響如老彭之徒者
亦非故然理自然也夫形躁好靜質柔愛剛瀆所常
習曷所希聞世俗之常也是以見偏抗之辭不復尋
因應之適覩矯誑之論不復悟過直之失耳按老子
之作與聖教同者是代大匠斲駢拇較指之喻其詭
乎聖教者是遠救世之宜違明道若昧之義也六經

何嘗闢虛靜之訓。謙冲之誨哉。孔子曰。述而不作。信而好古。竊比我於老彭。尋斯旨也。則老彭之道。以籠罩乎聖教之內矣。且指說二事而已。非實言也。何以明之。聖人淵寂。何不好哉。又三皇五帝已下。靡不制作。是故易象經墳。爛然炳著。棟宇衣裳。與時而興。安在述而不作乎。故易曰。聖人作而萬物覩。斯言之證。蓋指說老彭之德。有以髡鬚類己形迹之處所耳。迹猶匿怨而友其人。左丘明恥之。丘亦恥之。豈若於吾言無所不說。相體之至也。且顏孔不以導養爲事。而老彭養之。孔顏同乎斯人。而老彭異之。凡斯數者。非不亞聖之迹。而又其書往往矛盾。粗列如左。大雅措

紳幸祛其弊盛又不達老聃輕舉之旨爲欲著訓戎
狄宣導殊俗乎若欲明宣導殊類則左袒非元化之
所孤遊非嘉遯之舉諸夏陵遲敷訓所先聖人之教
自近及遠未有譇張避險如此之遊也若懼禍避地
則聖門可隱商朝魯邦有無如者矣苟得其道則遊
刃有餘觸地元吉何違天心於戎貊如不能然者得
無庶於朝隱而神仙之徒乎昔裴逸民作崇有貴無
二論時談者或以爲不達虛勝之道者或以爲矯時
流遁者余以爲尚無既失之矣崇有亦未爲得也道
之爲物唯悅與惄因應無方唯變所適值澄渟之時
則司契垂拱遇萬動之化則形體勃興是以洞鑒雖

同有無之教異陳聖致雖一而稱謂之名殊目唐虞不希結繩湯武不擬揖讓夫豈異哉時運故也而伯陽以執古之道以御今之有逸民欲執今之有以絕古之風吾故以爲彼二子者不達圓化之道各矜其一方者耳

釋疑論

晉戴達

安處子問於元明先生曰蓋聞積善之家必有餘慶積不善之家必有餘殃又曰天道無親常與善人斯乃聖達之格言萬代之宏標也此則行成於己身福流於後世惡顯於事業獲罪乎幽冥然聖人爲善理無不盡理盡善積宜歷代皆不移行無一善惡惡相

承亦當百世俱閭。是善有常門。惡有定族。後世修行。
復可益哉。又有束修履道。言行無傷。而天罰人楚。百
羅備嬰。任性恣情。肆行暴虐。生保榮貴。子孫繁熾。推
此而論。積善之報。竟何在乎。夫五情六欲。人心所常
有。斧藻防閒。外事之至苦。苟人鬼無尤於趣舍。何不
順其所甘而強其苦哉。請釋所疑。以祛其惑。先生曰。
善哉。子之間也。史遷有言。天之報施善人。何如哉。荀
悅亦云。飾變詐而爲姦詭者。自足乎一世之間。守道
順理者。不免飢寒之患。二生疑之於前。而未能辨。吾
子惑之於後。不亦宜乎。請試言之。夫人資二儀之性。
以生稟五常之氣。以育性有修短之期。故有彭殤之

殊氣有精粗之異亦有賢愚之別此自然之定理不可移者也是以堯舜大聖朱均是育瞽叟下愚誕生有舜顏回大賢早夭絕嗣商臣極惡令允克昌夷叔至仁餓死窮山盜跖肆虐富樂自終比干忠正斃不旋踵張湯酷吏七世珥貂凡此比類不可稱數驗之聖賢既如彼求之常人又如此故知賢愚善惡修短窮達各有分命非積行之所致也夫以天地之元遠陰陽之廣大人在其中豈唯稊米之在太倉毫末之於馬體哉而匹夫之細行人事之近習一善一惡皆致冥應欲移自然之彭殤易愚聖於朱舜此之不然居可識矣然則積善積惡之談蓋施於勸教耳何以

言之夫人生而靜天之性也感物而動性之欲也性
欲既開流宕莫檢聖人之救其弊因神道以設教故
理妙而化敷順推遷而抑引故功元而事適是以六
合之內論而不議鑽之而不知所由日用而不見所
極設禮樂以開其大矇名法以束其形跡賢者倚之
以成其志不肖企及以免其過使孝友之恩深君臣
之義篤長幼之禮序朋執之好著背之則爲失道之
人譏議以之起向之則爲名教之士聲譽以之彰此
則君子行己處心豈可須臾而忘善哉何必循教責
實以期應報乎苟能體聖教之幽旨審分命之所鍾
庶可豁滯於心府不祈驗於冥中矣安處子乃避席

曰夫理蘊千載念纏一生今聞吾子大道之論足以
釋滯疑祛幽結矣僕雖不敏請佩斯言

渾天論答難

晉姜岌

渾天之說天體包裹地在其中七曜躔麗道有常率
天體旁倚故日道南高而北下運轉之樞南下而北
高二樞爲轂日道爲輪周迴運移終則復始北樞謂
之北極出地上三十六度故天北際七十二度常見
而不伏南樞謂之南極入地下亦三十六度故天南
際七十二度常伏而不見或云火陽也故外照金水
陰也故內景日爲陽精故外照月爲陰之宗應內景
而月復能外照何也對曰月光者日曜之所生是故

外景如日照也。是故瑩金澄水。得日之照。照物亦有
景。又曰。月無盈虧。盈虧由人也。日月之形體如圓丸。
各徑千里。月體向日。常有光也。月之初生。日曜其西。
人處其東。不見其光。故名曰魄。魄三日之後。漸東而
南。故明生焉。八日正在南方半之。故見弦也。望則人
處日月之間。故見其圓也。假使月初生時。移人在日
月之間。東向以視。則月光圓若望也。夏至之日。日入
戌。月初生時。則西北近日有光。及出於寅。未盡三日。
以視月。則東北近日光不盡也。研之於心。驗之於日。
月體向日有光。而言圓矣。難者又云。日曜星月。明乃
生焉。然則月望之日。夜半之時。日在地下。月在地上。

其閒隔地。日光何由得照。月闇虛安得常在日衝。對曰。日之曜也。不以幽而不至。不以行而不及。赫烈照於四極之中。而光曜煥乎宇宙之內。循天而曜星月。猶火之循炎而升。及其光曜無不周矣。惟衝不照。名曰闇虛。舉日及天體。猶滿面之賁鼓矣。日之光炎。在地之上。因礙地不得直照而散。故薄天而照則遠。在地之上。散而直照則近。以斯言之。則日光應曜星月。有何礙哉。易傳曰。日夜食則星亡。無日以曜之故也。難云。地上不得直照而散。故薄天而照遠。驗先望一日。日未入地。而月已出。相去三十餘萬里。日光地上散而直照。不應及月。而使月明光者。何也。對曰。薄天

而照則遠。是言礙地廣難耳。水流濕火就燥類相從也。月者星類也。日光直照雖不及月。今燃一燭在上。一燭在下。滅下燭使煙相當。則上燭之炎循煙而下。燃下燭矣。此類相從也。難者又曰。日夜食則衆星亡。驗月體不大於地。今日在地下。月在地上。地體大尚不能掩日。使不照月。月體小於地。安能掩日。使不照曜星也。對曰。上元之初。日月如疊璧。五星如連珠。故曰重光。重光者。日在上。月次之。星居下。地在宿內。故不掩日。日光循星月而曜之也。月在星宿之外。故掩日光不得照星也。案晉志云後秦姚興時天水姜岌造三紀甲子元歷又著渾天論此當即在其中

渾天論

梁祖 暱

自古論天者多矣。而羣氏紛紜。互相非毀。竊覽同異。稽之典經。仰觀辰極。傍矚四維。覩日月之升降。察五星之見伏。校之以儀象。覈之以晷漏。則渾天之理信而有徵。輒遺衆說。附渾儀云。考靈曜先儒求得天地相去十七萬八千五百里。以晷景驗之。失於過多。既不顯求之之術。而虛設其數。蓋誇誕之辭。非聖人之旨也。學者多因其說而未之革。豈不知尋其理歟。抑未能求其數故也。王蕃所考較之前說。不啻減半。雖非揆格所知。而求之以理。誠未能遙趣其實。蓋近密乎。輒因王蕃天高數以求冬至春秋分日高。及南戴。

日下去地中數法令表高八尺與冬至景長一丈三尺各自乘并而開方除之爲法天高乘表高爲實實如法而一得四萬二千六百五十八里有奇即冬至日高也以天高乘冬至景長爲實實如法得六萬九千三百二十里有奇即冬至南戴日下去地中數也求春秋分數法令表高及春秋分景長五尺三寸九分各自乘并而開方除之爲法因冬至日高實而依法除之得六萬七千五百二里有奇即春秋分日高也以天高乘春秋分景長爲實實如法而一得四萬五千四百七十九里有奇即春秋分南戴日下去地中數也南戴日下所謂丹穴也推北極里數法夜於

地中表南傳地遙望北辰紐星之末令與表端參合
以人目去表數及表高各自乘并而開方除之爲法
天高乘表高數爲實實如法而一即北極紐星高里
數也天高乘人目去表爲實實如法即去北戴極下
之數也北戴斗極爲空桐日去赤道表裏二十四度
遠寒近暑而中和二分之日去天頂三十六度日去
地中冬夏春秋辰昏晝夜皆同度也而有寒暑者地
氣上騰天氣下降故遠日下寒近日下暑非有遠近
也猶火居上雖遠而炎在旁雖近而微視日在旁而
大居上而小者仰矚爲難平觀爲易也由視有夷險
非遠近之效也今懸珠於百仞之上或置之於百仞

之前從而觀之則大小殊形先儒弗斯取驗用繁翰
墨夷途頓轡雄辭折辨不亦迂哉今大寒在冬至後
二氣者寒積而不消也大暑在夏至後二氣者暑積
而未歇也寒暑均和乃在春秋分後二氣者寒暑積
而不平也譬之火始入室而未甚溫弗事加薪久而
愈熾既移遷之猶有餘熱也已上載隋書天文志上用之參校月行
有中道有陰道有陽道如姜岌說周髀云日徑千二
百五十里蓋天乖謬已詳前識無足採焉以渾象言
之失於過大矣張衡日月共徑當天周七百三十六
分之一地廣二百三十二分之一按此而論天周分
母圓周率也地廣分母圓徑率也以八約之得周率

九十二徑率二十九其率傷於周多徑少衡之疎也
衡以日月之徑居一度之半又言八極之維旣非考
定日月之徑又不明其理飾辭華說不足窮覈者也
望日月法立於地中以人目屬徑寸之管而望日月
令日月大滿管孔及定管長以管徑乘天高管長除
之即日月徑也月陰精也其形圓其質稟日之光而
見其體日光不照則謂之魄故月望之日日月相望
人居其閒盡觀其質故形圓也二弦之日日照其側
人觀其旁故半魄半明也晦朔之日日照其表人在
其裏故形不見舊說曰月行九道斯蓋未究月行之
變而假爲其說謹按著作郎張東對三道九行曰按

漢天文志。日有三道。月有九行者。謂日月行黃道爲得其正。或行黃道外。或行黃道內。內外及正行。因名三道。故曰房有四表三道。日月經房星南門。即爲旱。經房星北門。爲水。日有三道者。但內外差及正行之道也。月有九行。謂青道二。出於黃道東。赤道二。出於黃道南。白道二。出於黃道西。黑道二。出於黃道北。故鄭元注月令。立春春分。日行青道。月爲之佐。立夏夏至。日行赤道。月爲之佐。立秋秋分。日行白道。月爲之佐。立冬冬至。日行黑道。月爲之佐。故月之九行。非爲黃道外。別有九道。交橫繹絡。貫於纏舍。但爲日月。既爲動物。不能不小有盈縮。或行黃道內外。又按日月。

以立春合宿在營室。即北方之星。色當言黑。春分宿日在奎。奎爲西方之宿。色當言白。而鄭元言立春春分日行青道。蓋以歲起於春。春在於東。東方色青。故起青號。南西及北三方准此。故知日月共有三道。實無九行。但以因八節之差。順四時之色。曲爲立名。故月行言九。直舉其實。故日道稱三。三道九行。其義一也。則云日之三道。躔於二十八宿。月之九行。經於八

節宿。

以下當有闕文

養生論

後魏高湛

王叔和。高平人也。博好經方。洞識攝生之道。嘗謂人曰。食不欲雜。雜則或有所犯。當時或無灾患。積久爲

人作疾尋常飲食每令得所多浪令人彭亨短氣或致暴疾夏至秋分少食肥膩餅臙之屬此物與酒食瓜果相妨當時不必即病入秋節變陽消陰長寒氣總至多至暴卒良由涉夏取冷大過飲食不節故也而不達者皆以病至之日便謂是受病之始而不知其所由來者漸矣豈不惑哉

書法論

唐徐浩

周官內史教國子六書書之源流其來尚矣程邈變隸體邯鄲傳楷法事則樸畧未有能工厥後鍾善正書張稱草聖右軍行法小令破體皆一時之妙近古以來蕭永歐虞頗得筆勢褚薛以降自謂不譏矣人

謂虞得其筋。褚得其肉。歐得其骨。當矣。夫鷹隼乏彩。
而翰飛戾天。骨筋而氣猛也。翬翟備色。而翹翔於百
步。肉豐而力沈也。若藻曜而高翔。書之鳳皇矣。歐虞
爲鷹隼。陸褚爲翬翟焉。歐陽率更云。蕭書出於章草。
頗爲知言。然歐陽飛白。曠古無比。余年在齟齬。便工
翰墨。忘寢與食。胼胝筆研。而性不能逾。力不可強。勁
而愈拙。勞而無功。區區碑石之間。矻矻几案之上。亦
古人所恥。吾豈忘情耶。德成而上。藝成而下。殷鑒不
遠。何學書爲。必以一時風流。千里面目。斯亦愈博奕。
亞於文章矣。發揮聖賢事業。其由斯乎。初學之勢。特
須藏鋒。鋒若不藏。字則有病。病且未去。能何有焉。字

不欲踈亦不欲密亦不欲長亦不欲短小展令大大
蹙令小踈肥令密密瘦令踈斯亦大經矣筆不欲捷
亦不欲徐亦不欲平亦不欲側側豎令平峻勿令傾
捷則須安徐則須利如此則其大較矣張伯英臨池
學書池水盡黑永師登樓不下四十餘年張公精熟
號草聖永師拘滯終著能名以此而言非一朝一
夕所能盡美俗云書無百日工蓋悠悠之談也宜白
首工之豈可百日乎汝曹年未弱冠但當研精覃思
心目想時復問本驗顧_誤短長可致佳境耳鍾
太傅坐則畫地數步卧則書被穿表裏由是乃爲翰
墨之龜鑑耳

說

渾天象說

吳王 蕃

虞書稱在璇機玉衡以齊七政則今渾天儀日月五星是也。鄭元說動運爲機持正爲衡皆以玉爲之視其行度觀受禪是非也。渾儀羲和舊器歷代相傳謂之機衡其所由來有原統矣而斯器設在候臺史官禁密學者寡得聞見穿鑿之徒不解機衡之義見有七政之言因以爲北斗七星構造虛文託之讖緯史遷班固猶尚惑之。鄭元有贍雅高遠之才沈靜精妙之思超然獨見改正其說聖人復出不易斯言矣。上見宋書天文志渾儀以察三光分宿度象以著天體布星辰。

按斯二者以考於天蓋詳察矣鉤上見北堂書幽平之後周室遂卑天子不能頒朔魯歷不正百有餘年以建申之月爲建亥而怪蟄蟲不伏也歷紀廢壞道術侵亂渾天之義傳之者寡末世之儒或不聞見各以私意爲天作說故有周髀宣夜之論宣夜之學絕無師法周髀見行於世考驗天狀多所違失依劉洪乾象歷之法而論渾天曰太平御覽二引有渾天之開元占經刪當是前儒舊說天地之體狀如鳥卵天包地外猶殼之裹黃也周旋無端其形渾渾然故曰渾天也周天三百六十五度五百八十九分度之百四十五東西南北展轉周規北堂書鈔半覆地上半在地

下故二十八宿半見半隱以赤儀準之其見者常百八十二度有奇是以察知其半覆地上半隱地下其二端謂之南極北極天之中也北極在正北出地三十六度南極在正南入地亦三十六度兩極相去一百八十二度半強衆星皆移而北極不徙猶車輪之有輻軸也繞北極徑七十二度常見不隱謂之上規繞南極七十二度常隱不見謂之下規是也上規去南極下規去北極皆二百四十四度半強以二規於渾儀爲中規赤道帶天之絃去兩極各九十一度少強黃道日之所行也半在赤道外半在赤道內與赤道東交於角五少弱西交於奎十四少強其出赤道

外極遠者出赤道二十四度斗二十一度是也其入赤道內極遠者入赤道二十四度井二十五度是也日南至在斗二十一度去極百一十五度少強是日最南去極最遠故景最長黃道斗二十一度出辰入申故日出辰入申晝行地上百四十六度強故日短夜行地下二百一十九度少弱故夜長自南至之後日去極稍近故景稍短日晝行地上度稍多故日稍長夜行地下度稍少故夜稍短日行度稍北故日出入稍北以至於夏至日在井二十五度去極六十七度少強是日最近北去極最近故景最短黃道井二十五度出寅入戌晝行地上二百一十九度少弱故

日長夜行地下百四十六度少強故夜短自夏至之後日去極稍遠故景稍長日晝行地上度稍少故日稍短夜行地下度稍多故夜稍長日所在度稍南故出入稍南以至於南至而復初焉斗二十一度井二十五度南北相較四十八度春分日在奎十四少強秋分日在角五少弱此黃赤二道之交中也去極俱九十一度少強南北處斗二十一井二十五之中故景居二至長短之中奎十四角五出卯入酉故日亦出卯入酉日晝行地上夜行地下俱百八十二度半強故日見之漏五十刻不見之漏五十刻謂之晝夜同夫天之晝夜以日出入爲分人之晝夜以昏明爲

限日未出二刻半而明日入後二刻半而昏故損夜
五刻以增晝刻是以春秋分之漏晝五十五刻渾天
遭周秦之亂師徒斷絕而喪其文唯渾儀尚在候臺
此堂書鈔尚作常是以不廢故其法可得言太平御覽二至
於纖微委曲闕而不傳御覽有蔡邕以爲精微深妙百世不易之道周天
里數無聞焉爾而洛書甄曜度春秋考異郵皆云周
天一百七萬一千里至以日景驗之違錯甚多然其
流行布在衆書通儒達士未之考正是以不敢背捐
舊術獨據所見故按其說更課諸數以究其意也古
歷皆云周天三百六十五度四分度之一皆分一百
七萬一千里數爲一度得二千九百三十二里七十

一步二尺七寸四分大强案宋書天文志及晉書天
文志大強二字皆作四百
八十七分分之三百六十二開元占經改之也

斗下

分宋晉志未引

大弱二字當亦是占經改

斗下

亦是占經改

斗下

分爲七百三十三里一十七步五尺一寸八分大弱。
三光之行不必有常術家以算追而求之故諸家之
歷各有異同漢靈之末四分歷與天違錯時會稽東
部都尉太山劉洪善於推候乃考術官及史自古至
今歷法原其進退之行察其出入之驗視其往來度
其終始課較其法不能四分之一減以爲五百八十
九分之一百四十五更造乾象歷以追日月五星之
行比於諸家最爲精密今史官所用則其歷也故所
作渾象諸分度節次及昏明中星皆更以乾象法作

之周天一百七萬一千里以乾象法分之得二千九百三十二里八十步三尺九寸五分弱斗下分爲七百二十一里二百五十九步四尺五寸二分弱乾象全度張古歷零度九步一尺二寸一分弱斗下分減古歷斗下分十一里五十八步六寸六分弱其大數俱一百七萬一千里斗下分減則全度純數使其然也又陸續云周天一百七萬一千里東西南北徑三十五萬七千里立徑亦然此蓋天黃赤道之徑數也渾天蓋天黃赤道周天度同故續取以言耳此言周三徑一也古少廣術用率圓周三中徑一臣更考之徑一不翅周三率周百四十二而徑四十五以徑率

乘一百七萬一千里以周率約之得徑三十三萬九
千四百一里一百二十二步三尺二寸一分七十一
分分之十東西南北及立徑皆同半之得十六萬九
千七百里二百一十一步一尺六寸百四十二分分
之八十一地上去天之數也夫周天徑目前定物圖
蓋天者尚不考驗而乃論天地之外日月所不照陰
陽所不至目精所不及儀衡所不測皆爲之說虛誕
無徵是亦鄒子瀛海之類也臣謹更以晷景考周天
里數按周禮大司徒之職立土圭之法測土深正日
景以求地中日南則景短多暑日北則景長多寒日
東則景夕多風日西則景朝多陰日至之景尺有五

寸謂之地中。鄭衆云。土圭之長尺有五寸。以夏至立八尺表。中景適與圭等。謂之地中。今潁川陽城地爲然。鄭元云。凡日景於地。千里而差一寸。景尺有五寸者。南戴日下萬五千里也。誠以八尺之表。而有尺五寸景。是立八十。而旁十五也。南萬五千里。而當日下。則日當去其下地八萬里矣。從日斜射陽城。則天徑之半也。天體圓如彈丸。地處天之半。而陽城爲中。則日春秋冬夏昏明晝夜。去陽城皆等。無盈縮矣。故知從日斜射陽城。爲天徑之半也。以勾股之法言之。旁萬五千里。則句也。立八萬里。則股也。從日斜射陽城。則徑也。以勾股求弦法入之。得八萬一千三百九十。

四里三十步五尺三寸六分天徑之半而地上去天
之數也倍之得十六萬二千七百八十八里六十
步四尺七寸二分天徑之數也以周率乘之徑率約
之得五十一萬二千六百八十七里六十八步一尺
八寸二分周天之數也減甄曜度考異郵五十五萬
七千三百一十二里有奇一度凡一千四百六里百
二十四步六寸四分十萬七千五百六十五分分之
一萬九千四十九減舊度千五百二十五里二百五
十六步三尺三寸二十一萬五千一百三十分分之
十六萬七百三十夫末世之儒多妄穿鑿減增河洛
竊作讖緯其言浮虛難悉據用六官之職周公所制

句股之術目前定數晷景之度事有明驗以此推之

近爲詳矣黃赤二道相與交錯其間相去二十四度

以兩遊儀準之二道俱三百六十五度有奇

隋書天文志引

此下有又赤道見者常百八十二度半強又南北考之天見者亦一百八十二度半強當是占經刪太平考

御覽二引與隋志同是以知天體圓如彈丸隋志引此下有南

北極出地三十六度是知南極入地亦三十六度而

兩相去百八十二半強也亦可證

而陸績造渾象其形如鳥卵然則黃

道應長於赤道矣績云天東西南北徑三十五萬七
千里然則績亦以天形正圓也而渾象爲鳥卵則爲

自相違背

隋志引作而陸績所作渾象形如鳥卵以二道不得如法若使二道同規則其間

當長於赤道又兩極相去不翅百八十二度半強案相去不得滿二十四度若令相去二十四度則黃道

續說云天東西徑三十五萬七十里直徑亦然則續意亦以天爲正圓也器與言謬頗爲乖僻當是占經

月行二十七日有竒而周天其行半出黃道外半入黃道內在內謂之陰道在外謂之陽道其行陰陽道極遠者不過六度黃道無常諸家各異各依其歷節氣所行宿度尚書月令太初三統四分乾象各不同昏明亦異日行蹉跌不遵常軌之所爲也夫三光之行雖有盈縮天地之體常然不變故諸家之歷皆不著渾象爲黃道當各隨其歷而錯之而今臣所施黃道乾象法也審校春秋二分於一先代諸歷差而冬夏二至恒在二分張中蕃按渾象之法地當在天中其勢不便故反觀其形地爲外匡於已解人無異

在內詭狀殊體而合於理可謂奇巧古舊渾象以二分爲一度凡周七尺三寸半分漢張衡更制以四分爲一度凡周一丈四尺六寸一分臣以古制局小以布星辰相去稠密不得了察而張衡所作又復過大難可轉移前表聞以三分爲一度事許令臣所作周一丈九寸五分四分分之三張古法三尺六寸五分四分分之一減張衡亦三尺六寸五分四分分之一渾象法黃道赤道各廣一度有半故今所作渾象黃赤道各廣四分半相去七寸二分渾儀中筭爲璇機外規爲玉衡

案開元占經以爲渾天象說太平御覽北堂書鈔引作渾天說隋書經籍志有此宋書天文之文

渾天象注一卷吳散騎常侍王蕃撰即此

天文志所載俱未及占經之備故據而錄之

晉書天象

北堂書鈔引作渾天說隋書經籍志有此宋書天文之文


北堂書鈔引作渾天說隋書經籍志有此宋書天文之文

北堂書鈔引作渾天說隋書經籍志有此宋書天文之文

北堂書鈔引作渾天說隋書經籍志有此宋書天文之文

續古文苑卷第九

又據宋志及北堂書鈔以補於首而
太平御覽隋志亦詳注每條之下而



續古文苑卷第十

賜進士及第授通奉大夫山東通省督糧道加三級孫星衍撰
記

封禪儀記

漢馬第伯

車駕正月二十八日案建武十三年也發雒陽宮二月九日到魯遣守謁者郭堅伯將徒五百人治泰山道十日魯遣宗室諸劉及孔氏瑕丘丁氏上壽受賜皆詣孔氏宅賜酒肉十日發十二日宿奉高是日遣虎賁郎將先上山三案行還益治道徒千人十五日始齋國家居太守府舍諸王居府中諸侯在縣庭中齋諸卿校尉將軍大夫黃門郎百官及宋公衛公褒成侯東

方諸侯雒中小侯齋城外汶水上太尉太常齋山虞
案應劭漢官儀此下有馬第伯自云五字某等七十人先之山虞觀祭山壇及故明堂宮郎官等郊肆處入其幕府觀治石石二枚狀博平圓九尺此壇上石也其一石武帝時石也時用五車不能上也因置山下爲屋號五車石四維距石長丈二廣三尺厚尺半所四枚檢石長三尺廣六寸狀如封篋長檢十枚一紀號石高丈二尺廣三尺厚尺二寸名曰立石一枚刻文字紀功德是朝上山騎行往往道峻峭不騎步牽馬乍步乍騎且相半至中觀留馬去平地二十里南向極望無不覩仰望天闕如從谷底仰觀抗峯其爲高也如視浮雲其

峻也石壁窅窔如無道逕

案此下舊衍

遙字今刪

望其人端如

行杆兀

案此句望人如孟升疑當云望其端行人如二升杆

行杆作御覽

三十引應劭漢官儀作

或以爲小

御覽補

白石或以爲冰

御覽補

雪久之

御覽補

三字

望其人端如

行杆兀

案此句望人如孟升疑當云望其端行人如二升杆

行杆作御覽

三十引應劭漢官儀作

白者移過樹乃知是人也殊不可上四布僵卧石上有頃復蘇亦賴齋酒脯處處有泉水目輒爲之明復勉強相將行到天關自以已至也問道中人言尚十餘里其道旁山脅大者廣八九尺狹者五六尺仰視巖石松樹鬱鬱蒼蒼若在雲中俛視谿谷碌碌不可見丈尺遂至天門之下仰視天門寥遼如從穴中視天直上七里賴其羊腸逶迤名曰環道往往有組索可得而登也兩從者扶挾前人相牽後人見前人履

底前人見後人頂如畫重累人矣所謂磨曾揜石捫天之難也初上此道行十餘步一休稍疲咽脣焦五六步一休牒牒據頓地不避濕暗前有燥地目視而兩脚不隨早食上脯後到天門郭使者得銅物銅物形狀如鍾又方柄有孔莫能識也疑封禪具也得之者汝南召陵人姓楊名通東上一里餘得木甲木甲者武帝時神也東北百餘步得封所始皇立石及闕在南方漢武在其北二十餘步得北垂圓臺高九尺方圓三丈所有兩陛人不得從上從東陛上臺上有壇方一丈二尺所上有方石四維有距石四面有闕鄉壇再拜謁人多置錢物壇上亦不掃除國家上見

案通典此
下有先字

之則詔書所謂醉梨酸棗狼籍散錢處數百弊帛具道是武帝封禪至泰山下未及上百官爲案通典此
下有先字上跪拜置梨棗錢於道以求福即此也東山名曰日觀日觀者雞一鳴時見日始欲出長三丈所秦觀者望見長安吳觀者望見會稽周觀者望見齊西北有石室壇以南有玉盤中有玉龜山南脅神泉飲之極清美利人日入下去行數環日暮時頗雨不見其道一人居其前先知蹈有人乃舉足隨之比至天門下夜人定矣車駕十九日之山虞國家居亭百官布野此日山上雲氣成宮闕百官並見之二十一日夕牲時白氣廣一丈東南極望致濃厚時天清和無雲案

劉昭引不備說見下云云當有二十日云云

晨祭也日高二丈所燔燎燔燎

煙正北升

禮畢

案舊無此三字今補

百官各以次上郡儲輦三

百爲貴臣諸公王侯卿大夫百官皆步上少用輦輦者國家御首輦人輓升山至中觀休須臾復上

案中當有

日中後到山云云

須臾羣臣畢就位

案中當有

國家臺上北面

虎賁陞戟臺下

案中當有云云

驕騎二千餘人發壇上方石

案中當有

以金爲繩以石爲檢

南方北方各

案舊無此七字今補

二檢

東方西方各三檢

檢中石泥及壇土色

黃青

案中當有

赤白黑各依其方色

案中當有云云

劉昭引記畧凡志正文與記畧

其複見也今無以補之

故每省志

今補

稱萬歲音動山谷有青

案舊

今補

氣屬天遙望不見山巔山巔人在氣中不知

無此字

案舊

也封畢。有頃詔百官以次下國家隨後數百人維持行相逢推。百官連延二十餘里。道多迫小深谿高岸數百丈。步從匍匐邪下。近起案舊誤作上
起近今改炬火。止亦

駱驛步從觸擊大石。石聲正譙。但譙石見相應和者。腸不能已。口不能默。夜半後到。百官明日乃訖。其中老者氣劣不能行。卧巖石下。明日早。

案此二十

太醫

令復導問起居。國家云。昨上下山。欲行迫前。欲休則後人所蹈。道峻危險。恐不能度。國家不勞。百官以下露卧水飲。無一人蹉跌。無一人疾病。豈非天耶。泰山率多暴雨。如今上直下柴。祭封登清晏溫和。案此當有脫文其案舊誤作明今改日上壽賜百官省事。事畢發暮宿奉

高三十里明日案此二十日也發至梁甫九十里夕牲案當有二十五日云云考志云泰山二十一日甲午禪於梁陰以此推之上辛卯柴登封其日爲三十日無疑也功效如彼天應如此羣臣上壽國家不聽劉昭下當有云云不備引

鄒君開通褒斜道記

永平六年漢中郡以詔書受廣漢蜀郡巴郡徒二千六百九十人開通褒余道太守鉅鹿鄒君部掾治級王宏史荀茂張宇韓岑弟典功作太守丞廣漢楊顯將相用始作橋格六百卅三閒大橋五爲道二百五十八里郵亭驛置徒司空褒中縣官寺并六十四所最凡用功七十六萬六千八百餘人瓦卅六萬九

千八百四

案今拓本以下捐泐據宋紹熙甲寅南鄭令晏袤釋補

器用錢百四

十九萬九千四百餘斛粟九年四月成就益州東至

京師安隱

案晏云一百五十有九字釋尚有缺不詳當何字上下也

武氏林記

建和元年大歲在丁亥三月庚戌朔四日癸丑孝子
武始公弟綏宗景興開明使石工孟孚季弟卯造此
闕直錢十五萬孫宗作師子直四萬開明子宣張仕
濟陰年廿五曹府君察舉孝廉除敦煌長史被病卒

歿苗秀不遂嗚呼哀哉士女癒傷

金石錄云數墓在任城開明

者仕爲吳郡府丞綏宗名梁仕爲辟從事宣張名班皆自有碑

武都太守李翕天井道記

蓋除患蠲難爲惠鮮能行之斯道狹阻有坂危峻天
井臨深之阨冬雪則凍渝夏雨滑汰頓躡傷害民苦
拘駕推排之役勤勞無已過者戰戰以爲大憾太守
漢陽阿陽李君履之若辟風雨部西部道橋掾李禩
■鑿鋌西坂天井凶止■入丈四尺堅無召潰安無
傾覆四方賴之民悅無疆君德惠也刊勒紀述以示
萬載建寧五年四月廿五日己酉訖成

造戾陵遇記

魏使持節都督河北道諸軍事征北將軍建城鄉侯
沛國劉靖字文恭登梁山以觀源流相漂水以度形
勢嘉武安之通渠羨秦氏之殷富乃使帳下督丁鴻

案十
當作百

軍士千人以嘉平二年立遏於水導高梁河造戾陵
遏開車箱渠其遏表云高梁河水者出自并州潞河
之別源也長岸峻固直截中流積石籠以爲主遏高
一丈東西長三十丈當作百南北廣七十餘步依北
岸立水門門廣四丈立水十丈山水暴發則乘遏東
下平流守常則自門北入灌田歲二千頃凡所封地
百餘萬畝至景元三年辛酉詔書以民食轉廣陸廢
不贍遣謁者樊晨更制水門限田千頃刻地四千三
百一十六頃出給郡縣改定田五千九百三十頃水
流乘車箱渠自薊西北逕昌平東盡漁陽潞縣凡所
潤含四五百里所灌田萬有餘頃高下孔齊原隰底

平疏之斯溉決之斯散導渠口以爲濤門灑漑池以爲甘澤施加於當時敷被於後世晉元康四年君少子驍騎將軍平鄉侯宏受命使持節監幽州諸軍事領護烏丸校尉寧朔將軍遏立積三十六載至五年夏六月洪水暴出毀損四分之三剩北岸七十餘丈上渠車箱所在漫溢追惟前立遏之勲親臨山川指授規畧命司馬闢內侯逢惲內外將士二千人起長岸立石渠修主遏治水門門廣四丈立水五尺疑當作丈興復載利通塞之宜準遵舊制凡用功四萬有餘焉諸部王侯不召而自至縕負而趨事者蓋數千人詩載經始勿亟易稱民忘其勞斯之謂乎於是二府

文武之士感秦國思鄭渠之績魏人置豹祀之義乃
遐慕仁政追述成功元康五年十月十一日刊石立
表以紀勲烈并記遏制度永爲後式焉

陶隱居井欄記

梁陳宣懋

先生丹陽陶仕齊奉朝請壬申歲來山棲身高靜自
號隱居同來弟子吳郡陸敬游其次楊王吳戴陳許
諸生供奉階宇湖孰潘遷及遠近宗稟不可具記悠
悠歷代詎勿識焉梁天監三年八月十五日錢塘陳
宣懋記此記文無可采因其刻既失載之以備故迹

武德郡建沁水石橋記

後魏于子建

夫梵燈遐廓長夜襲其明慧教洞開羣迷啓其目是

以神光未滅感膺於西湖金儀雖謝夢現於東漢抑
示愍世多艱下生思土運濟貫心慈悲注意歸依者
塵霧莫侵迴向者雷電不撓信是苦海之靈丹酷旱
之甘露矣惟此區域號稱舊邦舜禹懷譚之地案譚
貢覃之假借也殷周畿甸之土晉啓山陽鄭錫河後是禹秦吞六雄跨有四海罷侯置守乙統
都入魏爲鎮及秦吞六雄跨有四海罷侯置守乙統
九服項羽改名殷國漢高復立爲郡自茲以還爲河
內下邑屬皇朝遷鼎上食漳濱遂方割四縣在古州
城置武德郡焉北通燕趙堂堂之風相洽南引鞏雒
穆穆之化清西瞻軼塞則連山萬疊東望平皋則曠野千里長河帶其前太行環其後車馬之所混

舳艤之所湊集頗是一都之要害實爲三魏之遼道
若其沉洩雙吐丹絕並納勢等周原美齊陸海袂散
成帷人榮答若繡禮樂尚繁風儀未革然郡土遼廓

沁水橫流源自羊頭之山發於麻谷之口滔滔晉域
作紀懷方引漑過於鄭白流穢踰於汾滻但彼漸臺
雉岸

水潦

驚馬牛雖辨公私頓廢

胥俎乘車之義事切

朝涉之難宣威將軍懷州長史行武德郡事河南于

子建車騎將軍左光祿大夫平臯令京兆杜護宗前

將軍懷縣令趙郡李同賓征西將軍州縣令扶風馬

周洛殄難將軍溫縣令廣寧燕景裕征虜將軍郡丞

東平呂思哲或分竹專城或捍罿木百里鵠起來官
共治民瘼況同覩艱辛俱看危滯一物可矜納隍在
念敬思包鹿濟難之仁俯龜報恩之惠雖無武
庫造梁之工術且沙弥訪津之殷懃音罿曷問俗
便獲軌躅雖亡遺柱在目父傳咸屬周時
稱其板構與城俱廢乃於農隙之月各率祿力
及朝文武懷惠願七月六日經始此橋助福者
比肩獻義者聯轂人百其功共陳心力至廿四日所
便訖不煩遐邇荷擔之勞未傷士民尺寸之木雖
無匪日之美庶省浹晨之費修柱揭以挿泉華表鬱
而軼漢紅交架以綺蘭聯縣而雲布引北山

山之饒則人無遺力積南市之富而家有餘資昔伯度記功勒燕然文淵表象林之銅作述之理雖殊刊錄之情不異況四生踏駭同悲欣之境十因韜還迺勁風電之力若不歸依寶神教遠擬彼岸之喻近取成務之言恐沮勸之道未宣畫折之功虛燼乃運石立碑敬鐫圖像窮般馬之巧盡金艤之鏽使四部往來起歎慕之心六道奔趣識風雲之會其詞曰

清虛曰道正直爲神有一於此用表生民淵乎大覺至矣能仁行成元吉德伏波旬其芒禹績眇眇桓功爲魚左枉逖聽前風九州咸載五等攸同分壇敷

土俾侯樹公。其美茲舊甸。麗其新邑。渾帶山河。苞苴原隰。禮樂仍貢。風徽猶綻。青蕘可翦。潢流可挹。其粵余承乏謬廁官方。政慚春雨。威愧秋霜。情深履席。意等納隍。慕彼醫藥。眷此津梁。其渾渾沁水冀道名川。既難揭厲。又阻■船。爰始經謀。義勸競填。辰不再決。斯構已宣。其落落太虛繞繞羣有。來同聚沫。去齊過牖。敬託三尊。資馳四部。髡鬚彼岸。依憇可久。

大

魏武定七年歲次己巳四月丙戌朔八日癸巳建

端州石室記

唐李邕

日者託宿秘篆。寄傲神府。撰竒討異。注靈通感。冥搜海堧。遐矚坤極。敞金闕。疏玉堂。河漢未際。其源今昔。

嘗聆其語。乃若宛此山郭。介在江墳。薄人寰。騰物外。
妙有特起。靈表湧洞。綺田砥平。錦嶂壁立。肇允洞穴。
延袤中堂。蹙怪形以萬殊。研地勢以千變。伏虎奔象。
浮梁抗柱。激濤海而洪波沸滑。疊杳窱而羣峯嵯峨。
飛動逼人。屹聳驚視密微微而三分地道。風蕭蕭而
一變天時。竇乳練於玉顏。石牀列於仙座。隔鏘塵境。
矯集福庭。寂兮寥兮。恍兮惚兮。使營魄九昇。嗜慾雙
遣。體若羽翼。志若摩雲天。秦漢之間。莫知代祀。羲
皇之上。自謂逍遙。當是時也。慕名者執雌而退。徇物
者守心而安。求道者而凝懷書者。而默。有
若邦伯旱公守恭案旱姓未見廣孝聞觀國。

政門不容於義心厚行遊者每於能吏修其職民恬其業流冗歸止介特艾安於是命友生挾琴酌一歌一詠以遨以遊莫不解榻於斯張樂於斯加之杖龍遺土駟馬凌晨避暑窟室繙賞林巒擊石如鍾酌泉如醴固亦轉丹竈掇紫芝迹參寥之遠心惟習隱之幽致者也開元十五年正月廿五日李邕記此多數金石萃編所載

橋亭記

唐游芳

唐再受命能事備於開元乃十有三年告成於岱翠華之往也則北巡濟河王軌之旋也則南指陳宋故行宮御路次夫任城焉陽門橋者跨泗之別流當魯

之要術。初隨時以旣濟。因大駕而改功。觀其壅川爲池。因地設險。削金堰於馳道。甃石門以飛橋。夾以朱欄。揭以華表。炳若星漢。拖如虹蜺。蓋乘輿乃以陽朝御六龍。翊萬騎。聲明紀律。文物比象。迴睿覽於洲渚。駐天蹕於川梁。先時望君之來也。則金繩以界之。鐵鎖以局之。厥後榮君之顧也。則浚池以廣之。築館以旌之。經始茲宇。惠而不費。當儲峙之末。有芻粟之餘。散之則人獲壹錢。金石萃編云人字脫落秀注鳩之則動以千計。

請爲亭館以壯橋池。故鄉老老白於吏。金石萃編云叠寫老字邑吏謀於府。因人之欲。得事之宜。鼙鼓不勝。工力徒競。鬱爲層構。在水之陽。壓鮮原以迥出。流古塘而却。

倚危攔巘巘反宇峨峨勢搖煙潭岌若飛動南軒虛
明以晃朗北室懿漸而清冷自堂徂亭邇迤幽徑上
覆藤篠前臨芰荷憑高佇目萬象皆見夫河南之勝
有三橋亭得其一梁園有梁王之迹圃田有僕射之
陂平池曲榭美則美矣豈與夫島嶼開合林嶂蔽虧
旁薄大荒吐納霞景畫橋南度像清洛之規虛館■
張力臣
釋作艱臨叶滄洲之趣有是夫有是夫任風姓之國
也謠俗古遠其太昊氏之遺人富而教之合於魯頌
當太平無事而朝野多歡不然者此池何以得花縣
之名吾察何以得仙舟之目不其■
張力臣
釋作艱而時則
有若邑大夫榮陽鄭公延華信昭盈缶道契虛舟禮

樂之行。仁德歸厚。丞范陽盧瓊。主簿平昌孟景。尉瑣。
瑣王子言。尉河東裴迴。皆士林英華。學府金碧。能勤
在公之節。無廢會友之文。嘗授簡於芳。以爲之記。會
芳有公車之召。請俟於異時。金鄉尉穎川韓邠卿。舍
於裴氏。言於衆曰。游子之讓。斯文以諸公在此。諸公
之意也。子何辭焉。因命秉燭。俾芳操翰。夜而成記。翌
日遂行。開元廿六年秋七月旬有四日云。 大唐

開元廿有六年閏八月五日建。通直郎行方與尉王
日雲篆額。將仕郎守尉游芳。纂文朝散郎行尉華容
縣開國男瑣。王子言書。

遊濟瀆記

唐達奚珣

軼縣西北數十里濟水出焉稽乎舊章可得而道自河浮錄甲帝命元夷疏畊澗而正乾綱鏟林巒而通委輸所謂四瀆資我而成彼貳水者或在幽僻遠而見奇伊何足貴豈與夫體清淳之氣據函夏之中平地開源介空正綠表裏皆淨似若非深舟楫旣加乃知無底沖和自挹斯君子之量歟從此而東截河通汶不以險阻折字見文其勢不以清濁汨其流終能獨運長波滔滔入海沈潛剛克斯君子之量歟意者洞幽明貫天壤包荒萬類出入無閒形與化遊復歸於道不然何其異也雖金火更作變通殊制而浮沈之事亦無捨旃國家南正司天北正司地以爲百神

授職則陰陽無錯繆之災。羣望聿修。水土得平均之序。欽若稽古。道豈虛行。闕宮有恤。象設如在。流目一望。森森動人。覺毛髮之間。風飈四起。然後以諸侯之禮。禮而禊之。至於下人。日用蘋藻。吉凶悔吝。則以情言。且神道無方。豈存於此。而物類相召。或有馮焉。虛溜潛通。動植茲液。高樹直上。百尺無枝。虛篁下清。四時壹色。意隔人世。空聞鳥聲。陽浦先春。草心方變。啟岸猶冷。苔生未穠。紅晶落而天下陰。青靄凝而衆山暮。畱賞無厭。歸情坐忘。中途載懷。歷歷在眼。庶託豪翰。光昭厥美云。

吏部侍郎達奚珣文。右監門衛兵曹參軍薛希昌書。有唐天寶六載冬十二月己未

朝議郎行濟縣尉鄭琚建

此文金薤琳瑯所
載多誤據碑更正

春申君新廟記

唐趙居貞

輶軒莅部十有一月矣。猥以薄材，謬承重寄。歛自淮
服半刺，超爲江南方伯。郡領二十，地亘五千。皇皇者
華，幾慚輝道。兢兢其志，常識飲水。周爰諮詢，申命行
事。損以懲忿，窒欲益以改過。遷善狹狼擁路，埋輪以
逐之。騏驥伏櫪，攬轡以騁之。宣王化而盡覺，風行安
甿心而不知日用。寬猛相濟，威恩兼洽。長吏肅警，疆
土乂寧。日月其除，冰霜再履。始也務不暇給，今也處
有餘閒。別祈神仙，獲歲豐稔。乘公堂之宴，縱靈廟之
遊。城不復隍，樹无禁伐。闢陬荒以毀梁木，小而推乃

喟然歎曰。神必依人。人茲望福。依無所據。福安來哉。
昔越踐滅吳。楚威滅越。考烈王繼立。春申君登相。封
江東之巨縣。城吳墟爲大都。專主威權。救國災患。與
趙魏爲四公子。招賓旅有三千人。擠聘使之玳簪。誇
上客之珠履。王久無似君方患之。璞兮李園。託其女
弟。旣歆然而有姪。遂祕之以獻王。王乃殂落。子爲君
主。母望之人靡信。母望之禍。遄興。舍人其亡。死士常
偵。棘門之下。萬里相催。天乎天乎。胡寧忍此。令尹多
居郢國。假君恒守吳宮。鳥焚其巢。何笑號之先後。蛟
沒其舳。繫父子之沈埋。夷盡其家。賊圍之故。一朝冀
將滅口。千古猶爲痛心。今邦牧所居。使臣所理。故宮

之內。故事備聞。於是大葺堂庭。廣修偶像。春申君正陽而坐。朱英配饗其側。假君西廂視事。上客東室。齊班李園。死士庚方。授戮僕夫。閒駿辰位。呈形大雪。久寃之魂。更申如在之敬。家屬穆穆。展哀榮也。儀衛肅肅。振威名也。巨木擁腫而皆古。小栽青葱而悉新。總之一門。是謂神府。宜正名於黃相。削訛議於城隍。昔韓整守吳。剏吳伯之廟。太史適楚。壯楚相之宮。余固兼之。言可則也。神有新宇。享之落之人有貞石。追之琢之。我躬披文。紀之告之。君宜密應祐之福之初。余之拜命也。表授廣陵。糾曹張霸。兵曹蘇相爲判官。安喜尉李嵩爲支使。同郡舊知。精明深識。異途新合。歷

落壞材三人冀有我師四牡慎行爾職欽刷往賢之
恥歎垂後昆之裕長史宋尚主臣餘慶佑嶽良能司
士楊彥琮每憂司存實稱佳吏預乎作廟翼翼觀乎
降神欣欣咸亦相因斯焉附出唐天寶單闕歲除日
中散大夫守吳郡太守兼江南道採訪處置使柱國
天水趙居貞記案在天寶十
載辛卯也

黃石公祠記

唐李卓

秦滅六國遂并區宇張良哀韓之亡怒秦之暴義感
天地降神於圯神授良之書良爲帝之師滅秦報韓
成功遂志祠黃石於濟北穀城之山下蓋謂是矣世
用其道傳祠此山惟德之馨介福不替天寶歲夏六

月旱既太甚。遍走羣望。密雲卷而復舒。零雨濛而不降。太守河東裴公聚黃髮而咨謀曰。山川神祇有不舉乎。聞斯行諸。夙夜展祭祀。事未畢。感而遂通。自寅及未。澤潤千里。吁其靈也。夫聖哲立法制。君子修理道。莫不順承天則。祗畏神明。以天視無私。神功不測。或殄覆昏暴。或孚右明德。與時推移。未始有極。蓋將輔其善。必聽於人。昔夏之興也。崇山降焉。殷之興也。屹山次焉。周之興也。岐山鳴焉。漢興有圯橋之事。我唐之興有霍山之異。今古不爽。謂之神志。聰明正直而弋者也。惟秦政滅德用刑。匱人從欲。寃痛在下。馨香不登。祚及二世。毒流四海。與天自絕。惟神不蠲。有

開必先祝降寶命故其書極天之際備興亡之端子
房將有行也師焉而以言酌消息於盈虛通擬議於
變化楚漢之勢功利相百天威扶桀人謨叶贊觀釁
而動極深研機發八難銷六國之印招四人定重明
之業以斷天下之疑以奪敵國之計正乾坤之位發
日月之光所謂被堅執銳其功狗也居守饋糧其功
人也運籌帷幄之中決勝千里之外其功神也此其
大者豈徒効祉發祥於州里之間哉方今淳風允塞
休徵薦臻意者謂宜上聞有以旌異嘗學舊史敢記
所知

唐大歷

八年七月十五日

建布衣

趙郡李

卓撰前試義王府倉曹參軍裴平書

案碑陰云所題

趙郡李卓即今

臺
長
樓
筠

獨秀山新開石室記

唐鄭叔齊

城之西北維有山曰獨秀宋顏延之嘗守茲郡賦詩云未若獨秀者峩峩郢邑間嘉名之得蓋肇於此不籍不倚不騫不崩臨百雉而特立扶重霄而直上仙挹石髓結而爲膏神鑿嵌竇呀而爲室躡淳可遠幽偏自新勝槩岑寂人無知者大歷中御史中丞隴西公保障南服三年政成迺考宣尼廟於山下設東西庠以居胄子備俎豆儀以親釋菜雖峻阤可尋而藜薄未翦公乃日常從以上每指荒榛而授事爲力無幾得茲穴焉闔而外廉隘以傍達立則艮其背行則

躡其腓於是申謀左右朋進畚鍤壞之可跳者布以
增逕石之可轉者積而就階景未移表則致虛生白
矣豈非天賦其質智詳其用乎何暑往寒襲前人之
畧也譬由士君子韜迹獨居懿文遊藝不遇知已發
明則蓬蒿向晦畢命淪鹽車無所伸其駿和氏不
得成其寶矣篆刻非寵庶貽後賢建中元年八

月二十八日記監察御史裏行鄭叔齊

案記稱龍西公者隴西縣

男李昌夔也時領桂州都督兼御史中丞見平蠻碑碑及此記皆在廣西臨海

重修玉泉關廟記

唐董挺

玉泉寺覆船山東去當陽三十里疊嶂回擁飛泉迤
邐信荆口之淨界域中之絕景也寺西北三百步有

蜀將軍都督荊州事關公遺廟存焉。將軍姓關名羽。河東解人。公族功績詳於國史。先是陳光大中智顥禪師者。至自天台。宴坐喬木之下。夜分忽與神遇。云願捨此地爲僧房。請師出山。以觀其用。指期之夕。萬壑震動。風號雷號。前擘巨嶺。下涇澄潭。良材叢樸。周匝其上。輪奐之用。則無乏焉。惟將軍當三國之時。負萬人之敵。孟德且避其鋒。孔明謂之絕倫。其於殉義感恩。死生一致。斬良擒禁。此其效也。嗚乎。生爲英賢。沒爲明神。所寄此山之下。邦之興廢。歲之豐荒。於是乎繫。陸法和假神以虜任約。梁宣帝資神以拒王琳。聆其故老。安可誣也。至今緇黃入寺。若嚴官在旁。無

敢襲瀆。荆南節度使工部尚書江陵尹裴均。因政成事舉。典從禮順。以爲神道之教。依人而行。攘彼妖昏。祐我蒸庶。而祠廟墮毀。歟懸斷絕。豈守宰牧人之意耶。乃命縣令張僕。始經其事。爰從舊址。式展新規。欒博敞容。衛端肅。唯曩禪坐之樹。今則延袤數十圍矣。神明扶持。不凋不衰。胡可度思。初營建之日。白龜出於新橋。若有所感。寺僧咸見。亦爲異也。尚書以小子曾忝下介。多聞故實。見命紀事。文豈足徵。其增創制度。則列於碑右。貞元十八年辛卯。

壁書飛白蕭字記

唐崔備

壁書蕭字者。梁侍中蕭子雲之書也。韓晉公領浙西

之歲得於建業佛寺置之南徐官舍函以屋壁俯瞰
諸坐隅及晉公入贊廟墓啓乎私第朱方官吏候其
代者完葺舊府圬墁故堂吏人以壁字昏蒙方以堊
帚塗上時故殿中李侍御士舉爲部從事以晉公翰
墨代無等儕自獲壁書施榻於下耽翫妍味畧無已
時士舉重焉始而方得及士舉府除職停寓壁字於
小吏之舍至甲申歲士舉爲江西從事通好江淮時
李評事約戒閱圖書以示寮友士舉方以壁字言於
坐中李君因而求之士舉云得卿皇象羊欣蕭倫真
草各一帖大鄭畫屏一扇即輟與之不余當自持去
李君富於圖書酷好遐異遂以所求三帖并大鄭畫

屏一扇易焉。後十餘日，壁書自吳負來。士舉於道病卒。向若李君不言此書，即壁爲朽壞於小吏之家，逸品絕前賢之迹，固知興亡繼絕，後不乏人。工極藝精，中必有物。加以子雲與國同姓，所書蕭字圖卷側掠體法備焉。信曩賢之妙門，實後代之茂範。其飛白書起於蔡中郎，待詔門下。役者以堊帝成字，心有悅焉，歸而爲飛白書。漢末魏初，皆以題署宮闈。其後張敬禮、王逸少子敬，並稱妙絕。子雲曲盡其法，歐陽率更云：蕭侍中飛白濃淡得中，蟬翼掩素，其爲前賢所重如此。嗟乎！景嶠此書，今訪天下絕矣。唯此蕭字，在乎舊都，三百年閒，竟無頽圯。俾後人傳授，似陰有保持。

余與李君寓家南徐鄰而友善獲覩妙迹感其將壞
晉公出之方絕之迹李君維之用徵其事故以字志
之

周先生住山記

唐令狐楚

先生姓周氏名隱遙字息元宗其道者相號爲太元
先生汝南人也抱天和沖澹之氣含至精潔朗之質
玉冷泉潤松高鶴閒韜精守道冥得真契谷神旣存
而長守元關無鍵而不開貞元初游蘇州吳縣之包
山林屋洞秋八月始於洞西得神景觀訊其居者曰
距此數里世傳毛公塢毛公道成羅浮居山三百餘
歲有弟子七十二人聚石爲壇遺址猶存爾能勤求

吾請以導。旣行而蘿篠迷密。不知所往。先生冥目久之。逢一物焉。雙眸盡碧。毛色紫而本白。高數尺餘。隨而行之。視乃鹿也。須臾乃跪止。若有所告。先生默記之而還。至十九年冬。荆木鬚茅。奠厥攸居。得異石一方。上有蟲篆。驗之即毛公鎮地符也。旣而鑿戶牖以爲竇。有鶴御弄冠裳。戲舞於庭砌。後得一井。香白滑甘。溢爲白泉。其傍得古池焉。深廣袤丈。陽驗陰伏。湛如也。初先生嘗息於洞之南門中。神化恍惚。往往失其所在。遇好風日。亦來人間。將至必先之以雲鶴。其弟子掃灑香室。俄而至矣。嗟乎。先生之體。同乎無體矣。不以晝夜更動息。不以寒暑易纖厚。不食而甚力。

走及奔馬全乎氣者也。雖飲而無漏止如靈龜外乎形者也。鹿以導步神柔異物也。符以存視道契先躅也。井泉去癘昭乎仁也。池水不枯齊其慮也。仙雲靈鶴之驗去來鬢鬚之狀其必神行而智知乎。予叔服膺先生之門二紀於茲錄先生本起見命爲記疑神遐想直而不遺元和十三年八月華州刺史兼御史中丞令狐楚記。

修浯溪記

唐韋 詞

元公再臨道州有嫗伏活亂之恩封部歌吟旁浹於永故去此五十年而里俗猶知敬慕凡琴堂水齋珍植嘉卉雖欹傾荒翳終樵採不及焉仁聲之感物也

如此。今年春，公季子友讓以遜敏知治術爲觀察使。
袁公所厚用前寶鼎尉假道州長史路出亭下。維舟
感泣以簡書程責之不遑也。乃罄撤資俸托所部祈
陽長豆盧歸喜獲私尚會余亦以恩
例自道州司馬移佐江州帆風櫛流相畢寶鼎竦然曰茲亭剏治之始既銘於巖側矣至
於水石之秀咏賦所及則家集存焉然自空閭時餘
四紀士林經過篇翰相屬今圬墳移舊手筆云矣將
編於左方用存此亭故事既適相會盍爲志焉余嘉
其損約貧寓而能以章復舊志爲急思有以白之故
不得用質俚辭元和十三年十二月六日江州員外

司馬韋詞記襄陽嚴消書。

絳守居園池記

唐樊宗師

絳即東雍爲守理所稟參實沈分氣畜兩河潤有陶
唐冀遺風餘思晉韓魏之相剝剖世說總其土田士
人今無碗雜擾宜得地形勝瀉水施法豈新田又蕞
猥不可居州地或自有興廢原注州字或屬上句人因得附爲
奢儉將爲守悅致平理與益侈心耗物害時與自將
失敦窮華終披夷不可知睥緜孤顛跔倔元武踞守
居割有北自甲辛苞太池泓橫狹旁潭中癸次木腔
暴三丈餘涎玉沫珠餘下原注或屬上句子午梁貫亭曰洄漣
虹蜺雄雌穹鞠覲蜃礙恨島坻淹淹委委莎靡縵蘿

蕃翠蔓紅刺相拂綴南連軒井陣中湧曰香承守寢
眸思西南有門曰虎豹左書虎搏立萬力千氣底發
瀛匿地努肩腦口牙快抗電火雷風黑山震將合右

胡人鬚黃岱累珠丹碧錦襖身刀囊韃襷紹白豹

元

班飫距掌脾意相得東南有亭曰新前含曰槐有槐
員護對鬱蔭後顧渠決決緣池西直南折廡赴可宴
可衙又東騫渠曰望月又東騫窮角池研雲曰柏有
柏蒼青官士擁列與槐朋友巒陰洽色北俯渠憧憧
來刮級面西巽隅閒黃原玦天汾水鉤帶白言謁行
旦艮閒遠岡青縈近樓臺井闔點畫察可四時合奇
士觀雲風霜露雨雪所爲發生收斂賦歌詩正東曰

蒼塘導瀨西漭望。瑤翻碧漱光文切鏤梨深撓撓收。
窮正北曰風隄乘攜左右隄。執北回股努。帶捩蹴墉。
御渠欹池南檐楹景怪嫋蛟龍鉤牽寶龜靈麤文文。
章章陰欲墊。燐煙潰靄聚桃李蘭蕙神君仙人衣裳。
雅冶可會脫赤熱西北曰鼈蛻原開始儲虛明茫茫。
嵬眼湏耳可大客旅鍾鼓樂提鵠挈鷺侶池豪渠憎。
垂憐園正西曰白濱薈深憐梨素女雪舞百佾水翠。
披嚦嚦千幅迎西引東士長崖挾橫埒日卯酉原注
日或作樵途鴟徑幽委蟲鳥聲無人風日燈火之晝夜漏。
刻詭姽絢化大小亭餽池渠閒走池隄上亭後前睥。
乘墉如連山羣峯擁地高下如原隰隄谿壑水引古。

自源三十里鑿高槽絕竇墉爲池溝沼渠瀑瀨漏終
出爲下原注或作其汨汨街衢畦町阡陌閒入汾巨樹木資
士悍水沮宗族盛茂旁蔭遠映錦繡交葉枝香畹麗
麗通作一原注上句下可絕他郡考其臺亭沼池之增蓋豪王
才侯襲以奇意相勝至今過客尚往往有指可創起
處余退常吁後其能無果有不補建者池由於煬及
者雅文安原注薛雅裴文安二人發土築臺爲拒幾附於汚宮
水本於正平軌病井滯生物瘠引古沃澗人便幾附
於河渠嗚呼爲附於河渠則可爲汚於汙宮其可書
以薦後君子長慶三年五月十七日記陶九成得樂
伯昂箋注本傳其句讀以便觀覽
今箋注世無其本賴輞耕錄傳之

大唐潤州句容縣大泉寺新三門記并序

唐姚
墓

句曲之東實曰峯居峯之陽厥生大泉寺因泉而題焉後劉宋開明二年順劉宋無開明武帝元昇明必沙門傳鵠而考正也
姚墓未能有邑令顏繼祖捨宅移寺南去泉五里而遙年代竊遠碑記埋沒粗所詳者乃顏氏十三代孫今寺之惠誠也大和初監寺僧惠明與寺僧道琳等見三門破壞乃言於衆曰此教東流設象爲法牢落如是瞻仰何依乃請今寺主僧常誼昔旅於是者勑力誓心慕當爲緣祈化如響斯應人咸歸之遠近趨走投施委積算財度費功用果足乃革舊制恢新謀

案年數不合
無以訂正

延袤縱廣中闕無改自大和庚戌至於癸丑凡七年
張丹拱霞煥矧茲寺以重岡疊嶺采入崖谷行樹葱
翠煙蘿蒙密雲收霧卷宛若仙闕俾得道者同指歸
於覺路由徑者詎深著於迷途非我師之志誠其孰
能逮於此今天下學佛道者多宗旨於五臺靈聖蹤
跡往往而在如吾黨之依於丘門也誼本鄭人冠歲
因往遊焉遂剃髮於五臺金閣寺元和再歲乃於渭
州龍興寺依年具戒振錫經行見色相之皆空識衣
珠之無價又六年始到江南初止於近寺蘭若其明
春又之嶺南詣禪訪道酌水步雲心契如期不遠千

里十一年還至茲寺初寺每有僧俗大會五千餘衆號曰龍華常患鎔金之器不周於用物有所闕人多告勞誼乃發願鑄一大鑊求布金之長者得鎔範之良工歸依一念之間成就堅牢之質濩落有用碩大無朋使天人畢會於龍花香積普沾於法味由此故也寺衆僉曰誼實有力於寺者非宿習德本沾諸善緣豈能誘掖羣心終成喜捨大和初歲乃聞諸府邑請諱名焉繇是三門荐興功致一貫則誼之行業前修推可鏡矣人有語余於師爲文者誼因錄所事請識門焉寺之備新記詳矣辭曰

寺之興大泉是生感沸猶在旣溫且靈寺之移顏氏

之基。宋室舊邑。桑野離離。寺之終誼。實是工大鼎渠
渠三門崇崇。煙霞棟梁。松桂香風。周匝巖壑。警迷其
鐘。文若於石。播之無窮。鄉貢進士姚摹撰當寺
沙門齊操書。開成三年歲次戊午十一月己卯廿六
日庚辰立。

天柱觀記

五代吳越武肅王

天柱觀者。因山爲名。按傳記所載。皆云天有八柱。其
三在中國。一在舒州。一在壽陽。洎今在餘杭者。皆是
也。又按道經云。天地之內。有十大洞天。三十六小洞
天。如國家之有藩府郡縣。遞相稟屬。其洞天之內。自
有日月分精。金堂玉室。仙官主領。考校災祥。今天柱

山即真詰所謂大滌洞天者也。內有隧道暗通華陽林屋。皆乘風馭景倏忽往來。羣真杳冥。非世俗所測。而況大江之南。地兼吳越。其峯巒西接兩天眼之龍源。次連石鏡之嵐岫。東枕浙江之迢派。可謂水清山秀。兼通大海。及諸國往還。此外又有東天目。西天目。及天竺之號。得非抗蒼涯於穹昊。聳絕壑於雲霄。立天爲名。以標奇特耶。若乃登高遠望。則千巖萬壑。金碧堆疊。龍盤虎踞。靈粹滋孕。代主異人。非山秀地靈之所鍾襲。其孰能與於此乎。就中天柱。風清氣和。土腴泉潔。神蛇不蟄。猛獸能馴。自漢武帝酷好神仙。標顯靈迹。乃於洞口建立宮壇。歷代祈禳。悉在此處。東

晉有郭文舉先生得飛化之道隱居此山羣虎來柔
史籍所載乃於蝸廬之次手植三松虬偃鳳翔蒼翠
千載今殿前者是也洎大唐創業以元元皇帝爲祖
宗崇尚元風恢張道本天皇大帝握圖御宇授籙探
符則有潘先生宏演真源搜訪神境宏道元年奉敕
創置天柱觀焉仍以四維之中壁封千步禁彼樵採
爲長生之林中宗皇帝玉葉繼昌元關愈闢特賜觀
莊一所以給香燈於是臺殿乃似匪人工廊檻而皆
疑化出星壇月砌具體而微則有被褐幽人據梧高
士挹澄泉之味息青蘿之陰葉天師法善朱法師君
緒吳天師筠暨天師齊物司馬天師承禎夏侯天師

子雲皆繼踵雲根棲神物表骨騰金鎖名冠瑤編出
爲帝王之師歸作神仙之侶金錯標宇翠珉流芳昭
晰具存不俟詳錄其餘三泉合派雙石開扉藥圃新
池古壇書閣各有題品足爲耿光鏐比際蒙聖朝疊
安藩閭綰闔閭之封畧統句踐之山河寵極蕭曹榮
兼渾郭緬懷斯地實邇維桑素仰真風備詳前事但
以此觀創置之始本對南方後有朱法師相度地形
改爲北向雖依山勢偏側洞門其洞首陰背陽作道
宮而不可致左右崗壠與地勢以相違背洞門而不
順百靈使清泉却侵白虎致使觀中寥落難住賢能
皆爲尊殿背水激衝之所致也乾寧二年鏐因歷覽

山源周遊洞府思報列聖九重之至德兼立二軍百姓之福庭於是齋醮之餘徧尋地理觀其尊殿基勢全無起發之由致道流困窮二時而不辨香燈竟歲而全無醮閱遂抗直表上聞聖聰請上清道士閻丘方遠與道衆三十餘人主張教跡每年春秋四季爲國焚修鏐特與剏建殿堂兼移基址山勢有三峯兩乳兼許邁先生丹竈遺跡猶存遂乃添低作平減高爲下改爲甲向是五音第一之方而乃添培乳山却爲主案尋即一二年內法主兩霑渥恩道侶益臻常住咸備青牛白鹿堪眠琪樹之陰絳節霓幢不絕星壇之上不得不因移山勢而再振元風者哉尋又續發

薦章奏聞。丘君道業聖上以仙源演慶真派流輝方
瑤水以遊神復華胥而入夢欲闡無爲之教欣聞有
道之人勅賜法號爲妙有大師兼加命服雖寒棲帶
索之士不尚寵榮在法橋勸善之門何妨顯赫其次
畢法道士鄭茂章生自神州久棲名巖元機契合負
笈俱來鏐幸捐方瞳常留化竹副妙有大師三元八
節齋醮同修福旣薦於宗祧惠頗霑於軍俗尋發特
表蒙鴻恩繼賜紫衣焚修於此其大殿之內塑天尊
真人龍虎二君侍衛無闕其次別創上清精思院爲
朝真念道之方建堂厨乃陳鼎擊鐘之所門廊房砌
無不更新天風每觸於庭除地籟時聞於窗戶兼爲

親隸觀額以炫成功非矜八體之能貴立永年之志妙有大師間丘君靈芝稟異皓鶴標竒誕德星躡披霓靈洞朝修虔懇科戒精嚴實紫府之表儀乃清都之輔弼加以降神之地即舒州之天柱山也遊方有志躡屩忘疲自生天柱之前駐修天柱之下察其契合信不徒然乃此修崇實爲搜抉所謂道無不在代有其人爰自開基至於功畢備仙家之勝槩暢聖祖之真風遂錄畫圖封章上進奉光化二年十一月二十七日詔旨勅錢鏐省所奏進重修建天柱觀圖一面事具悉我國家集慶仙源遊神道域普天之下靈迹甚多然自兵革薦興基址多毀況茲幽邃豈假修

營卿考一境圖經知列聖崇奉親臨勝槩重葺仙居
仍選精憲之流虔備焚修之禮冀承(元)貺來佑昌期

豈惟觀好事之方抑亦驗愛君之節既陳章奏披翫

再三嘉歎無已想宜知悉冬寒卿比平安好遣書指

不多及懿夫地出靈阜天開洞宮三皇之前真聖非

一莫非乘虛躡景出有入無雖或挂於傳聞不可知

其名氏皆分洞天而理即大滌居其一焉天柱觀即

漢以來迄於唐室修真之士繼躡清塵當四方俶擾

之時見一境希夷之趣今也仙宮嶽立高道雲屯六

時而鐘磬無虛八節之修齋罔闕有以保國家之景

祚福兩府之烝黎鏐今統吳越之山河官超極品上

奉宗社。次及軍民。莫不虔仰神靈。遵行大道。時也聖明當代。四海歸心。忝蒙委以東南。封爵功臣。兼頒金券。家山衣錦。兼兩道之油幢。上承一人倚注之恩。次荷正真護持之力。元元至聖崇敬福生。大道真科。是無爲化致。乃及身於此。合刊貞石。用俟後賢。時光化三年七月十五日記。案十國春秋所載此文似亦采洞霄圖志今石刻已佚無可覆也

溪州銅柱記

五代李宏臯

粵以天福五年。歲在庚子。夏五月。楚王召天策府學士李宏臯謂曰。我烈祖昭靈王。漢建武十八年平徵側於龍編樹銅柱於象浦。其銘曰。金人汗出。鐵馬蹄。

按

堅子孫相連。九九年。是知吾祖宗之慶允緒絲遠。
則九百年之運昌於南夏者乎。今五溪初寧。羣帥
內附。古者天子銘德。諸侯計功。大夫稱伐。必有刊勒。
垂諸簡編。將立標題式昭恩信。敢繼前烈。爲吾紀焉。
宏臯承教濡毫。載敘厥事。蓋聞牂柯接境。盤瓠遺風。
因六子以分居。入五溪而聚族。上古以之要服。中古
漸爾羈縻。洎師號精天。相名姓氏。漢則宋均置吏。稍
靜溪山。唐則楊思興師。遂開辰錦。邇來豪右。時恣陸
梁。去就在心。否臧由已。溪州彭士愁。世傳郡印。家憇
州兵。布惠立威。識恩知勸。故能歷三四代。長千萬夫。
非德教之所加。豈簡書而可畏。亦無辜於大國。亦不

虐於小民多自生知因而善處無何忽承閒隙俄至
動搖我王每示含宏嘗加姑息漸爲邊患深入郊圻
剽掠耕桑侵暴辰灋壘吏告逼郡人失寧非萌作孽
之心偶昧戢兵之法焉知縱火果至自焚時晉天子
肇創丕基倚注雄德以文皇帝之徽號繼武穆王之
令謨冊命我王開天策府天人降止備物在庭方振
聲明又當昭泰眷言僻陋可俟緩懷而邊鄙上言各
請効命王乃以靜江軍指揮使劉勣率諸部將付以
偏師鉦鼓之聲震動谿谷彼乃弃州保嶮結寨馮高
唯有鳥飛謂無人到而劉勣虔遵廟算密運神機跨
壑披崖臨危下瞰梯衝旣合水泉無汲引之門樵採

莫通糧糗乏轉輸之路固甘衿甲豈暇投戈彭師果爲父輸誠束身納款我王愍其通變爰降招攜崇侯感德以歸周孟獲畏威而事蜀王曰古者叛而伐之服而柔之不奪其財不貪其土前王典故後代著龜吾伐叛懷柔敢無師古奪財貪地實所不爲乃依前奏授彭士愁溪州刺史就加檢校太保諸子將吏咸復職員錫賚有差俾安其土仍頒廩粟大賑貧民乃遷州城下於平岸溪之將佐銜恩向化請立柱以誓焉於戲王者之師貴謀賤戰兵不染鐸士無告勞肅清五溪震龍旣百越底平壘理保乂邦家爾宜無擾耕桑無焚廬舍無害樵牧無阻川塗勿矜激瀨飛湍勿

恃懸崖絕壁。荷君親之厚施。我不徵求。感天地之至仁。爾懷寧撫。苟違誠誓。是昧神祇。垂於子孫。庇爾族類。鐵碑可立。敢忘賢哲之蹤。銅柱堪銘。願奉祖宗之德。宏臯仰遵王命。謹作頌焉。其詞曰。

昭靈鑄柱垂英烈。手執干戈征百越。我王鑄柱底黔黎。指畫風雷開五溪。五溪之險不足恃。我旅爭登若平地。五溪之衆不足憑。我師輕蹈如春冰。溪人畏威仍感惠。納質歸明求立誓。誓山川兮告鬼神。保子孫兮千萬春。
朔十八日辛巳鑄。
大晉天福五年歲次庚子七月甲子

勅畱啓母少姨廟記

五代許中孚

宗周嗣位之二葉也。命授神宗德符昊穹。寢被武功。
復乎淳風。皇教於是遐邇。車書以之混同。異域咸賓。
遠丘格白環之贊。嘉祥自兆阿閣巢丹穴之禽。曷覆
燾之洪均。致蒸黎之雍穆。古由今也。不其偉歟。時有
縣尹外郎彭城劉公。名渙字廣澤。故丞相譙國公之
元子也。鼎鼐名家。公台令族。竒姿碩德。爲時所稱。莫
不宏其學以開之。高其才以文之。崇其禮以節之。敦
其信以成之。臥錦爲郎。立事於文昌宮裏。握簡就列。
馳芳於建禮門中。洎以清白不容。權政所忌。賈誼賢
而見謫。屈平忠而自遷。諒州縣之徒勞。實銅墨之非
貴。有以見拘驥騤之足。淹社稷之才也。先莊伊陽次

宰斯邑未嘗不稽力任以資賦庾敷德惠以董逋逃除暴慢以恤惄黎示好惡以平獄訟下車而民授其賜蒞事而吏伏其明三年之政化大行百里之煩苛盡去屬我皇帝翼翼萬機孜孜庶政爲下民之革弊慮昏厲之作災用止訛風乃頒明詔曰當聰明正直以福及人者則可以靡息宗禋或妖回魑魅以禍苟人者則可以特加翦伐式絕淫祀永作恒規粵是邑皇甫村有古祠者即啓母少姨之神也夫勝事芳猷神通靈應備於嵩少二室本廟碑表載之也斯不復書又有濟瀆神宇一所祔焉誠彩仗之行宮復雷駕之別館欒櫨穹崇而特立丹臙照灼以相鮮杳邈虹

梁聳若龍驤之狀徘徊雉堞高侔矢立之形風來而蕙帳香生雨霽而晴軒翠滿歸然妙績迴跨神臯輪焉奐焉不可得而論也廟貌嚴肅明靈暗通望之者敬由是興祈之者福由是集稻粱黍稷春秋而遂布時羞絲竹陶匏庭砌而遽陳商角是得歲時序風雨順生植暢田疇開人獲困阜之豐里有謳謠之韻以作景福以助太和猗歟人之禱旣如斯神之應又如此於是下以利之事達於上上以畱之義令於下班基且廓魯壤弗加等靈光之獨存同甘泉之但闢獲永薦奠得壯祠宮潔以祈恩馳牲而可進固夫層構任迅景以頻移邑人牛敬贊等欲示後生宜刊貞

石乃爲見託。俾述斯文。中孚學不逮於古人。詞莫窮於前事。徒抽馬卿之思。強濡王粲之豪。豈敢繁言。庶存實錄。時顯德伍年歲在戊午柒月拾貳日記。鄉貢進士許中孚撰。

重建伏羲皇帝廟三門記

宋陳翕

蓋聞聖人不世出。出必有功於時也。鴻荒之世。朴畧尤甚。雖人倫之化既有。而貴德之風方扇。天下以大道之爲功。未有以仁義之爲用。大道判則爲仁義。仁義用則爲法制。法制立則聲華文物興焉。仁義出乎道。非道出於仁義也。仁義法制。皆道之跡。聖人之功也。夫道立本於無。爲用於有。蓋可見者存乎用。用可

見者存乎迹。迹者道之濟也。非道之本也。惟其以本求之。則至寂而無體。以用求之。則至虛而善應。以迹求之。則至利而無窮。所謂形而上下者是也。老子曰。無名天地之始。元胎未形。杳杳冥冥。遠之不可以名尋。近之不可以形詔。非探象先之原則。求知之難矣。絕於形器。梏於無爲。造之非我理。自冥化。此至寂而無體。其可見也。經爲陰陽。合爲至精。鬱爲元氣。發爲造化。而萬物制命受形。以生死代謝。其所以鼓舞運動。雷風雪霜之威。日月水火之變。付有爲於六子。收無爲於成功。此至虛而善應。又可見也。聖人既得至寂之本。以誠已。復達至虛之用。以濟物。擴而充之。發

越揮散興至利於百千萬世而無窮泯者蒙考之於伏犧皇帝用大道以王天下而見其本末體用之遂焉恭以伏犧皇帝挺生上古之初德冠三皇之首畫八卦而備萬物之象興文籍而書百世之名以結繩爲弊政而代之以書契以神化爲宣民而爲之以善法首正人倫復爲器用通其變使之無倦百姓日用而不知故君臣由之則肅而莊父子由之則和而恭夫婦由之則愿而雍兄弟由之則友而悌天下陶成於大順蓋人倫正之始也爲網罟以畋以漁爲棟宇以寧其居爲耒耜以濟其飢爲舟楫以便其涉爲弧矢以威其亂服牛馬以致其遠至乎揉木陶火鑠金

凝土一制一法莫不由乎仰觀俯察而始立之法又有數聖繼作。公襲至堯而成及周乃備故曰法始伏而成堯又曰匪伏匪堯禮義哨哨既歷漢唐之久下逮國家之盛一祖四宗六葉承天執是法以御大有通變以盡天下之利福周四海生民享之而無窮者亦以此也於伏犧皇帝之廟嘗遣使致祠焉今之於春秋之間無遠近無貴賤不辭跋涉之勞或負戴其親以至於此禱祠進獻無祈而不應也是知伏犧皇帝體魄雖降而其神未嘗死也說者曰聖人之死曰神未嘗死未嘗生者也秦漢以來分邦國爲郡縣今伏犧皇帝之故壤莫知其所在按圖經云單州魚臺

縣之東北七十里曰新興村其間有伏犧皇帝之陵
陵上有廟。古老謂曰廟舍之東有畫卦之山。南有古
銘城。北有羣仙洞。中有九龍潭。其古木勝槩。依稀存
焉。居民嚴溫者。世蒙其福。遂罄丹衷。自備己緡。兼化
信士。重建三門一座三閒。玉皇堂并神像炳靈公堂
并神像砌道幡竿等。上以酬聖造之恩。下以求舉家
之慶。既畢功。召翕爲之記。翕謾聞之學。不能盡萬一。
聊書歲月而已。

大宋熙寧十年歲次丁巳三月

辛亥朔二十五日乙亥立碑。莆陽貢吏陳翕撰并書。

碑在魚臺鳧山伏羲陵上南宋已後地入於金後人遂以陳州畫卦臺爲陵存此以俟更正祀典者

重摹孔子題季子墓記

宋朱彥

常州故延陵也。吳季子所封之地。至西漢爲毗陵。又至東晉爲晉陵。宋齊因之。隋平陳。廢晉陵爲常州。唐因之。或曰晉陵郡。自晉武帝太康二年分曲阿爲延陵。至隋徙治丹徒。唐武德三年徙延陵還治故縣。今潤之延陵鎮是也。杜佑謂曲阿延陵有季子廟。非古之延陵。古之延陵在今晉陵縣。其說明矣。而孔子所書季子墓碑。歲久益湮沒。開元中明皇勅殷仲容摹刻之。大歷十四年。潤州刺史蕭定重刻石。延陵廟中。於是俗習徒見潤之延陵季子廟。而不知常實古延陵。而季子之所封也。崇寧元年余以罪謫守是州。因考太史公書。歷代地志。通典圖經。得其詳矣。又得其

所謂季子墓在晉陵縣北七十里申浦之西又曰暨陽鄉而暨陽隸今之江陰縣乃屬令趙士淝訪之得大塚於暨陽門外三十里申港之側旁有季子廟與史記地志通典圖經合於是表識其墓謹樵牧耕鑿之禁又摹取孔子所書十字刻碑墓上設像祠之學中以時率屬吏士諸生拜焉所以示邦人貴有德也又備論歷世廢興與俗習之變易刻之碑下後有君子得以覽焉明年四月十五日降授奉議郎知常州軍州兼管內勸農事飛騎尉賜紫金魚袋朱彥記

東坡先生祠堂碑記

宋晁公武

在昔懷忠抱義之士必於沒身之所廟食百代者豈

惟丕功鴻烈應古祭法其高風英槩之所激勵則鄙
薄化服俊秀仰止莫不波屬雲委蓋有功於風俗而
人不能忘之國朝文忠蘇長公謙言直道稟自天性
平生歎排邪辭譏訶秕政苟利國家出萬死不顧一
生之計用是數困而終不少悔其忠義之節冠冕天
下自古儒宗詞伯殆未之有也垂年歸自南海閒居
毗陵雙桂坊屬疾不起吳越之人識與不識皆嗟咨
出涕固宜於其地尸而祝之而至於今越六十有九
年廟貌未立視古有闕焉昭德晁侯子健爲州之明
年諫經考史創立祠堂於學宮實政之美者而求公
武之文以記其始公武衰老問學荒落識見凡近豈

足以讚揚命世大賢之萬一。雖然。公武聞諸。世父景遷生崇寧閒。賊臣擅國。顛倒天下。之是非人。皆畏禍莫敢莊語。公之葬也。少公黃門銘其壙。亦非實錄。甚者以賞罰不明罪元祐。以改法免役壞元豐。指溫公才智不足。而謂公之后逐出其遺意。蔡確謗讟可赦。而謂公之進用。自其選擢。章惇之賊害忠良。而云公與之友善。林希之誣詆善類。而云公常汲引之。嗚呼斯銘若然。則公之上清儲祥精忠粹德二碑。及諸奏議著述。皆誕慢歟。公武因子健之請。伏自思念。歲月滋久。耆舊日益淪喪。存者皆邈然後進。則緒言將零落不傳。於是不敢以不能爲辭。而輒載其事。惟公

當元祐時起於謫籍登金門玉堂極禮樂文章之選及章蔡竄朋黨於嶺表而公獨先朝廷追復黨人官爵而公獨後立朝本末彰明較著如此豈有他哉昔陳仲弓送中常侍父之葬非以爲賢從者詈楚公子曰隸也不力非以爲不肖皆有爲而發而少公之意或出於此非邪後世不知其然惟斯是信則爲盛德之累大矣因述景遷生之語俾刻之樂石庶異日網羅舊聞者有考且爲楚人之辭一章使邦人歌之薦其俎豆百世不忘則風槩之所激勵俗爲丕變家出正士而輩爲純臣不益媿乎至於公之文章天下皆知之不當復妄措一辭非畧也子健景遷之嫡孫勤

敏孝謹嚴守家法居官爲政多稱是云其辭曰
若有人兮巴山陽錦心繡口兮金玉其相擢忠節以
爲佩兮集義槩以爲裳吐辭爲經兮萬世耿光仁人
之言兮藹然清明其志修潔兮稱物也芳雖覲險微
兮詎忍高翔井渫不食兮於井何傷吳山峩峩兮吳
水湯湯平生瞻戀兮魂魄游行菊英蘭露兮薦之新
堂廉貪立懦兮惠茲一方千秋萬歲兮勿怠勿忘

續古文苑卷第十



14715

